

EZEKIEL **(The Book of Ezekiel)**

Ezekiel Cabu Kawng

Babylonia lo Jerusalem he kum 597 B.C. vaengah a loh tih tamna vangsawn la pilnam muep a khuen. Jerusalem kah khosoih Ezekiel he khaw lamhma kah lambong dongah Babylon la a khuen van. 593 B.C., vaengah anih he Pathen loh a pilnam rhoek ham tonghma la a khue. Lamhma ah Ezekiel long he Pathen loh a pilnam ol a caek vetih, namtu hlangtholh, halang mawtkung, laithae tonghma rhoek a thiinah kawng a thui. Te phoeiah tah diklai namtom hlang soah Pathen kah laitloeknah a pai kawng te a thui. Lammah atah ol a thui ham khaw tonga ngawn coeng dae Jerusalem a cungku vaengah tah Pathen loh Ezekiel te koep a cal sak. Pathen Mueihla he hlang duek taengah khaw kun vetih a ram la koep mael ham khaw a hmuh sak. Pathen Bawkim thai neh thangpomnah ham khaw a hmuh sak.

Sawt Yoeinah

- I. Ezekiel a khuehnah neh tueihnah 1.1—3.27
- II. Jerusalem neh Judah ham ol a phong 4.1—24.27
- III. Kaepvai namtom ham ol phong 25.1—32.32
 - A. Ammon ham 25.1-7
 - B. Moab ham 25.8-11
 - C. Edom 25.12-14
 - D. Philistia 25.15-17
 - E. Tyre 26.1—28.19

F. Sidon 28.20-26

G. Egypt 29.1—32.32

IV. Israel ram koepthohnah 33.1—48.35

A. Thohnah a long im 33.1—39.29

1. Halang rhoek a hnawt ni 33.1-33

2. Tudawnkung a thai 34.1-31

3. Ram thohnah 35.1-15

4. Pilnam thohnah 36.15—37.28

5. Thunkhaw soah laitloeknah 38.1—39.24

6. Namtom ham mangthui 39.25-29

B. Ram kah bawk nah 40.1—48.35

1. Kum thawngkhat kah bawkim 40.1—43.27

2. Kum thangkhat kah thothuengnah 44.1—
46.24

3. Kum thangkhat kah bawknah 47.1—48.35

¹ Kum sawmthum dongkah a hla li sa hnin nga lo coeng. Kebar tuiva kah vangsawn lakli ah ka om vaengah vaan ong uh tih Pathen kah mangthui te ka hmuh. ² Te vaengah manghai Jehoiakhin hlangsol kah kum nga hla nga lo coeng. ³ Kebar tuiva Khalden kho kah khosoih Buzi capa Ezekiel taengah BOEIPA ol om rhoe om coeng. Te vaengah BOEIPA kut anih soah pahoi tueng.

BOEIPA kah Thangpomnah

⁴ Ka sawt vaengah tlangpuei lamkah hlipuei khohli tarha ha pawk. Cingmai kah a thah neh hmai khaw phaa tih a kaepvai neh a lalung kah a aa rhoe mah hmai lung kah hnaibok kah a pang bangla om. ⁵ A lalung lamkah te khaw mulhing pali phek coeng tih a mueimae tah hlang phek

la om. ⁶ Tedae khat rhip loh maelhmai pali neh amih khat rhip dongah phae pali om. ⁷ Amih kho tah a kho khaw thuem tih amih kho khopha tah saelca kho khopha bangla om. Te vaengah rhohum ngo kah a pang bangla khooi. ⁸ A phae hmui kah a kut khaw hlang kut bangla om. Amih pali te a vae pali ah khaw a maelhmai neh a phae boeih om. ⁹ A manu neh a la te a phae hum uh tih hoi uh thai pawh. Tekah hlang te a caeh vaengah a maelhmai neh a dannah la dawk pongpa uh. ¹⁰ Amih maelhmai te hlang maelhmai phek la om. Amih pali te bantang benah sathueng maelhmai la om tih a pali la banvoei benah vaito maelhmai neh a pali la atha maelhmai kap. ¹¹ A maelhmai khaw amah coeng tih a phae te a so la phuel uh. Khat neh khat te sisuk uh rhoi tih a pum te a khuk rhoi. ¹² Te dongah a maelhmai kah a dannah la rhip cet uh. Mela a om akhaw mueihla te tangrhoeng cet rhoe cet coeng. Te dongah amamih kah a caeh bangla mael uh pawh.

¹³ A mueimae tah mulhing phek neh hmai dongkah hmai-alh aka alh bangla, hmaithoi kah a mueimae bangla om. Anih te mulhing lakli ah a pongpa hatah hmai la aa tih hmai lamloh rhaek ha thoeng. ¹⁴ Mulhing te a thoeihyet vaengah rhaek kah a mueimae bangla ha mael.

¹⁵ Te vaengah mulhing rhoek te khaw a maelhmai pali neh mulhing diklai taengkah diklai dongah lengkho pakhat rhip te khaw kak ka hmuh. ¹⁶ Amih kah moeiboe tah timsuih a pang

phek tih amih pali te pakhat phek la om uh. Amih kah mueimae neh a moeiboe tah lengkho laklung ah lengkho aka om phek la om. ¹⁷ A vae pali longah a pongpa uh ham khaw cet uh dae a caeh uh bangla mael uh thai pawh. ¹⁸ Amih te a uen thah tih amih te a rhiim om. A uen te amih pali kah a pang kaepvai ah bae. ¹⁹ Mulhing rhoek a thoeih uh vaengah a taengkah lengkho te thoeih. Mulhing te diklai dong lamloh a phoh uh vaengah lengkho rhoek khaw phoh uh van. ²⁰ Melam khaw mueihla te a caeh rhoe a caeh ham a om atah mueihla taengla pahoi cet uh van. Mulhing mueihla he lengkho ah a om dongah lengkho khaw amih voeivang ah phoh uh van. ²¹ A caeh ham vaengah thoeih uh tih a pai uh ham vaengah pai uh. Diklai dong lamloh a phoh uh vaengah lengkho loh amih voeivang ah a phoh van. Lengkho khuiah mulhing mueihla om. ²² Mulhing lu sokah te bangyai phek la om. Rhaelnu a pang bangla a rhih om tih amih lu so duela yaal hang. ²³ bangyai hmui ah a manu loh a la taengla a phae a phuel te thuem. Amih aka thing rhoi khaw rhip om tih a pum aka dah rhoi te khaw rhip om. ²⁴ A phae ol te tui len ol bangla, Tlungthang ol bangla ka yaak. Lambong ol bangla a kawol ol neh khong uh tih a pai daengah a phae te a bai uh.

²⁵ Amih te pai tih a phae a hlah vaengah amih lu sokah bangyai so lamloh ol ha thoeng. ²⁶ Amih lu sokah bangyai so te minhum lung kah a mueimae bangla ngolkhoel phek la om.

Ngolkhoel mueiloh soah hlang kah mueimae bangla mueiloh om hang bal. ²⁷ A cinghen lamloh a so duela a kaepvai te rhohumbok kah a pang neh imkhui hmai kah mueimae bangla ka hmuh. A cinghen lamloh a dang thuk kah a mueimae khaw hmai mueimae bangla a kaepvai ah a aa ka hmuh. ²⁸ Khonal khohnin ah cingmai dongkah pampacung mueimae bangla om. A kaepvai kah a aa mueimae khaw BOEIPA kah thangpomnah mueimae phek ni. Ka hmuh vaengah ka maelhmai dongah ka cungku tih ol a thui ka yaak.

2

Israel Boekoek Taengah Cueihnah

¹ Kamah taengah, "Hlang capa aw na kho dongah pai lamtah nang taengah kan thui eh," a ti. ² Kai taeng a thui bangla ka khuiah Mueihla ha kun. Te vaengah ka kho dongah ka pai tih kamah taengah a thui te ka yaak. ³ Te vaengah kai te, "Hlang capa nang te Israel ca rhoek taeng neh namtom taengah kan tueih. Amih neh kai te a tloelh a tloelh uh. A napa rhoek long khaw kai taengah tahae khohnin due a rhuh la boe a koek uh. ⁴ Ca rhoek khaw a maelhmai mangkhak neh a lungbuei khaw tlungluen uh. Kai loh nang te amih taengah kan tueih. Te dongah amih te, 'Ka Boeipa Yahovah loh he ni a thui,' ti nah.

⁵ Amih loh a hnatun akhaw a toeng akhaw amih boekoek imkhui ham tonghma tah amamih lakli ah a om te ming saeh. ⁶ Tedae nang hlang

capa loh amih te rhih boel lamtah amih ol te rhih boeh. Nang te hlingpuem tangti neh saelkhui ta-ai lakli ah na hing cakhaw amih ol te rhih boeh. Amih mikhmuh ah rhihyawp boeh amih te boekoek imkhui ni. ⁷ Tedae amih boekoek dongah a hnaton uh akhaw a toeng uh akhaw ka ol he amih taengah thui kuekluek.

⁸ “Nang hlang capa namah taengah kan thui he hnaton. Boekoek imkhui bangla boekoek la om boeh. Na ka ang lamtah namah taengah kam paek te ca,” a ti. ⁹ Ka sawt vaengah kai taengla cabu cayol neh a kut tarha han thueng. ¹⁰ Ka mikhmuh ah te te a phaih vaengah a hnuk a hmai ah ca a daek. A khuiah rhahlung neh caitawknah neh yoethaenah a daek.

3

Ezekiel Cayol A Cah

¹ Te phoeiah kai te, “Hlang capa aw hekah cayol he na hmuh te ca la ca. Te phoeiah cet lamtah Israel imkhui te thui pah,” a ti. ² Te dongah ka ka te ka ang tih cayol te ka caak. ³ Te phoeiah kai te, “Hlang capa aw namah taengah cayol kam paek he na bungko duela ca lamtah na bung hah sak,” a ti. Ka caak tangloeng vaengah tah ka ka dongah a didip neh khoitui bangla om.

⁴ Te phoeiah kai taengah, “Hlang capa, cet lamtah Israel imkhui te paan laeh, amih taengah kamah ol neh thui pah. ⁵ A hmuilai aka khuet neh ol aka kael pilnam taengah pawt tih Israel imkhui taengah ni nang kan tueih. ⁶ A hmuilai

aka khuet tih a ol a kael neh a olka na yakming pawh pilnam cungkuem taengah moenih. Amih taengah pawt koinih nang kan tueih khaw amih loh nang ol te a hnatun uh suidae. ⁷ Tedae Israel imkhui loh nang ol te hnatun ham huem uh pawh. Kai ol pataeng hnatun ham a ngaih uh moenih. Israel imkhui boeih tah a tal tlunglueh tih a lungbuei khaw mangkhak uh. ⁸ Na maelhmai te amih maelhmai bangla ka sak tlunglueh vetih na tal khaw amih tal bangla te ka tlunglueh sak bitni ne. ⁹ Na tal te hmailung lakah tlunglueh lungning la kang khueh bitni. Amih te rhih boel lamtah amih boekoek imkhui kah a mikhmuh ah rhihyawp boeh,” a ti.

¹⁰ Te phoeiah kamah te, “Hlang capa aw, nang taengah ka thui kamah ol boeih he na thinko ah dueh lamtah na hna neh hnatun. ¹¹ Cet lamtah na pilnam paca vangsawn te paan laeh. Amih te thui pah lamtah a hnatun akhaw a toeng akhaw Boeipa Yahovah loh a thui he amih taengah thui pah,” a ti.

¹² Te vaengah mueihla loh kai te n'dangrhoek tih ka hnukkah amah hmuen ah BOEIPA kah thangpomnah a tanglue la a uem te hinghuennah ol la ka yaak. ¹³ Mulhing manu neh a la te a phae hum ol neh a voevang kah lengkho ol khaw hinghuennah tanglue ol la ka yaak. ¹⁴ Te phoeiah mueihla loh kai n'dangrhoek tih ng'khuen. Tedae BOEIPA kut he kai soah ha tlunglueh tih ka mueihla tah kosi neh khahing la ka cet. ¹⁵ Te dongah Kebar tuiva ah kho aka sa Telabib vangsawn taengla ka pawk. Amih khosa rhoek taengah pahoi ka om tangloeng dae hnin

rhih ka om mah amih lakli ah ka pong coeng.

Ezekiel Rhaltoeng La Om

¹⁶ Hnin rhih a bawtnah a pha vaengah BOEIPA ol kai taengla ha pawk. ¹⁷ Te vaengah, “Hlang capa nang te Israel imkhui ham rhaltawt la kang khueh coeng. Ka ka lamkah ol he na yaak coeng dongah kai lamlong mah amih te thuituen. ¹⁸ Halang te, ‘Na duek rhoe na duek ni,’ ka ti coeng. Tedae halang te a halang longpuei lamloh ah hinglu hlawt ham thuituen tueng te na thuituen pawt tih na thui pawt vaengah, halang khaw amah kah thaesainah neh duek koinih anih thii te nang kut lamloh ka suk ni. ¹⁹ Tedae nang halang te na thuituen lalah a halangnah neh a halang longpuei lamloh a mael pawt atah, anih te amah kah thaesainah dongah duek vetih nang tah na hinglu na huul ni. ²⁰ Hlang dueng khaw a duengnah lamloh mael tih dumlai a saii van atah a mikhmuh ah hmuitoel ka khueh pah vetih anih te duek ni. A tholhnah dongah anih na thuituen pawt koinih a duek vaengah duengnah a saii te poek uh mahpawh. Tedae a thii te nang kut dongah kan toem ni. ²¹ Aka dueng te a tholh pawt ham a dueng la amah na thuituen van atah anih khaw tholh mahpawh. A thuituen lamloh hing rhoe hing vetih nang khaw na hinglu te na huul van ni,” a ti.

²² Te phoeiah kai soah BOEIPA kah kut pahoi om tih kai taengah, “Thoo lamtah kolbawn la na pawk vaengah namah te pahoi kam voek ni,” a ti. ²³ Te dongah ka thoo tih kolbawn la ka cet. Te vaengah BOEIPA kah thangpomnah

tah thangpomnah bangla pahoi a pai tarha te Kebar tuiva ah ka hmuh tih ka hmai longah ka bakop. ²⁴ Te vaengah ka khuila mueihla ha kun tih ka kho lamloh kai n'thoh. Te daengah kai te m'voek tih kamah taengah, "Na im khui te paan lamtah khai laeh. ²⁵ Nang hlang capa te ne, nang soah rhuivaeh hang khueh uh vetih amih taengah nang m'pin uh ni. Te dongah amih lakli ah na mop thai mahpawh. ²⁶ Na lai khaw na dang la ka kap sak vetih na tum uh ni. Amih boekoek imkhui aka tluung loh hlang bangla amih taengah na om thai moenih. ²⁷ Tedae nang taengah kan thui vaengah na ka kang ong bitni. Te vaengah amih te, 'Ka Boeipa Yahovah loh he ni a thui,' ti nah lamtah, aka ngai long tah ngai saeh. Amih tah boekoek imkhui la a om dongah a hnawtkhoe long tah toeng ngawn saeh," a ti.

4

Jerusalem Mueimae

¹ Nang hlang capa namah loh laiboeng lo lamtah namah mikhmuh ah tloeng laeh. A soah Jerusalem khopuei te tarhit laeh. ² A taengah vong khueh pah lamtah a taengah buep khueh pah. A taengah tanglung khueng lamtah a taengah rhaehhmuen khueh. A kaepvai te maehdoelh khueh pah. ³ Te phoeiah namah loh thi thiphael te namah ham lo lamtah namah laklo neh khopuei laklo ah thi pangbueng la khueh. Te vaengah na maelhmai te a taengla hoi pah. Vongup ah a om bangla la khopuei te na dum bitni. He miknoek he Israel imkhui ham ni.

⁴ Te phoeiah nang te banvoui kah na vae neh yalh lamtah Israel imkhui kah thaesainah te a soah tloeng pah. A soah na yalh khohnin tarhing ah amih kah thaesainah te na phueih ni. ⁵ Amih kah thaesainah kum tarhing bangla nang te kan tueih tih khohnin ya thum neh hnin sawmko ah Israel imkhui kah thaesainah te na phueih van ni. ⁶ Te rhoek te na coeng van neh na vae bantang dongah yalh lamtah Judah imkhui kah thaesainah te khohnin la hnin sawmli phueih pah. A kum la kum ham te hnin at ni nang kan tueih. ⁷ Te phoeiah Jerusalem vong la na maelhmai hooi lamtah na ban te khawn lamtah, a taengah tonghma pah. ⁸ Te vaengah nang dongah rhuivaeh kang khih ni ne. Te dongah na vongup kah khohnin na poeng hil na vae khat ben lamloh na vae khat ben duela na hoi uh thai mahpawh.

⁹ Te phoeiah namah loh namah ham cang neh cangtun, maidawn neh rhacik, malket neh canguem khaw lo ne. Te te amrhaeng pakhat dongah pae uh lamtah na vae neh na yalh khohnin tarhing ah na buh la te te khueh. Khohnin ya thum sawmko khuiah te te ca. ¹⁰ Na caak te khaw a khiing la shekel pakul mah ca. A khohnin ham te a tue, a tue vaengah ca. ¹¹ Tui khaw khoe dongah bunang parhuk o lamtah a tue a tue vaengah o. ¹² Cangtun buh te na caak vaengah hlang kah natcaeh aek neh amih mikhmuh ah hai. ¹³ Te dongah BOEIPA loh, "Israel ca he tlam ni a buh rhalawt te a caak uh eh. Amih te namtom taengah pahoi ka heh ni," a ti.

¹⁴ Tedae, “Ka Boeipa Yahovah aw, ka hinglu he maehrhok saha neh a poeih vai moenih ne. Ka camoe lamloh tahae hil ka ca vai pawt tih maeh khaw ka ka ah dikyik dikyak ka a kun moenih,” ka ti nah.

¹⁵ Te vaengah kai te, “Ana so, hlang aek yueng la vaito aek ni nang taengah aek la kam paek vetih na buh te a soah tawn,” a ti. ¹⁶ Te phoeiah kai te, “Hlang capa aw, Jerusalem kah thahuelnah buh te ka bawt pah coeng. Te dongah buh te amah tarhing ah mawnnah neh a caak uh vetih tui te khoe dongah a maehmanah neh a ok uh ni. ¹⁷ Buh neh tui a vaitah vetih hlang neh a manuca pong ni. Te vaengah amamih kah thaesainah dongah muei uh ni.

5

Jerusalem Cungkunah A Tueng

¹ Hlang capa nang samvo taengkah cunghang paihat aka haat te namah ham lo laeh. Te te namah ham lo lamtah na lu neh na hmuimul khaw vo laeh. Te phoeiah namah ham cooi khiing khueh lamtah boek. ² Vongup khohnin a thok neh pathum ah pakhat te khopuei lalung ah hmaipuei neh kolh. Pathum ah pakhat te lo lamtah a kaepvai ah cunghang neh tloek. Te phoeiah pathum ah pakhat khohli dongla haeh. Amih hnukah cunghang ka khoh bitni. ³ Tedae te khui lamloh a sii ngai te bet lo lamtah na hnirhaep ah kaelh. ⁴ Te lamkah te koep lo lamtah hmai khui la voei. Te te hmai neh hoeh lamtah te lamkah hmai te Israel imkhui pum la pak saeh. ⁵ Ka Boeipa Yahovah loh he ni a thui. Jerusalem

he namtom lakli ah a kaepvai kah khohmuen neh ka khueh.

⁶ Tedae ka laitloeknah he namtom lakah, ka khosing te khaw a kaepvai kah kho rhoek lakah halangnah neh a koek. Ka laitloeknah te a hnawt uh tih ka khosing dongah pongpa uh pawh. ⁷ Te dongah ka Boeipa Yahovah loh he ni a thui. Na kaepvai kah namtom lakah na hlangping dongah nim ka khosing dongah na pongpa uh pawt tih ka laitloeknah he na vai uh pawh. Na kaepvai namtom kah laitloeknah banglam pataeng na vai uh moenih.

⁸ Te dongah ka Boeipa Yahovah loh he ni a thui. Kai kamah khaw nang kam pai thil coeng. Namtom mikhmuh kah laitloeknah neh na laklo ah ka saii ni. ⁹ Nang kah tueilaehkoi cungkuem dongah ka saii vai pawt te nang taengah ka saii vetih te bang te koep ka saii mahpawh. ¹⁰ Te dongah na khui kah napa rhoek loh a ca rhoek, ca rhoek loh napa rhoek a caak uh ni. Na soah tholhphu kan suk vetih na meet boeih te khohli cungkuem taengla ka haeh ni. ¹¹ Te dongah he tah ka Boeipa Yahovah kah olphong ni. Kai hingnah ni. Ka rhokso te namah kah sarhingkoii cungkuem neh, namah kah tueilaehkoi cungkuem neh na poeih het pawt nim? Te dongah ka hlaek vaengah ka mik loh rhen pawt vetih lungma ka ti van mahpawh.

¹² Nang taengah te hlopthum ah hlopkhat, duektahaw ah duek uh vetih na khui ah khokha loh a khah ni. Na kaepvai kah Hlopthum ah hlopkhat te cunghang dongah cungku uh ni.

Pathum ah khohli cungkum taengla ka haeh vetih amih hnukah cunghang ka khoh ni. ¹³ Te daengah ni amih taengkah ka thintoek a daeh neh ka kosi ka hlam vetih dam ka ti eh. Te vaengah BOEIPA kamah loh ka kosi he amih soah ka sah phoeiah khaw ka thatlainah neh ka voek te a ming uh bitni. ¹⁴ Te phoeiah na kaepvai kah aka pongpa boeih mikhmuh neh namtom taengah nang te imrhong la, kokhahnah la kang khueh ni.

¹⁵ Kai loh nang soah tholhphu te thintoek neh, kosi neh kan saii vaengah na kaepvai kah namtom taengah kokhahnah neh hnaelcoenah, thuituennah neh a rhaerhap la om bitni. Te dongah BOEIPA kamah loh kosi kah toelthamnah nen ni ka thui. ¹⁶ Amih taengah yoethae khokha thaltang te ka kah ni. Nangmih aka phae ham te te ka kah te kutcaihnah lam ni a om. Te dongah nang soah khokha kang koei vetih nangmih kah thahuelnah buh te ka bawt ni. ¹⁷ Nangmih taengah khokha neh boethae mulhing kan tueih vetih nangmih te cakol la n'khueh ni. Duektahaw neh thii loh nang te m'pah vetih na taengah cunghang kang khuen ni. BOEIPA kamah long ni ka thui.

6

Israel Samphaih

¹ BOEIPA ol te kai taengla ha pawk tih, ² Hlang capa aw, Israel tlang taengla na maelhmai khueh lamtah amih te tonghma thil laeh. ³ Te vaengah, 'Israel tlang rhoek aw ka Boeipa Yahovah ol he

hnatun uh. Ka Boeipa Yahovah loh tlang taeng neh mol taengah, kolrhawk sokca taeng neh kolrhawk taengah khaw he ni a thui. Kai kamah loh nangmih soah cunghang kang khuen vetih na hmuensang ka phae ni. ⁴ Na hmueihtuk te pong vetih na bunglawn khaw tlawt ni. Na mueirhol hmai ah na rhok ka cungku sak ni. ⁵ A mueirhol hmai ah Israel ca rhoek kah rhok te ka khueh vetih na hmueihtuk kaepvai ah na rhuh ka haeh ni. ⁶ Na tolrum tom kah khopuei rhoek te khaw a khah uh vetih hmuensang khaw rhawp ni. Te dongah na hmueihtuk rhoek te boe uh vetih paeng ni. Na mueirhol rhoek te kangkuen uh vetih na bunglawn a tlawt vaengah na bibi khaw hmata ni. ⁷ Na khui ah rhok a yalh vaengah BOEIPA kamah te nan ming uh bitni. ⁸ Tedae nangmih te diklai ah kan thaek cakhaw namtom taengah cunghang lamloh hlangyong rhoek la na om ham kan hlun ni.

⁹ Te vaengah nangmih kah hlangyong rhoek loh namtom taengah kai m'poek uh ni. Te ah te a sol uh tih a lungbuei khaw mat ka paeng sak coeng. Tedae kai taeng lamloh a nong te cukhalh uh tih a mik khaw a mueirhol hnukah cukhalh uh. A maelhmai ah ko-oek lalh la a tueilaehkoi boeih dongah boethae te a saii uh dongah ni. ¹⁰ Te vaengah BOEIPA kamah loh he boethae he amih soah saii ham a poeyoek la ka thui pawt te a ming uh bitni.

Jerusalem sokah Rhaengsae Lung

¹¹ Ka Boeipa Yahovah loh he ni a thui. "Na kut te ngawn lamtah na kho te daep laeh. Anunae Israel imkhui kah boethae tueilaehkoi cungkuem

dongah ni cunghang dongah, khokha dongah, duektahaw dongah a cungku uh eh,' ti saeh. ¹² Khohla te duektahaw ah duek vetih a yoei te cunghang dongah cungku ni. Khokha kah aka sueng tih a kueinah khaw duek ni. Te tlam ni amih soah ka kosi ka sah eh. ¹³ Te vaengah BOEIPA kamah he m'ming uh bitni. Amih rhok te a mueirhol lakli ah, som tom kah a hmueihtuk kaepvai ah om kangna saeh. Tlang lu tom ah pomsang uh tih thing hing hmui tom neh rhokael bu hmui kah hmuen tom ah a mueirhol cungkuem ham hmuehmuei botui hnep a nawn uh. ¹⁴ Ka kut he amih ka thueng thil vetih khohmuen he Diblath khosoek lamloh a tolrum boeih ah khopong neh a rhaerhap la ka khueh ni. Te vaengah BOEIPA kamah te m'ming uh bitni," a ti.

7

A Bawtnah Kah Olhoe

¹ BOEIPA ol kai taengla ha pawk tih, ² "Nang hlang capa aw ka Boeipa Yahovah loh Israel khohmuen kah a bawtnah ham he ni a thui. Khohmuen a hmoi pali, pali ah a bawtnah ha pawk coeng. ³ A bawtnah he nang soah a pai coeng dongah ka thintoek he nang taengla kan tueih ni. Na khosing bangla nang lai kan tloek vetih namah kah tueilaehkoi boeih te namah taengah kan thung ni. ⁴ Nang te ka mik long khaw n'rhen pawt vetih lungma ka ti mahpawh. Tedae na khosing te namah taengah kam paek vetih namah kah tueilaehkoi te namah khui ah thoeng ni. Te vaengah BOEIPA kamah he nam ming bitni.

⁵ “Ka Boeipa Yahovah loh he ni a thui. Yoethae pakhat kah yoethae thoeng he. ⁶ A bawtnah ha pawk coeng. A bawtnah ha pawk coeng. Haenghang tih nang taengla ha pawk coeng ke. ⁷ Khohmuen kah khosa nang soah cangen la ha thoeng coeng lah ko. Soekloeknah a tue khohnin ha pawk tom coeng tih tlang kah omngaihna tal coeng. ⁸ Ka kosi he nang soah a yoei la ka lun pawn vetih ka thintoek he nang taengah ni ka hong eh. Na khosing bangla nang soah lai ka tloek vetih namah tueilaehkoi boeih te nang taengah kam paek ni. ⁹ Ka mik loh rhen pawt vetih lungma ka ti mahpawh. Na khosing bangla nang te kan thuung vaengah namah kah tueilaehkoi te namah khui ah om ni. Te vaengah BOEIPA kamah loh ka ngawn te na ming bitni.

¹⁰ “Khohnin ha pai coeng he, cangen khaw yulh coeng he. Conghol loh khooi tih althanah khaw muem coeng. ¹¹ Kuthlahnah tah halangnah conghol dongah poe. Tedae amih khuikah te a hong ni, a hlangping khuikah khaw a honghi, a boei khuikah a honghi, amih kah rhahlung rhaengsae khaw a hong ni. ¹² A tue ha pawk coeng tih khohnin loh ha pai coeng. Aka lai loh a kohoe boel saeh lamtah aka yoi khaw nguekcoi boel saeh. A hlangping boeih soah a thinsa coeng. ¹³ Aka yoi kah hnoyoih te a hing la a hing uh khui khaw koep mael pawh. A hlangping boeih ham a mangthui te lat mahpawh te. Hlang he amah kah thaesainah dongah a hingnah talong thai mahpawh.

¹⁴ “A cungkuem te soepboe ham olueng te a ueng thil. Tedae a hlangping boeih sokah ka

thinsa dongah ni caemtloek la a caeh pawh.
¹⁵ Tollong ah cunghang neh im ah duektahaw
 neh khokha om. Lohma kah te cunghang
 dongah duek vetih khopuei kah te khokha neh
 duektahaw loh a dolh ni. ¹⁶ Amih hlangyong
 rhoek tah loeih uh suidae tlang ah kolrhawk
 vahui bangla om uh ni. Hlang boeih he amamih
 kah thaesainah dongah kawh uh ni. ¹⁷ Kut khaw
 boeih kha vetih khuklu khaw tui la boeih poeh
 ni. ¹⁸ Tlamhni a vah uh vetih amih te tuennah
 loh a thing ni. Maelhmai boeih te yah neh om
 vetih a lu boeih te lungawng la om ni. ¹⁹ A ngun
 tollong la a voeih uh vetih a sui te pumom bangla
 om ni. A ngun neh a sui loh amih a huul ham
 a coeng moenih. BOEIPA kah thinpom khohnin
 ah amih kah hinglu te cung pawt vetih amih
 bung khaw hah mahpawh. Amih kah thaesainah
 tah hmuitoel la om coeng. ²⁰ Amih kah kirhang
 cangen te a hoemdannah ham a khueh. Tedae
 amih kah tueilaehkoi neh a sarhingkoii tah a
 muei la amah taengah a saii uh. Te dongah amih
 te pumom la ka khueh. ²¹ Kholong kut ah maeh
 la, diklai halang taengah kutbuem la ka paek ni.
 Te vaengah anih te a poeih rhoe a poeih uh ni.
²² Ka maelhmai te amih lamloh ka mangthung
 vaengah ka khoem duen te a poeih uh. A khuila
 dingca rhoek kun uh vetih a poeih uh ni.

²³ “Khohmuen he thii kah laitloeknah bae tih
 khopuei he kuthlahnah a khawk coeng dongah
 thirhui saii uh laeh. ²⁴ Namtom kah boethae te
 ka thoeng sak vetih amih im kah te a huul uh
 ni. Hlangtlung kah hoemdannah te ka paa sak
 vetih a rhokso te a poeih uh ni. ²⁵ Mitmoengnah

a pai dongah ngaimongnah tlap uh cakhaw dang uh mahpawh. ²⁶ Lucik soah lucik pai vetih olthang soah olthang om ni. Tonghma lamkah mangthui tlap cakhaw khosoih lamkah olkhueng neh patong rhoek kah cilsuep khaw paltham ni. ²⁷ Manghai te nguekcoi vetih khoboeh loh khopong ni a bai eh. Khohmuen kah pilnam kut khaw hlinghlawk vetih a khosing bangla amih te ka saii ni. Amamih laitloeknah dongah amamih te lai ka tloek vaengah BOEIPA kamah te m'ming uh bitni," a ti.

8

Jerusalem a Mangthui

¹ Kum rhuk kum hla rhuk dongkah hnin nga a lo vaengah kamah im ah ka ngol tih kamah mikhmuh ah Judah kah patong rhoek khaw ngol uh. Te vaengah ka Boeipa Yahovah kah kut he kai sola pahoi ha tla. ² Ka sawt vaengah hmai kah a mueimae bangla phek om he. A mueimae te a cinghen lamloh a dang due hmai bangla om. A cinghen lamloh a so duela rhohumbok kah a pang neh khophaa kah mueimae bangla om. ³ Kut kah muei bang te a thueng tih ka lu samtoel ah kai n'doek. Te vaengah mueihla loh kai he diklai laklo neh vaan laklo la m'pom. Te phoeiah kai te Pathen kah mangthui khuiah tlangpuei la aka mael Jerusalem khui kah vongka thohka la ng'khuen. Te te thatlainah mueimae neh aka thatlai kah tolrum ni. ⁴ Te vaengah

Israel Pathen kah thangpomnah he kolbawn ah a mueimae la pahoi ka hmuh coeng he.

Bawkim khuikah Kholong Khoboe

⁵ Te phoeiah kai taengah, “Hlang capa aw, tlangpuei longpuei la na mik huel laeh,” a ti. Ka mik he tlangpuei longpuei la ka huel tangloeng hatah thatlainah mueimae kah hmueihtuk vongka te tlangpuei ah kak ka hmuh. Te te thohkaeng ah ni a om. ⁶ Te phoeiah kai taengah, “Hlang capa, amih te na hmuh nama? Amih loh tueilaehkoi a saii uh khungdaeng coeng te. Ka rhokso lamloh lakhla ham he Israel imkhui long ni a saii. Tedae koep na mael vetih tueilaehkoi khaw muep na hmuh bitni,” a ti.

⁷ Te phoeiah kai te vongup thohka la ng'khuen hatah pangbueng dongah a khui pakhat te lawt ka hmuh. ⁸ Te vaengah kai taengah, “Hlang capa, pangbueng te thuk laeh,” a ti. Te dongah pangbueng te ka thuk hatah thohka pakhat lawt ka hmuh. ⁹ Te phoeiah kai taengah, “Paan lamtah boethae rhoek kah tueilaehkoi te so lah, te te amih long ni he ah he a saii uh,” a ti. ¹⁰ Ka kun vaengah rhulcai muei cungkuem neh konawhnah rhamsa kah mueirhol boeih khaw kak ka hmuh. Te te Israel im ah pangbueng kah a kaep a kaep ah a vuel.

¹¹ Amih lakli ah Israel imkhui kah patong hlang sawmrhah neh Shaphan capa Jaazaniah khaw pai. Amih hmai ah aka pai hlang loh a kut dongah hmaibael te a pom. Te vaengah bo-ul kah a hu a thah la khu. ¹² Te phoeiah kai taengah, “Hlang capa, Israel im kah patong rhoek loh a

ngaihlih imkhui kah hlang neh hmaisuep ah a saii te na hmuh nama? 'BOEIPA loh mamih m'hmuh pawt tih khohmuen he BOEIPA loh a hnoo coeng," a ti uh," a ti.

¹³ Te phoeiah kai taengah, "Koep na mael vaengah amih loh tueilaehkoi a tanglue a saii uh te na hmuh bitni," a ti.

¹⁴ Te dongah kai te tlangpuei kah BOEIPA im vongka kah thohka la m'pawk puei. Te vaengah manu tarha ana ngol pahoi tih Tammuz te a rhah uh. ¹⁵ Te vaengah kai taengah, "Hlang capa na hmuh coeng nama? Koep na mael vaengah he lakah a nah la tueilaehkoi na hmuh ni," a ti.

¹⁶ Te phoeiah kai te BOEIPA im vongup khui la m'pawk puei. Te vaengah BOEIPA bawkim thohka kah ngalha laklo neh hmueihtuk laklo ah hlang pakul panga tluk ana om. BOEIPA bawkim te a hnuk la a rhoe uh tih a maelhmai kothoeng la a khueh uh. Amih loh kothoeng kah khomik te a bawk uh. ¹⁷ Te vaengah kai taengah, "Hlang capa na hmuh coeng nama? Judah imkhui loh tueilaehkoi a saii te phoeng a? Khohmuen te kuthlahnah neh cung sak kuekluek ham ni a saii uh he. Kai veet ham ni mael uh tih amih loh a hnarhong te thingluei a hu thil lah ko te. ¹⁸ Te dongah kai loh kosi neh ka saii ni. Ka mik loh rhen pawt vetih lungma ka ti mahpawh. Ka hna ah ol ue la ng'khue uh cakhaw amih ol ka hnaton mahpawh," a ti.

9

Jerusalem kah Ngawnnah

¹ Ka hna ah ol ue la kut dongah ng'khue tih, “Khopuei aka cawhking rhoek te hang khuen lamtah hlang loh amah pocinah hnopai te pom saeh,” ti nah.

² Tlangpuei la aka mael a so vongka longpuei lamloh hlang parhuk ha pawk coeng ke. A kut dongah amah kah ngawnnah hnopai aka pom hlang rhoek ni. Amih khui kah hlang pakhat tah takhlawk pueinak neh a kaep ah cadaek catui a hol. Ha pawk uh vaengah tah rhozum hmueihtuk taengah pai uh.

³ Te phoeiah Israel Pathen kah thangpomnah tah cherubim so lamloh luei tih te kah a soah im thohkong ni a om coeng. Te phoeiah takhlawk pueinak a kaep ah cadaek catui aka tawn hlang te a khue. ⁴ BOEIPA loh anih te, “Khopuei khui longah Jerusalem khui la paan lamtah a khui ah tueilaehkoi cungkuem a saii soah aka huei tih aka kii hlang rhoek kah a tal ah kutha khoeih pah,” a ti.

⁵ Te kamah hna ah, “Anih te khopuei longah paan lamtah ngawn laeh. Na mik loh rhen boel saeh lamtah na mik loh lungma ti boel saeh.

⁶ Patong neh tongpang oila khaw, camoe neh manu khaw, kutcaihnah la ngawn laeh. Tedae a pum dongah kutha aka om hlang boeih te tah mop thil boeh, ka rhokso lamloh tong laeh,” a ti. Te dongah im hmai kah hlang rhoek neh patong taeng lamloh a tong uh. ⁷ Te phoeiah amih te, “Im aka poeih neh vongup ah rhok aka bae rhoek te paan uh,” a ti. Te dongah a paan uh tih khopuei lamloh a ngawn uh.

⁸ Amih a ngawn vaengah kai n'hlun. Te vaengah ka maelhmai dongah ka cungku. Ka pang tih, "Aw ka Boeipa Yahovah, Jerusalem ah na kosi na hawk vaengah Israel kah a meet boeih te na thup a," ka ti.

⁹ Te vaengah kai taengah, "Israel neh Judah imkhui kah thaesainah te bahoeng bahoeng len. Khohmuen ah thii baetawt tih khopuei ah a hoemlae khawk. BOEIPA loh khohmuen a hnoo tih BOEIPA loh hmu pawh,' a ti uh. ¹⁰ Tedae kai khaw ka mik loh rhen pawt vetih lungma ka ti mahpawh. Amih kah khosing te amamih lu soah ka sah ni," a ti. ¹¹ Te phoeiah takhlawk pueinak neh a cinghen ah catui aka tawn hlang loh ol a hlat tih, "Kai nang uen bangla boeih ka saii coeng," a ti.

10

Bawkim kah BOEIPA Thangpomnah

¹ Ka sawt vaengah cherubim lu dongkah banyai soah ngolkhoel phek te a mueimae ah minhum lung bangla amih soah lawt a tueng pah. ² Te phoeiah takhlawk pueinak aka bai hlang te a voek tih, "Cherubim kungdak kah humhae laklo ah kun laeh. Hmai dongkah hmai-alh te na kutnarhum dongah poem lamtah cherubim laklo lamloh khopuei soah haeh," a ti nah phoeiah ka mikhmuh ah kun.

³ Te vaengah cherubim rhoek te im kah bantang ah pai uh. Hlang a kun vaengah vongup khui ah cingmai bae. ⁴ Te phoeiah

BOEIPA thangpomnah te cherubim so lamloh im thohkong duela pomsang hang. Te vaengah im te cingmai baetawt tih vongup ah BOEIPA kah thangpomnah a aa te bae. ⁵ Cherubim kah phae ol te vongup voel duela Tlungthang Pathen a cal vaengkah ol bangla ka yaak.

⁶ Te phoeiah takhlawk pueinak hlang te a uen tih, “Humhae laklo lamkah hmai te cherubim laklo lamloh lo lah,” a ti nah.

Te dongah kun tih lengkho taengah pai. ⁷ Te vaengah cherub loh cherubim lakli lamloh a kut a thueng tih cherubim laklo kah hmai te a loh. Te phoeiah a khuen tih takhlawk pueinak kutnarhum ah a paek. Te dongah a khuen tih cet. ⁸ Amih cherubim kah a phae hmuiah hlang kut bangla a muei tueng.

⁹ Te phoeiah cherubim kaepah lengkho pali lawt ka hmuh. Cherub pakhat taengah lengkho pakhat, cherub pakhat taengah lengkho pakhat tlip om. Lengkho a mueimae tah timsuih lung kah a pang bangla om. ¹⁰ Amih pali te a mueimae khaw pakhat phek la om. Lengkho kah a lalung ah lengkho bangla om bal. ¹¹ A caeh uh vaengah a vae pali neh cet uh tih mael uh thai pawh. A caeh ham hmuen la a lu a hooi uh tih a hnuk ah a caeh uh dongah amamih a caeh bangla hoilae tloel. ¹² A pum tom neh a uen khaw, a kut neh a phae neh a lengkho khaw, a lengkho pali kah kaepvai a mik hoeng la om. ¹³ Amih kah lengkho te kai hna ah tah, “Humhae ni,” a ti. ¹⁴ Pakhat rhip te maelhmai pali om tih

pakhat kah maelhmai tah cherub maelhmai la, a pabae kah maelhmai tah hlang maelhmai la, a pathum te sathueng maelhmai neh a pali te tah atha maelhmai la om.

¹⁵ Te phoeiah cherubim rhoek te pomsang uh hang. He mulhing ni Kebar tuiva ah ka hmuh.

¹⁶ Cherubim rhoek a caeh vaengah a taengkah lengkho rhoek khaw cet van. Cherubim rhoek te a phae phuel uh tih diklai dong lamloh a pomsang vaengah a taengkah a lengkho te khaw dul pawh. ¹⁷ Amih khuikah mulhing mueihla te amamih neh a om dongah a pai vaengah tangrhoeng pai uh tih a phoh uh vaengah tangrhoeng phok uh.

¹⁸ Te vaengah BOEIPA kah thangpomnah tah im thohkong so lamloh nong tih cherubim soah pai. ¹⁹ Te phoeiah cherubim rhoek loh a phae a phuel tih ka mikhmuh kah diklai lamloh pomsang hang. Amih bangla a voevang kah lengkho khaw cet tih yan BOEIPA im vongka thohka pai. Te vaengah Israel Pathen kah thangpomnah he amih sokah a so duela om.

²⁰ Kebar tuiva kah Israel Pathen hmui ah mulhing ka hmuh he cherubim la ka ming.

²¹ Pakhat loh maelhmai pali, pali neh pakhat rhip phae pali a khueh tih a phae hmui te hlang kut phek la om. ²² Kebar tuiva ah a maelhmai ka hmuh te amih maelhmai phek ni. A mueimae ah khaw amih ni. Tekah hlang te a maelhmai neh a dannah la cet.

11

Israel Mawtkung Rhoek Kah Khoboe Thae

¹ Mueihla loh kai m'phoh tih khothoeng la aka mang yan BOEIPA im vongka la kai ng'khuen. Te vaengah hlang pakul panga te vongka thohka ah lawt ana om. Amih lakli ah pilnam kah mangpa Azzur capa Jaazaniah neh Benaiah capa Pelatiah ka hmuh. ² Te phoeiah kai taengah, "Hlang capa, hlang rhoek long he boethae a moeh uh tih he khopuei ah a thae cilsuep ni a uen uh. ³ Im sak ham yoei hlan, mamih tah he am dongkah maeh ni,' a ti uh. ⁴ Te dongah amih taengah tonghma pah, hlang capa aw tonghma pah," a ti.

⁵ BOEIPA kah mueihla te kai soah ha cu tih kai te m'voek. "BOEIPA loh a thui he Israel imkhui ah thui pah. Tedae na mueihla kah tangtlaeng khaw ka ming. ⁶ Nangmih rhok te he khopuei ah hmoeng tih a tollong khaw rhok neh bae," a ti.

⁷ Te dongah ka Boeipa Yahovah loh he ni a thui. Na rhok te a khui ah maeh la na khueh coeng tih khopuei he am la poeh coeng. Tedae nangmih te a khui lamloh n'hoep ni. ⁸ cunghang na rhih uh dongah nangmih taengla cunghang kang khuen ni. He tah ka Boeipa Yahovah kah olphong ni. ⁹ Nangmih te a khui lamloh kang khuen vetih kholong kut ah kan tloeng ni. Te vaengah tholphpu te nangmih soah ka saii ni. ¹⁰ Israel khorhi ah cunghang neh na cungku uh tih nangmih soah lai ka tloek vaengah BOEIPA kamah te nan ming uh bitni. ¹¹ He he nangmih ham tah am la om pawt vetih nangmih te a khui ah maeh la na om uh mahpawh. Nangmih te Israel khorhi ah lai kan tloek ni. ¹² Te vaengah BOEIPA kamah te nan ming uh bitni. Ka oltlueh dongah na pongpa uh pawt tih ka laitloeknah na

rhoi uh moenih. Tedae na kaepvai namtom kah laitloeknah bangla na saii uh.

¹³ Ka tonghma li vaengah Benaiah capa Pelatiah te duek. Te dongah ka maelhmai neh ka bakop tih ol ue la ka pang. Te vaengah, 'Ka Boeipa Yahovah aw, na khawknah hil ah Israel kah a meet te na saii aih,' ka ti.

Israel Ham Olkhueh

¹⁴ BOEIPA ol te kai taengla ha pawk. ¹⁵ Te vaengah, "Hlang capa aw, na manuca khuikah na manuca, na hlang tlannah neh Israel imkhui pum loh a pum la amih Jerusalem khosa rhoek te, 'BOEIPA taeng lamloh a lakhla uh dongah ni khohmuen he kaimih taengah khoh la m'paek,' a ti na uh.

¹⁶ Te dongah ka Boeipa Yahovah loh a thui he thui. Amih te namtom taengah ka lakhla sak tih diklai ah amih ka taek ka yak sitoe cakhaw a pha uh khohmuen ah amih ham rhokso la rhaih ka om pahoi coeng.

¹⁷ Te dongah ka Boeipa Yahovah loh a thui he thui pah. Nangmih te pilnam taeng lamloh kan coi vetih nangmih te diklai lamloh kan coi ni. Amih taengah kan taek kan yak cakhaw Israel khohmuen he nangmih taengah ni kam paek eh.

¹⁸ Te la ha pawk uh vaengah a sarhingkoi cungkuem neh a tueilaehkoi cungkuem te anih lamloh a khoe uh ni. ¹⁹ Amih te lungbuei pakhat la ka khueh pah vetih nangmih kotak ah mueihla thai kam paek. Te vaengah amih saa lamkah lungto lungbuei ka kuel pah vetih amih te ngansen lungbuei te ka paek ni. ²⁰ Te

daengah ni ka khosing dongah pongpa uh vetih ka laitloeknah te a tuem uh eh. Te te a sai uh daengah ni kai taengah pilnam la om uh vetih kai khaw amih taengah Pathen la ka om eh. ²¹ Tedae amih kah sarhingkoi lungbuei neh a lungbuei kah a tueilaehkoi longpuei ah a pongpa uh te amih lu ah ka tloeng pah ni. He tah ka Boeipa Yahovah kah olphong ni," a ti.

Thangpomnah Nong

²² Te vaengah cherubim rhoek loh a phae te a voevang kah lengkho neh a phuel tih Israel Pathen kah thangpomnah tah amih sokah a so duela om. ²³ BOEIPA kah thangpomnah khaw khopuei khui lamloh cet tih khopuei kothoeng kah tlang ah duem. ²⁴ Mueihla loh kai ng'khuen tih Pathen kah mueihla mueimae neh Khalden ah vangsawn la kai n'thak. Te phoeiah a mueimae ka hmuh te kai taeng lamloh cet. ²⁵ vangsawn taengah ka thui ol boeih he BOEIPA loh kai n'tueng coeng.

12

Tamna la Om ni

¹ BOEIPA ol te kai taengla ha pawk tih, ² "Boekoek imkhui lung ah kho aka sa hlang capang, amih te hmuh ham mik om dae a hmuh uh moenih, a yaak ham hna khaw a khueh uh dae amih te boekoek imkhui kah coeng dongah ya uh pawh.

³ Te dongah hlang capa nang, vangsawn kah hnopai te namah ham rhoekbah lamtah kothaih kah amih mikhmuh ah poelyoe pah. Namah hmuen lamloh amih mikhmuh ah a tloe hmuen la poelyoe pah. Amih boekoek imkhui loh a hmuh uh khaming. ⁴ Na hnopai te kothaih kah amih mikhmuh ah vangsawn kah hno bangla sat lamtah kholaeh ah khaw amih mikhmuh ah vangsawn kah a pongthoh bangla na thoeng pah mako. ⁵ Amih mikhmuh ah namah ham pangbueng te thuk lamtah te long te khuen. ⁶ Amih mikhmuh ah na laengpang soah kawt lamtah a hmuep due na maelhmai dah lamtah khuen. Te daengah ni Israel imkhui ham kopoekrhai la nang kang khueh te khohmuen loh a hmuh pawt eh," a ti.

⁷ Te dongah ng'uen bangla ka saii tangloeng tih kamah kah hnopai te kothaih ah vangsawn kah hnopai bangla ka khuen. Kholaeh ah pangbueng te kamah ham kut neh ka thuk. A hmuep vaengah laengpang soah ka tloeng tih amih mikhmuh la ka pawk puei.

⁸ BOEIPA ol tah mincang ah kai taengla ha pawk tih, ⁹ "Hlang capa, boekoek imkhui kah Israel imkhui loh na saii te nang taengah thui uh pawt nim? ¹⁰ Ka Boeipa Yahovah loh a thui he a taengah thui pah. He tah Jerusalem neh amih khui kah Israel imkhui boeih ham khoboeh kah olrhuh ni. ¹¹ 'Ka saii bangla nangmih kah miknoeknah tah kai ni. Amih te vangsawn la a khueh vetih na tamna la cet uh ni. ¹² Amih lakli kah khoboeh khaw a hmuep ah a laengpang neh a koh vetih coe uh ni. Pangbueng khui long coe

ham te a thuk uh ni. A maelhmai te a thing vetih a mik dongah khohmuen khaw hmu mahpawh. ¹³ Te vaengah ka lawk te anih ham ka tung vetih ka rhalvong dongah man bitni. Anih te Khalden khohmuen Babylon la ka thak vaengah he he a hmuh kolla pahoi duek ni. ¹⁴ A kaepvai boeih te khaw anih kah bomkung bomkung neh a caembong boeih khohli cungkuem taengla ka haeh vetih amih hnuk te cunghang neh ka khoh ni. ¹⁵ BOEIPA kamah he a ming uh bitni. Amih te namtom taengah ka taekyak ham neh amih te paeng taengah ka haeh coeng. ¹⁶ Tedae amih kah hlang te amah tarhing ah cunghang lamkah neh khokha lamkah khaw duektahaw lamkah ka hlun ni. Te daengah ni a thoeng uh thil namtom taengah khaw amamih kah tueilaehkoi cungkuem te a tae uh pahoi vetih BOEIPA kamah te m'ming uh eh," a ti.

Israel kah Ngaihmanh

¹⁷ Te phoeiah BOEIPA ol te kai taengah ha pawk tih, ¹⁸ "Hlang capa, na buh te hinghuennah neh ca lamtah na tui te khoponah neh, mawnnah neh o. ¹⁹ Te phoeiah khohmuen kah pilnam taengah thui pah. Ka Boeipa Yahovah loh he ni a thui. Israel khohmuen kah Jerusalem khosa rhoek a buh te mawnnah neh a ca uh saeh lamtah a tui te a maehmanah neh o uh saeh. A khohmuen te a cungkuem ah a khui khosa boeih kuthlahnah dongah rhawp ni. ²⁰ Khosa khopuei rhoek khaw khap uh vetih khohmuen he khopong la poeh

ni. Te vaengah BOEIPA kamah te nan ming uh bitni," a ti.

Laithae Thuidoeknah

²¹ BOEIPA ol tah kai taengah koep ha pawk tih, ²² "Hlang capa, nang taengkah thuidoeknah te ta? Khohmuen kah Israel he thui pah ham khaw khohnin puh tih mangthui khaw boeih paltham coeng.

²³ Te dongah ka Boeipa Yahovah loh a thui he amih taengah thui pah. He thuidoeknah he ka paa sak vetih he he Israel khuiah khaw koep thoel uh mahpawh. Te dongah amih taengah khohnin neh mangthui cungkuem kah ol ha thoeng te thui pah dae. ²⁴ A poeyoek kah mangthui boeih neh olhnal tonghma khaw Israel im khui ah koep om mahpawh. ²⁵ Tedae BOEIPA loh ka thui te ka thui ol bangla thoeng ni. Nangmih kah khohnin ah uelh voel mahpawh. Boekoek imkhui te ol ka thui pah vetih amah la ka thoeng sak ni. Ka Boeipa Yahovah kah olphong ni," a ti.

²⁶ BOEIPA kah ol tah kai taengah ha pawk tih, ²⁷ Hlang capa aw, Israel imkhui, "Anih kah mangthui a hmuh te khohnin la puh tih a tue khohla ham ni a tonghma," a ti uh te. ²⁸ Te dongah ka Boeipa Yahovah loh a thui he amih taengah thui pah. Ka ol ka thui boeih te ka ol bangla uelh voel mahpawh. Tedae ka Boeipa Yahovah olphong he thoeng ni," a ti.

13

Laithae Tonghma a Hnael

¹ BOEIPA ol te kai taengla ha pawk tih, ² “Hlang capa aw, Israel tonghma tonghma rhoek soah tonghma pah lamtah amamih lungbuei lamkah tonghma rhoek te, “BOEIPA ol hnaton,” ti nah.

³ Ka Boeipa Yahovah loh he a thui. Anunae tonghma ang rhoek aih te, amamih mueihla hnuk a vai uh soe tih a hmuh khaw om hae pawh.

⁴ Israel nang kah tonghma rhoek te imrhong dongkah maetang rhoek bangla om uh coeng.

⁵ A puut te paan uh boeh. BOEIPA khohnin kah caemtloek dongah pai ham Israel im kah vongtung te biing laeh.

⁶ A poeyoek la aka hmu neh laithae bihma loh BOEIPA kah olphong la a thui. BOEIPA loh amih te tueih pawt dae ol thoh ham a ngaiuep uh. ⁷ Mikhlam te a poeyoek la na hmuh uh tih laithae tonghma te na thui uh pawt het nim? BOEIPA kah olphong aka ti rhoek bal khaw kai loh ka uen moenih.

⁸ Te dongah ka Boeipa Yahovah loh he ni a thui. A poeyoek la na cal uh tih laithae ni na hmuh uh. Te dongah ni kai loh nangmih taengah ka Boeipa Yahovah kah olphong kang khuen. ⁹ Ka kut loh a poeyoek la aka hmu tonghma rhoek te a om thil vetih ka pilnam kah baecenol khuiah laithae la aka hma rhoek khaw om uh mahpawh. Israel imkhui kah ca dongah khaw daek uh pawt vetih Israel khohmuen ah khaw kun uh mahpawh. Te vaengah kai ka Boeipa Yahovah tila nan ming uh bitni.

¹⁰ Ka pilnam te a maelh uh dongah ngaimongnah a ti te khaw ngaimongnah hae moenih. Anih loh vong paam sak tih amih loh a kak la a bol

uh coeng ke. ¹¹ A rhorhap neh aka bol rhoek te thui pah. Khonal a pai vaengah tim vetih a yo ni. Rhael lung loh nangmih soah cuhu vetih hlipuei khohli loh n'hep ni. ¹² Te vaengah nangmih taengah, "Pangbueng cungku coeng ke, thungbok neh na bol te ta?' ti mahpawt nim?

¹³ Te dongah ka Boeipa Yahovah loh he ni a thui. Ka kosi ah hlipuei khohli ka tueih vetih ka thintoek ah khonal kah a yo neh a bawtnah te kosi kah rhael lung ham om bitni. ¹⁴ A rhorhap la a bol pangbueng te ka koengloeng vetih diklai la ka nolh ni. Tedae a khoengim a poelyoe tih a cungku vaengah amah lakli ah n'khah uh ni. Te vaengah BOEIPA kamah te nan ming uh bitni. ¹⁵ Ka kosi he pangbueng taeng neh a rhorhap aka bol taengah ka hong eh. Tedae nangmih te, "Pangbueng pawt tih aka bol bal moenih," ka ti ni. ¹⁶ Jerusalem taengah aka tonghma Israel tonghma rhoek neh ngaimongnah mangthui a hmuh dae ngaimongnah moenih. He tah ka Boeipa Yahovah kah olphong ni.

¹⁷ Hlang capa nang loh na pilnam nu te na maelhmai khueh thil. Amih amamih lungbuei lamloh aka tonghma khaw hlang rhoek khaw tonghma thil. ¹⁸ Ka Boeipa Yahovah loh a thui he thui pah. Anunae kai kut sukvai tom ah luhoe aka hui tih hinglu mae ham a songsang cungkuem neh a lu dongkah lumuekhni aka saii rhoek aih. Ka pilnam kah hinglu na mae cakhaw namah kah hinglu tah na hing venim? ¹⁹ Cangtun kutpha yet ham te ka pilnam taengah kai nan poeih uh. A duek pawt koi khaw buh kamah ham hinglu na duek sak uh. Hinglu a hing

ham vaengah laithae aka hnaton ka pilnam te nangmih kah laithae loh hing sak pawh.

²⁰ Te dongah ka Boeipa Yahovah loh he ni a thui. Nangmih kah luhoete ka pai thil coeng ne. Te nen ni nangmih loh aka phuelh bangla hinglu te pahoi na mae uh. Tedae te te nangmih ban dong lamloh ka phen vetih hinglu te ka hlah ni. Te hinglu te nangmih loh aka phuelh bangla na mae uh. ²¹ Na lumuekhni te ka phen vetih ka pilnam te na kut lamloh ka huul ni. Te daengah ni na kut dongkah rhalvong la koep om uh pawt vetih BOEIPA kamah te nan ming uh eh. ²² Laithae loh aka dueng kah lungbuei a paeng sak. Kai loh anih thak ka khoeih sak pawt tih halang kut ka moem pah dongah nim amah a hing ham a boethae longpuei lamloh a mael pawh. ²³ Te dongah a poeyoek la na hmu uh pawt vetih bihma khaw koep hma mahpawh. Ka pilnam te na kut lamloh ka huul vaengah BOEIPA kamah te nan ming uh bitni," a ti.

14

Samphaih Patong A Toel

¹ Israel patong rhoek khui lamkah hlang rhoek te kai taengla ha pawk uh tih ka mikhmuh ah ngol uh. ² Te vaengah BOEIPA ol te kai taengah ha pawk tih, ³ "Hlang capa aw, he kah hlang rhoek he a lungbuei ah a mueirhol a khueh uh. Amamih mikhmuh ah a thaesainah hmuitoel a khueh uh. A toem ham khaw amih te ka toem aya?"

⁴ Te dongah amih te voek lamtah amamih te thui pah. Ka Boeipa Yahovah loh he ni a thui.

Hlang khaw Israel im kah hlang tah a lungbuei ah a mueirhol a khueh tih a mikhmuh ah amah kah thaesainah hmuitoel a khueh phoeiah tonghma taengla pawk. A mueirhol khuehtawn neh aka pawk te BOEIPA kamah loh ka doo ni. ⁵ Te dongah Israel imkhui te amamih kah lungbuei bangla tuuk ham om. Amih boeih te amamih kah mueirhol dongah ni kai taeng lamloh a kholong uh.

⁶ Te dongah Ka Boeipa Yahovah loh a thui he Israel imkhui taengah thui pah. Yut uh lamtah na mueirhol taeng lamloh mael uh. Nangmih kah tueilaehkoi cungkuem taeng lamloh na maelhmai te mangthung laeh. ⁷ Te dongah hlang he Israel imkhui kah hlang khaw, Israel khuikah aka bakuep yinlai khaw kai te n'hai. Te dongah a lungbuei ah a mueirhol a khueh tih a mikhmuh ah amah kah thaesainah hmuitoel a khueh. Tedae anih lamloh kai he toem ham tonghma taengla pawk kai BOEIPA kamah loh anih te ka doo ni. ⁸ Tekah hlang te ka maelhmai ka khueh thil vetih anih te miknoek neh thuidoeknah la ka khueh ni. Ka pilnam lakli lamloh anih ka saii vaengah BOEIPA kamah te nan ming uh bitni.

⁹ Tedae tonghma te a hloih tih ol thui cakhaw te tonghma te BOEIPA kamah loh ka hloih coeng. Te dongah anih te ka kut ka thueng thil vetih ka pilnam Israel khui lamloh anih te ka mitmoeng sak ni. ¹⁰ Amamih kah thaesainah te a phueih uh vetih thaesainah a toem uh vanbangla tonghma kah thaesainah khaw ana om saeh. ¹¹ Te daengah ni Israel imkhui te kai hnuk lamloh khohmang voel pawt vetih a boekoek cungkuem

neh koep a poeih uh pawt eh. Kamah taengah pilnam la om uh vetih kai khaw amih taengah Pathen la ka om ni. He tah ka Boeipa Yahovah kah olphong ni," a ti.

Laitloeknah Pali

¹² BOEIPA ol te kai taengla ha pawk tih, ¹³ "Hlang capa aw khohmuen loh kai taengah boekoeknah la boekoek ham a tholh atah ka kut a taengah ka thueng vetih a thahuelnah buh te ka pat sak ni. A soah khokha ka tueih pah vetih a hlang neh rhamsa te ka saii ni. ¹⁴ A khui ah hlang pathum, Noah, Daniel neh Job om koinih amih kah duengnah loh te rhoek kah a hinglu a huul pah khaming. He tah ka Boeipa Yahovah kah olphong ni.

¹⁵ Khohmuen longah boethae mulhing ka paan sak vetih cakol la om ni. Te vaengah khopong la poeh vetih mulhing mikhmuh ah aka pongpa om mahpawh. ¹⁶ Kai tah hingnah ni tite ka Boeipa Yahovah kah olphong ni. A khui kah hlang pathum long he a capa khaw huul thai pawt vetih a canu khaw huul thai mahpawh. Amih te amamih bueng ngawn a huul uh khaming dae a, khohmuen tah khopong la om ni.

¹⁷ Khohmuen te cunghang ka muk thil coeng. Khohmuen te cunghang loh a paan ham ka thui dongah a hlang neh rhamsa te ka saii ni. ¹⁸ Kai tah hingnah tite ka Boeipa Yahovah kah olphong ni. A khui kah hlang pathum long he a capa khaw a canu a huul thai pawt atah amih loh amamih bueng khaw huul uh thae khaming.

¹⁹ Te cakhaw khohmuen te duektahaw ka tueih thil vetih ka kosi a soah ka hawk ni. A hlang

neh rhamsa saii ham thii long ni. ²⁰ Kai tah hingnah ni tite Boeipa Yahovah kah olphong ni. A khui kah Noah, Daniel neh Job long pataeng a canu a capa te a huul thai moenih. Amamih kah duengnah nen ni a hinglu a huul.

²¹ Te dongah ka Boeipa Yahovah loh he ni a thui. Ka taengkah tholhphu pali ngawn tah boethae cunghang neh khokha khaw, boethae mulhing neh duektahaw la a hlang neh rhamsa rhaih ham Jerusalem ah ka tueih. ²² Tedae rhalyong la a khuen capa canu te a khuih sueng ni. Amih khaw nangmih taengla ha thoeng coeng te. Amih khosing neh a khoboe rhamlang na hmuh uh coeng. Te dongah Jerusalem soah ka thoeng sak yoethae neh a soah a cungkum la ka thoeng sak te na ko damti uh bitni. ²³ Amih kah khosing neh a khoboe rhamlang na hmuh vaengah damti uh bitni. Te vaengah a khuih a cungkum ka saii te lunglilungla la ka saii uh pawt khaw na ming uh ni. He tah Boeipa Yahovah kah olphong ni," a ti.

15

Misur Thuidoeknah

¹ BOEIPA ol te kai taengla ha pawk tih,

² "Hlang capa, duup kah thing dongah thingluei aka om misur thing te thing boeih lakah metlam a om?

³ Bitat la saii ham te lamkah thing a loh tih a soah hnopai cungkum hoei ham anih lamkah te ciphuem la a loh uh nim?

⁴ Hmai dongah toihthing bangla a pup ke. A hmoi rhoi te hmai loh a hlawp tih a bangli due tlum. Te te bitat ham thaitak aya?

⁵ A cuemthuek la a om vaengah pataeng bitat la a saii pawt atah hmai loh a cilh tih a tlum phoeiah bitat la metlam koep a saii eh?

⁶ Te dongah ka Boeipa Yahovah loh he ni a thui. Duup thing dongkah misur thing te hmai dongah toihthing ham ka khueh vanbangla Jerusalem khosa rhoek te ka khueh van ni.

⁷ Amih te ka maelhmai ka khueh thil yetih hmai lamloh coe uh cakhaw hmai loh amih te a hlawp ni. Kai loh ka maelhmai amih ka khueh thil vaengah BOEIPA kamah te nan ming uh bitni. ⁸ boekoeknah la boe a koek uh dongah khohmuen te khopong ka khueh ni. He tah ka Boeipa Yahovah kah olphong ni," a ti.

16

Samphaih Nu Thuidoeknah

¹ BOEIPA ol te kai taengah koep ha pawk tih,
² "Hlang capa amah kah tueilaehkoi te Jerusalem ming sak. ³ Te vaengah ka Boeipa Yahovah loh he ni a thui. Jerusalem te, 'Namah tuikong neh na pacaboeina tah Kanaan kho kah tih, na pa te Amori, na nu khaw Khitti nu ni. ⁴ Na pacaboeina loh na om khohnin ah na yenrhui at pawt tih tui neh pakpak n'silh moenih, n'yut khaw n'yuut pawt tih n'yol khaw n'yol moenih. ⁵ He khuiah pakhat khaw nang taengah saii ham vaengah a mik loh nang te n'rhen moenih. Nang soah thinphatnah ham lakah na om nah khohnin

ah na hinglu tueilaehkap ham ni lohma li ah m'voeih.

⁶ Na kaepah ka pah vaengah nang te namah thii neh na nok uh te ka hmuh. Te vaengah nang taengah, "Na thii dongah hing ne," ka ti nah tih, "Nang te namah thii neh hing," ka ti nah.

⁷ Lohma thingdawn a pul bangla nang kang khueh. Te dongah na ping tih na pantai vaengah cangen lakah cangen la na poeh. Na rhangsuk khaw hmabuet tih na sam khaw sai. Tedae nang te pumtling neh yangyal la na om.

⁸ Na taengah ka pah vaengah namah neh na tue hlo ngaih tue la kak kam hmuh. Te dongah ka hnihmoi te nang kang khuk thil tih na yah kan dah. Nang taengah ka toemngam tih nang te paipi khuila kan thoeng puei dongah ni kamah taengah na om. He tah ka Boeipa Yahovah kah olphong ni. ⁹ Namah tui neh kan hluk tih na pum dongkah na thii te kan silh. Te phoeiah nang te situi neh kan yuh. ¹⁰ Nang te rhaekva kam bai sak tih saham pho ni nang kang khom sak. Hnitang neh nang kan yen tih puhimbai neh nang kan khuk. ¹¹ Nang te cangen kang oi sak tih na kut dongkah khungpak neh na rhawn kah oi khaw kam paek. ¹² Na hnarhong dongkah hnaii neh na hna dongkah hnathawn khaw na lu dongkah boeimang rhuisam khaw kam paek. ¹³ Sui neh ngun na oi tih na hnicu khaw hnitang khuikah hnitang tah, puhimbai neh rhaekva ni. Vaidam neh khoitui neh situi te na caak na caak tih bahoeng, bahoeng na sawtthen dongah mangpa taengah na thaitak. ¹⁴ Ka rhuepomnah he nang taengah a rhuemtuet

la kam paek lamloh na sakthen neh na ming tah namtom taengah tueng coeng. He tah ka Boeipa Yahovah kah olphong ni.

¹⁵ Tedae na sakthen dongah na pangtung tih na ming dongah na cukhalh. Aka cet boeih soah na cukhalhnah na hawh tih anih ham khoeng a om pah. ¹⁶ Na himbai te na loh tih hmuensang te namah ham savawh la na saii. Amih sokah na cukhalh te phoe noek pawt tih om noek bal mahpawh. ¹⁷ Namah taengah kam paek ka sui neh ka ngun te namah kah boeimang hnopai bangla na loh. Te phoeiah tongpa muei te namah ham na saii tih amih taengah na cukhalh. ¹⁸ Himbai khaw namah kah rhaekva te na loh tih amih na khuk. Ka situi neh ka bo-ul te amih mikhmuh ah a tawn khaw na tawn mai. ¹⁹ Ka buh khaw namah ham kam paek tih vaidam neh situi neh khoitui te nang kan cah. Tedae amih mikhmuh ah na tawn pah tih hmuehmuei botui bangla om sumsoek. He tah ka Boeipa Yahovah kah olphong ni.

²⁰ Kai ham nan sak na canu na capa te na khuen tih caak la amih taengah na ngawn. Na cukhalhnah lamloh na cukhalhnah te yol a? ²¹ Ka ca rhoek te na ngawn tih amih taengah duek paan la amih te na paek. ²² Namah kah tueilaehkoi cungkuem neh na cukhalhnah dongah na camoe tue vaengah pumtling neh yangyal la na om tih na thii dongah aka nok uh na om te na poek khaw na poek pawh.

²³ Na boethae cungkuem hnukah ana om ngawn, anunae anunae nang aih te. He tah ka Boeipa Yahovah kah olphong ni. ²⁴ Namah ham

sawn na daep tih toltung takuem ah thaehhing na dawn. ²⁵ Longpuei longlu takuem ah na thaehhing na dawn, na sakthen na tuei tih aka cet boeih taengah na kho na kaa. Te vaengah na cukhalhnah lamloh na cukhalhnah te na kum. ²⁶ Na imben Egypt ca rhoek taengah na cukhalh neh pumsa ah na boeilen. Kai veet ham ni na cukhalhnah te na ping sak.

²⁷ Te dongah nang taengla ka kut ka thueng coeng he. Na khoboe khonuen rhamtat dongah ni na khotlueh te kam bim tih na hmaithae neh na lunguet hinglu, Philisti nu taengla nang kam voeih. ²⁸ Na cungnah a om pawt dongah Assyria ca rhoek taengah na cukhalh bal. Tedae amih taengah na cukhalh pataeng na hah bal moenih. ²⁹ Kanaan khohmuen kah Khalden taeng duela na cukhalhnah te na ping sak dae te nen pataeng na hah moenih.

³⁰ Na ko tah tahah tangkik coeng. He tah Boeipa Yahovah kah olphong ni. Rhaidaeng la pumyoi nu kah khoboe he boeih na saii. ³¹ Longpuei tom kah longlu ah na sawn na daep. Na thaehhing te toltung takuem ah na dawn na dawn tih a paang aka soehsal ham pumyoi bangla na om rhoe na om moenih a? ³² Yuu loh samphaih tih a va yueng kholong te a doe. ³³ Pumyoi takuem taengah kutdoe a paek uh vaengah nang tah na kutdoe te nang aka ngaih sarhui taengah na paek. Na cukhalhnah dongah na kaepvai lamkah te namah taengla pawk ham kapbaih na paek. ³⁴ Te dongah nang kah cukhalhnah dongah namah taengah huta lamloh khuplat la om coeng. Nang hnukah aka

cukhalh om pawh. Nang loh a paang na paek tih namah te a paang m'paek pawt dongah khuplat la na om coeng.

³⁵ Te dongah pumyoi aw BOEIPA ol he hnatun lah. ³⁶ Ka Boeipa Yahovah loh he ni a thui. Na rhohum khaw na lun tih na ngaih taengah na cukhalhnah neh na yah na phen. Nang kah tueilaehkoi mueirhol cungkuem neh na ca thii te amih taengah na paek. ³⁷ Te dongah na hlang ngaih boeih te ka coi coeng ne. Amih taengah na lungtui tih na lungnah boeih te khaw, na lunguet boeih te khaw a kaepvai lamloh amih te nang taengah kang kuk. Amih taengah na yah kam poelyoe vetih na yah te boeih a hmuh uh ni. ³⁸ Samphaih kah laitloeknah neh thii aka long sak nang te lai kan tloek ni. Te vaengah kosi neh thatlainah thii te nang soah kang khuen ni. ³⁹ Nang te amih kut ah kan paek vaengah tah na sawn han koengloeng vetih na thaehhing ham voeih ni. Nang te na himbai ham pit tih na boeimang hnopai han loh vaengah nang te pumtling neh yangyal la ng'khueh uh ni. ⁴⁰ Nang te hlangping neh m'paan thil vetih nang te lungto neh n'dae phoeiah a cunghang neh nang te m'poel uh ni. ⁴¹ Na im te hmai neh a hoeh uh vetih nang sokah tholhphu te huta a yet kah mikhmuh ah n'saii uh ni. Te vaengah ni pumyoi lamloh nang kam paa sak vetih a paang khaw koep na paek pawt eh. ⁴² Nang soah ka kosi ka hong daengah ni nang taengkah ka thatlainah a nong eh. Te vaengah ka mong vetih hue ka sa voel mahpawh. ⁴³ Na camoe tue te na poek la

na poek pawt tih he boeih neh kai taengah na tlai. Te dongah kai khaw na khosing te na lu soah kam paek ni. He tah ka Boeipa Yahovah kah olphong ni. Te dongah nang kah tueilaehkoi boeih te khonuen rhamtat la saii rhoe saii boeh.

⁴⁴ Nang kawng neh aka thuidoek boeih long ke a canu aka voek manu bangla a thuidoek ni.

⁴⁵ Nang tah a va neh a ca rhoek aka tuei na manu canu ni. Nang tah a hlang neh a ca aka tuei na ngannu kah tanu ni. Na nu tah Khitti tih na pa te Amori ni. ⁴⁶ Na tanu suiham Samaria khaw a canu neh nang kah banvoei ah om lah ko. Na tanu namah lakah a noe tah na bantang kah Sodom ah a canu neh om lah ko. ⁴⁷ Amih kah longpuei ah na pongpa bueng pawt tih amih taengkah tueilaehkoi te mikpalap ah valh na saii khaw na saii. Tedae na longpuei boeih dongah khaw amih lakah na poeih uh coeng.

⁴⁸ Kai tah hingnah tite, ka Boeipa Yahovah kah olphong ni. Namah neh na canu kah na saii bang te na tanu Sodom neh a canu loh a saii noek moenih. ⁴⁹ Na tanu Sodom kah thaesainah la he ni aka om he. Buh coihdanah dongkah hoemdannah he amah neh a canu taengah a mong la ommongnah a om pah. Tedae mang-daeng neh khodaeng kut tah a moem moenih. ⁵⁰ Sang uh cakhaw ka mikhmuh ah tueilaehkoi ni a saii uh. Te dongah na hmuh bangla amih te ka saii. ⁵¹ Samaria he nang kah tholhnah a loengboeng pataeng a tholh moenih. Te dongah nang kah tueilaehkoi he amih lakah yet. Tedae namah kah tueilaehkoi cungkuem na saii na saii tih na tanu kah na tanu taengah khaw na tang

van. ⁵² Namah khaw na mingthae te phuei nawn. Na tanu ham na thangthui cakhaw na tholhnah neh amih lakah n'tuei coeng tih nang lakah tang uh. Te dongah namah khaw na tanu na tang sak dongah yak lamtah na mingthae phuei nawn.

⁵³ Tedae amih khuikah thongtla, Sodom thongtla neh a tanu thongtla, Samaria kah thongtla thongtla neh a tanu thongtla, amih lakli kah nangmih thongtla, thongtla te khaw koep ka mael puei. ⁵⁴ Te dongah amih na hloep vaengkah na saii boeih te na mingthae phuei lamtah na hmaithae saeh. ⁵⁵ Na tanu Sodom khaw a canu neh amah hmuen la mael uh vetih Samaria neh a tanu rhoek khaw a muel la mael uh ni. Te vaengah nang neh na tanu rhoek khaw namah hmuen la na mael ni. ⁵⁶ Na hoemdannah khohnin vaengkah na ka lamkah olthang bangla na tanu Sodom khaw om mahpawt nim? ⁵⁷ Na boethae a hliphen tom vaengah Aram nu neh a kaepvai boeih kah Philisti nu rhoek kokhahnah tue vaengkah bangla a kaepvai ah nang n'hnaep uh. ⁵⁸ Nang kah khonuen rhamtat neh namah kah tueilaehkoi te namah loh phuei. He tah BOEIPA kah olphong ni.

⁵⁹ Ka Boeipa Yahovah loh he ni a thui. Paipi phae ham olcaeng na sawtsit dongah na saii bangla nang te kan saii rhoe kan saii ni. ⁶⁰ Tedae na camoe tue vaengkah nang taengkah ka paipi te ka poek vetih nang ham kumhal kah paipi ka thoh ni.

⁶¹ Te vaengah na longpuei te na poek vetih na hmaithae bitni. Na tanu namah lakah aka ham te na doe vaengah nang lakah tanoe ni tanu la nang taengah kam paek siteo cakhaw na paipi

dongkah mahpawh. ⁶² Ka paipi te nang taengah ka thoh vaengah BOEIPA kamah te nan ming bitni. ⁶³ Te daengah ni na poek vaengah na yak vetih na ka a ah la koep a om pawt eh. Na mingthae hman ah khaw na saii boeih dongah nang ham kan dawth coeng. He tah ka Boeipa Yahovah kah olphong ni, ' ti nah," a ti.

17

Thahum Thuidoeknah

¹ BOEIPA ol he kai taengla ha pawk tih,
² "Hlang capa, Israel imkhui te olkael neh voek lamtah thuidoeknah neh thuidoek lah. ³ Te vaengah ka Boeipa Yahovah loh he ni a thui. Atha len rhoe len tih a phae mul khaw sai. A dii te khaw rhaekva bangla phung. Lebanon la a pawk vaengah lamphai thingsoi ah cu.

⁴ A thingsam soi te a hlaek tih Kanaan kho la a khuen. Te phoeiah thenpom khopuei ah a ten.

⁵ Khohmuen cangti te khaw a loh tih cangti khohmuen ah a tuh. Tairhi te a loh tih tui taengah khawk a sut.

⁶ A duei vaengah misur bangla om tih a sang khaw a toem la cawn. A hlaeng khaw amah taengla ngoi tih a dang ah a yung om van. Te dongah misur bangla om tih amah a saii neh thingsam la cawn.

⁷ Tedae atha pakhat tah a phae a len, len neh om tih a dii khaw phung. Te vaengah misur te anih taengla a yung a hlak tih canglak kah a thingling te suep ham a hlaeng anih taengla a voeih.

⁸ A hlaeng saii ham neh a thaih thaih sak ham, misur bangla a bu om sak ham khohmuen then neh tui taengah muep a phung.

⁹ Ka Boeipa Yahovah loh he ni a thui. Thaihtak ni ti nah. A yung pat vetih a thaih khaw hul mahpawt nim? A dawn thingsuep te boeih a rhae akhaw rhae mai veh. A yung lamloh a kuel ham khaw pilnam a yet neh bantha a len a kuek moenih.

¹⁰ A phung dae thaihtak aya he? Anih te khothoeng yilh loh a yawn vaengah rhae rhoe rhae vetih canglak kah a thingdawn pataeng rhae mahpawt nim?" a ti.

¹¹ BOEIPA ol te kai taengla koep ha pawk tih, ¹² Boekoek imkhui te thui pah laeh. He tla a thui he na ming pawt nim? Babylon manghai loh Jerusalem a paan tih a manghai neh a mangpa rhoek khaw a khuen coeng ke. Amih te a taengah Babylon la a khuen coeng. ¹³ Mangpa tiingan lamkah te a khuen tih a taengah paipi a saii pah. Anih te olcaeng hmuiah kun tih khohmuen thingnu te a loh. ¹⁴ Tlarhoel ram la om sak tih soekloek pawt ham, a paipi ngaithuen ham neh thoh sak ham a saii. ¹⁵ Amah ham marhang neh pilnam muep dang ham Egypt la puencawn a tueih neh anih te a tloelh dae thaihtak aya? Te te aka saii te loeih aya? Paipi aka phae khaw loeih aya?

¹⁶ Kai tah hingnah ni tite ka Boeipa Yahovah kah olphong ni. Manghai khohmuen ah anih te ka manghai sak. A olcaeng a sit tih a

taengkah a paipi te a phae dongah Babylon lakli ah duek saeh. ¹⁷ Caemtloek vaengkah tanglung lun ham neh hinglu muep aka phae la buep a khoeng vaengah Pharaoh loh anih a saii te tatthai tanglue, pilnu hlangping nen moenih. ¹⁸ Paipi phae ham olcaeng a hnoel van dongah a kut duen cakhaw a cungkuem a saii he loeih mahpawh ne.

¹⁹ Te dongah ka Boeipa Yahovah loh he ni a thui. Kai he hingnah pawt bangla ka olcaeng a sit tih ka paipi aka hnalval te amah lu ah ni ka thoeng sak eh. ²⁰ Anih te ka lawk ka tung pah vetih ka rhalvong dongah man ni. Anih te Babylon la ka khuen vetih a boekoeknah neh kai taengah boe a koek te anih soah lai ka tloek ni. ²¹ A hlangyong, a hlangyong boeih tah a caembong boeih khaw cunghang dongah cungku uh vetih aka sueng rhoek te khohli cungkuem taengla a thaek uh ni. Te vaengah BOEIPA kamah loh ka thui te na ming bitni.

²² Ka Boeipa Yahovah loh he ni a thui. Kai loh lamphai thingsang thingsoi lamkah ka loh vetih thingsam lamkah ka phung ni. A dawn mongkawt te ka hlaek vetih tlang sang palek ah ka phung ni.

²³ Israel tlang sang ah ka phung vaengah a hlaeng cawn vetih a thaih thai ni. Te vaengah aka khuet lamphai la om vetih a soah vaa cungkuem loh kho a sak. A hlaeng hlipkhup kah a hmoi tomah om uh ni.

²⁴ Te vaengah khohmuen kah thing boeih loh BOEIPA kamah he m'ming uh ni. Thing sang te ka

kunyun sak tih, thing toem te ka sang sak. Thing a thingsup khaw ka koh sak tih thing koh khaw ka saihnim sak. Kai BOEIPA loh ka thui bangla ka saii ni.

18

Mah Tholh Mah Hut

¹ BOEIPA ol he kai taengla ha pawk tih, ² "Nangmih te mebang nim? Israel khohmuen ham tah he thuidoeknah na thuidoek uh. 'Pa rhoek loh thaihkanh a caak uh tih, ca rhoek kah a no yaa,' na ti uh. ³ Kai tah hingnah ni tite, ka Boeipa Yahovah kah olphong ni. He thuidoeknah neh na thuidoek he nangmih Israel khuiah om voel mahpawh. ⁴ Hinglu boeih te kamah taengkah ni he. A napa kah hinglu khaw ka taengah tah capa kah hinglu bangla om boeiloeih. Aka tholh tah amah hinglu ni a duek eh.

⁵ Hlang he a dueng la a om atah tiktannah neh duengnah ni a saii. ⁶ Tlang ah ca pawt tih Israel imkhui kah mueirhol te a mik huel thil pawh. A hui yuu te poeih pawt tih pumom nu taengah mop pawh. ⁷ Hlang te laibakung kah hnohol vuelvaek pawt tih a huenkoe te a mael tih a rhawth pawt atah, a buh te bungpong taengah a paek tih pumtling te himbai a khuk atah, ⁸ A casai la pae pawt tih dumlai lamloh a puehkan la a loh pawt atah. A kut a poem tih hlang neh hlang laklo ah oltak la tiktannah a saii atah, ⁹ Ka khosing dongah pongpa tih ka laitloeknah he vai ham a dueng la oltak a ngaithuen atah hing rhoe

hing ni. He tah ka Boeipa Yahovah kah olphong ni.

¹⁰ Thii aka hawk dingca loh ca a sak mai tih anunae te khuikah pakhat lamloh a saii khaming. ¹¹ Te boeih te anih loh saii pawt cakhaw tlang ah a caak tih a hui yuu te a poeih atah, ¹² A huenkoe neh mangdaeng khodaeng a vuelvaek tih hnohol a rhawth pah khaw mael pawh. A mik te mueirhol taengla a huel tih tueilaehkoi te a saii. ¹³ A casai la a paek tih a puehkan a loh dongah hing rhoe hing mahpawh. Tueilaehkoi cungkuem he a saii dongah duek rhoe duek vetih a thii te amah soah tla ni.

¹⁴ Tedae a ca sak loh a napa kah tholhnah cungkuem a saii te a hmuh ne. A hmuh dae amih bangla a saii moenih. ¹⁵ Tlang ah ca pawt tih Israel im kah mueirhol te a mik huel thil pawh, a hui yuu te poeih pah pawh. ¹⁶ Hlang te vuelvaek pawt tih hnohol te laikoi sak pawh, a huenkoe neh hlang rheth pawh. A buh te bungpong taengla a paek tih pumtling te himbai a khuk. ¹⁷ Mangdaeng taengah a kut a poem tih a casai neh a puehkan la lo pawh. Ka laitloeknah te a vai tih ka khosing dongah pongpa. Anih tah a napa kah thaesainah dongah te duek pawt vetih hing rhoe hing ni.

¹⁸ A napa khaw hnaemtaeknah neh a hnaemtaek tih a manuca kah kutkho a rhawth, a pilnam lakli ah, a then a saii pawt te amah kah thaesainah dongah ni a duek van eh ne. ¹⁹ Tedae, "Balae tih pa kah thaesainah te capa loh a phueih pawh," na ti uh. Ca khaw tiktamnah neh duengnah a saii phoeiah ka khosing boeih

te a ngaithuen tih a vai atah hing rhoe hing ni.
²⁰ Amah tholh ah ni a hinglu a duek eh. Pa kah thaesainah te capa loh phuei pawt vetih capa kah thaesainah te pa loh phuei mahpawh. Aka dueng tah a taengah duengnah om vetih halang, halang tah a taengah halangnah ni a om eh.

²¹ Halang khaw tholhnah a saii dae a tholhnah cungkuem lamloh mael tih ka khosing te boeih a vai, tiktamnah neh duengnah te a saii atah hing rhoe hing vetih duek mahpawh. ²² A boekoeknah cungkuem a saii te amih soah poek uh mahpawh. Amah kah duengnah a saii dongah hing ni. ²³ Halang kah dueknah te ka ngaih khaw ka ngaih aya? He tah ka Boeipa Yahovah kah olphong ni. A longpuei lamloh a mael lalah khaw hing aya? ²⁴ Tedae aka dueng khaw a duengnah lamloh mael tih halang loh tueilaehkoi boeih a saii bangla dumlai saii koinih boekoeknah la boe a koek dongah a hing vaengah a duengnah neh duengnah cungkuem a saii khaw a saii la poek uh mahpawh. Amah kah tholhnah a saii dongah amah ni a duek eh. ²⁵ Te pataeng, 'BOEIPA kah longpuei he tiktam pawh,' na ti. Israel imkhui hnatun laeh na ti uh. Ka longpuei he a tiktam moenih a? A tiktam pawt te nangmih kah longpuei moenih a? ²⁶ Aka dueng te a duengnah lamloh mael tih dumlai saii koinih te rhoek dongah amah ni aka duek eh. Amah kah dumlai a saii dongah amah duek ni. ²⁷ Tedae halang khaw a halangnah a saii lamloh mael tih tiktamnah neh duengnah saii koinih a hinglu te hing ni. ²⁸ A hmuh tih a boekoeknah cungkuem a

saii lamloh a mael la a mael atah hing rhoe hing vetih duek mahpawh. ²⁹ Tedae Israel imkhui loh, “Ka Boeipa kah longpuei tiktam pawh,” a ti. Israel imkhui a tiktam pawt te kai longpuei e? Aka tiktam pawt te nangmih kah longpuei moenih a?

³⁰ Te dongah hlang he a longpuei banglam ni Israel imkhui nangmih te lai kan tloek eh. He tah ka Boeipa Yahovah olphong ni. Yut uh lamtah na boekoek cungkuem lamloh mael uh laeh. Te daengah ni nangmih ham thaesainah hmuitoel la a om pawt eh. ³¹ Nangmih kah boekoeknah cungkuem neh boe na koek uh te nangmih taeng lamloh voei uh. Lungbuei thai neh mueihla thai mah namamih ham sai uh. Balae tih Israel imkhui loh na duek uh eh? ³² Dueknah neh a duek te ka ngaih moenih. He tah ka Boeipa Yahovah kah olphong ni. Te dongah yut uh lamtah hing uh laeh,” a ti.

19

Israel Khosoek Rhoek Ham Rhahlung

¹ Israel phoeiah khoboei rhoek ham na rhahlung phueih pah laeh.

² ‘Sathueng lakli kah sathuengnu na nu te thui pah.

Sathuengca lakli ah kol tih a ca khaw ping.

³ A ca lamkah pakhat te rhoeng tih, sathuengca la a om hatah

maeh ngaeh ham a cang tih hlang a hnom.

⁴ Anih te namtom loh a yaak tih a vaam khuiah a tuuk uh.

- Te phoeiah thisum neh Egypt khohmuen la
a pawk puei uh.
- ⁵ A ngaiuep bangla a hmuh vaengah
a ngaiuepnah bing coeng dae a ca pakhat te
a loh tih sathuengca la a khueh.
- ⁶ Te vaengah sathueng lakli ah
aka pongpa sathuengca la a om dongah,
maeh ngaeh ham a cang tih hlang a hnom.
- ⁷ Amah kah lohnong te
a ming vaengah a khopuei a khah pah tih,
a kawknah ol dongah
khohmuen khaw a pum la a rhawp sak.
- ⁸ Te vaengah a kaepvai paeng lamkah
namtom rhoek te anih taengah mop.
Anih ham a lawk a tung uh tih
a vaam khuiah a tuuk uh.
- ⁹ Thisum neh soi khuila a khueh uh tih
Babylon manghai taengla
a khuen uh phoeiah rhalvong khuiah a
khueh uh.
Te daengah ni a ol te Israel tlang ah a yaak
uh voel pawh.
- ¹⁰ Na nu te misur bangla
nang thii neh tui taengah a phung.
Tui a yet dongah pungtai tih bu.
- ¹¹ A hlaeng te aka taemrhai kah mancai ham a
rhill om.
A sang khaw a bu laklo ah sang tih
a sang neh a hlaeng a khawk khaw a tueng
pah.
- ¹² Tedae kosi ah a phuk tih diklai la a voeih.
Khothoeng yilh ah a thaih rhae tih rhul.

A rhilh conghol khaw rhae tih hmai loh a hlawp.

¹³ Te dongah rhamrhae neh tuihalh khohmuen kah khosoek ah a phung coeng.

¹⁴ A hlaeng amah lamloh hmai puek tih a thaih a hlawp pah. Te dongah aka taemrhai ham mancai la caitueng a rhilh om pah pawh.

He rhahlung khaw rhahlung la om coeng.

20

Israel Boekoek

¹ A kum rhih dongkah a hla nga nah hnin rha dongah a pha vaengah Israel a hamca khuikah hlang rhoek tah BOEIPA dawt ham ha pawk uh tih ka mikhmuh ah ngol uh. ² Te vaengah BOEIPA ol tah kai taengah ha pawk tih, ³ “Hlang capa Israel a hamca rhoek te thui pah. Ka Boeipa Yahovah loh a thui he amih taengah thui pah. Kai dawt ham na pawk nama? Kai hingnah he nangmih ham kan dawt sak mahpawh. He tah ka Boeipa Yahovah kah olphong ni.

⁴ “Amih te lai na tloek aya? Hlang capa aw lai na tloek aya? A napa rhoek kah tueilaehkoi te amih ming sak. ⁵ Ka Boeipa Yahovah loh a thui he amih taengah thui pah. Israel ham ka coelh khohnin ah Jakob imkhui kah a tiingan te ka kut ka phuel. Egypt khohmuen ah amih te ka ming sak coeng. Te vaengah amih taengah ka kut ka

phuel tih, ‘Kai tah BOEIPA na Pathen ni,” ka ti nah.

⁶ Te khohnin ah Egypt khohmuen lamloh amih doek ham amih te ka kut ka phuel pah. Suktui neh khoitui aka long khohmuen neh khohmuen pum kah a kirhang khaw amih ham ka yaam pah. ⁷ Te dongah amih te thui pah. Hlang he a mik kah sarhingkoi te voei saeh lamtah Egypt mueirhol neh poeih uh boel saeh. Kai tah nangmih kah BOEIPA Pathen ni.

⁸ Tedae kai he n'koek uh tih kai taengkah he hnaton ham a huem uh moenih. Hlang he a mik kah sarhingkoi te voei pawt tih Egypt mueirhol te a hnoo uh moenih. Te dongah ni amih soah ka kosi hawk ham neh Egypt khohmuen khui kah amih taengah ka thintoek sah ham ka thui.

⁹ Tedae ka ming ham ka saii dongah namtom mikhmuh ah ka poeih sak pawh. Te rhoek lakli ah khaw amih ham tah amamih mikhmuh ah ka phoe pah tih Egypt khohmuen lamloh amih kang khuen.

¹⁰ Te vaengah amih te Egypt khohmuen lamloh ka khuen uh tih amih te khosoek la ka thak.

¹¹ Amih taengah ka khosing ka paek tih ka laitloeknah te amih ka ming sak. Te te aka vai hlang daeng ni te nen te a hing eh. ¹² Ka Sabbath te khaw kamah laklo neh amih laklo ah miknoek la om ham neh, BOEIPA kamah loh amih ka ciim te ming sak ham amih taengah ka paek.

¹³ Tedae Israel imkhui loh khosoek ah kai he n'koek uh. Ka khosing dongah pongpa uh pawt tih ka laitloeknah he a hnawt uh. Te te aka

vai hlang tah te nen te hing ni. Ka Sabbath he poeng a poeih uh. Te dongah ni ka kosi he amih soah hawk ham neh khosoek ah amih khah ham ka thui. ¹⁴ Tedae ka ming ham ka saii dongah ni namtom mikhmuh ah a poeih pawh. Te rhoek mikhmuh lamloh amih te ka khuen. ¹⁵ Te phoeiah khohmuen khuila amih a kun pawt ham khosoek ah amih te ka kut ka phuel thil van. Khohmuen tom kah a kirhang neh suktui khoitui aka long te ka paek dae ta. ¹⁶ Ka laitloeknah te a hnawt uh tih ka khosing dongah pongpa uh pawh. A lungbuei te a mueirhol hnuk a vai sak uh dongah ka Sabbath te a poeih uh. ¹⁷ Tedae amih a poci lamloh amih te ka mik loh a rhen tih amih te khosoek kah a bawtnah ah ka khueh pawh.

¹⁸ A ca rhoek te khosoek ah, 'Na pa rhoek kah oltueh dongah pongpa uh boel lamtah amih kah laitloeknah te ngaithuen uh boeh. Amih kah mueirhol nen khaw poeih uh boeh. ¹⁹ Kai BOEIPA na Pathen kah ka khosing dongah pongpa uh. Ka laitloeknah he ngaithuen lamtah te te vai uh. ²⁰ Te dongah ka Sabbath he ciim lamtah kai laklo neh nangmih laklo ah miknoek la om saeh. Kai tah nangmih kah BOEIPA na Pathen la nan ming uh ham om.

²¹ Tedae a ca rhoek loh kai he n'koek uh tih ka khosing dongah pongpa uh pawh. Ka laitloeknah te vai ham ngaithuen uh pawh. Te te aka vai hlang tah te nen te hing van ni. Ka Sabbath te a poeih uh. Te dongah ni amih soah ka kosi hawk ham neh amih te khosoek ah ka

thintoek sah thil ham ka thui. ²² Tedae ka kut he ka yueh tih ka ming ham ka sai dongah namtom mikhmuh ah poeih uh pawh. Amih te te rhoek mikhmuh lamloh ka khuen. ²³ Namtom taengah amih taekyak ham neh diklai ah amih haeh ham khosoek ah amih te ka kut ka phuel thil bal. ²⁴ Ka laitloeknah he vai uh pawt tih ka khosing te a hnawt uh. Ka Sabbath he a poeih uh tih amih mik loh a napa rhoek kah mueirhol hnukah a khueh uh. ²⁵ Kai khaw amih taengah otlueh ka paek dae then uh pawt tih tiktamnah neh hing uh pawh. ²⁶ A bung kah cacuek boeih te a doe vaengah amih kah kutdoh lamloh amamih te ka poeih sak. Amih te ka pong sak daengah ni BOEIPA kamah te m'ming uh eh. ²⁷ Te dongah hlang capa aw Israel imkhui te voek. Ka Boeipa Yahovah loh a thui he amih taengah thui pah. Kai he na pa rhoek loh n'hliphen uh tih boekoeknah la kai taengah boe a koek uh. ²⁸ Amih te paek ham ka kut ka phuel thil khohmuen khuila amih te ka khuen. Te vaengah a sang la a hmuh som boeih neh thing bu boeih taengah amih kah hmueih te pahoi a ngawn uh. Tedae amih konoinah te nawnnah la hnap a paek uh tih a hmuehmuei botui te hnap a khueh uh daengah amih kah tuisi te a doeng uh. ²⁹ Te dongah amih te, "Balae hmuensang la na mop thil uh te," ka ti nah.

Tedae a ming te tahae khohnin due Bamah la a khue.

³⁰ Te dongah ka Boeipa Yahovah loh a thui he Israel imkhui te thui pah. Na pa longpuei ah

na poeih uh tih amih kah sarhingkoi hnukah na cukhalh uh nama? ³¹ Nangmih kah hmai te na ca rhoek paan sak ham na kutdoe na tloeng uh tih mueirhol cungkuem neh tihnin due na poeih uh. Israel imkhui nangmih long nim kai na dawt eh? Nangmih te kan dawt sak mahpawh. Kai hingnah ni tite ka Boeipa Yahovah kah olphong ni.

Israel kah Thohkoepnah

³² Thing neh lungto bawk ham namtom neh diklai huiko bangla om sih tila nangmih te na lungbuei ah kun cakhaw om rhoe om mahpawh. ³³ Kai tah hingnah ni tite ka Boeipa Yahovah kah olphong ni. Tlunglueu kut neh ban ka thueng tih kosi ka hawk neh nangmih kan manghai thil het mahpawt nim? ³⁴ Nangmih te pilnam lamloh kang khuen vetih diklai lamloh nangmih te kan coi ni. Amih lakli ah tlunglueu kut neh n'taekyak tih bantha a thueng phoeiah ni kosi neh ka hawk thil. ³⁵ Pilnam kah khosoek la nangmih te kang khuen vetih nangmih te na maelhmai, maelhmai ah lai kan tloek ni. ³⁶ Egypt khohmuen kah khosoek ah na pa rhoek lai ka tloek thil bangla nangmih soah lai ka tloek ni. He tah Boeipa Yahovah kah olphong ni. ³⁷ Nangmih te mancai hmuiah kam pah sak vetih paipi kah pinnah khuila nangmih kam pawk puei ni. ³⁸ Kai aka tloelh tih boe aka koek thil te nangmih lamloh ka kuet ni. A lampahnah khohmuen lamloh amih ka khuen cakhaw Israel khohmuen la kun mahpawh. Te vaengah BOEIPA kamah he nan ming uh bitni.

39 Te dongah nangmih Israel imkhui ham ka Boeipa Yahovah loh he ni a thui. Hlang te a mueirhol paan saeh lamtah thothueng ngawn saeh. Tedae a hnukah kai ol na hnatun uh ngawn mahpawh. Te cakhaw ka ming cim he na kutdoe neh, na mueirhol neh koep na poeih uh mahpawh. 40 He tah ka Boeipa Yahovah kah olphong ni. Israel tlang sang kah ka tlang cim dongah diklai tom kah Israel imkhui tom loh kai m'bawk uh ni. Teah te amih ka doe vetih nangmih kah khosaa neh nangmih buham thaihcuek khaw, nangmih kah hnocim boeih te khaw ka toem ni. 41 Nangmih te hmuehmuei botui la kan moeithen vaengah tah nangmih te pilnam rhoek lamloh kang khuen tih nangmih te diklai lamloh kan coi. Amih taengah n'taekyak cakhaw namtom mikhmuh kah nangmih lakli ah ka ciim uh bitni. 42 Israel khohmuen khuila nangmih kam pawk puei vaengah BOEIPA kamah te nan ming uh bitni. Te khohmuen te ni na pa rhoek taengah paek ham ka kut ka phuel thil. 43 Te vaengah na longpuei neh na khoboe rhamlang boeih te pahoi na poek uh bitni. Te loh m'poeih uh dongah nangmih kah boethae cungkuem na saii uh te khaw nangmih maelhmai te na ko-oek uh ni. 44 Aka poci Israel imkhui aw nangmih kah boethae longpuei tarhing ah pawt tih na khoboe rhamlang bangla ka ming ham nangmih kan saii vaengah BOEIPA kamah te nan ming uh bitni. He tah Boeipa Yahovah kah olphong ni," a ti.

Tuithim kah Hmai

45 Te phoeiah BOEIPA ol te kai taengah ha pawk tih, 46 "Hlang capa aw, na maelhmai tuithim

longpuei la mael lah. Tuithim te saep lamtah tuithim khohmuen kah duup te tonghma thil lah. ⁴⁷ Tuithim duup te thui pah lamtah ka Boeipa Yahovah loh a thui BOEIPA ol he hnatun saeh. Nangmih taengah hmai ka hlup vetih nangmih kah thing a thingsup boeih neh thing koh boeih te a hlawp ni. Hmairhong hmaisai khaw thi pawt vetih tuithim lamloh tlangpuei duela maelhmai boeih te rhangto uh ni. ⁴⁸ BOEIPA kamah loh ka toih tih a thih pawt te pumsa loh boeih a hmuh uh ni,” a ti. ⁴⁹ Te dongah, “Ka Boeipa Yahovah aw amih loh kai he, ‘Anih te thuidoeknah neh aka thuidoek pawt nim?’ a ti uh,” ka ti.

21

BOEIPA kah Laitloeknah

¹ BOEIPA ol te kai taengla ha pawk tih, ² “Hlang capa, na maelhmai te Jerusalem la khueh lah. Te phoeiah rhokso te cip thil lamtah Israel khohmuen te tonghma thil laeh. ³ Te vaengah Israel khohmuen te thui pah. BOEIPA loh he ni a thui. Kai loh ka cunghang a capang lamloh nang kam bong thil vetih nang lamkah aka dueng neh aka halang khaw ka saii pawn ni. ⁴ Ka cunghang he a capang lamloh thoeng tangoeng vetih nang lamkah pumsa hlang boeih tah aka dueng khaw, aka halang khaw tuithim lamloh tlangpuei due ka saii ni. ⁵ Te vaengah kai BOEIPA loh ka cunghang a capang lamloh ka bong phoeiah koep ka sang pawt te pumsa hlang boeih loh a ming uh ni.

⁶ Te dongah hlang capa nang te cinghen a khaemnah hil huei lamtah hmuetphawt neh

amih mikhmuh ah huei pah. ⁷ Nang te, 'Balae tih na huei,' a ti vaengah, 'Olthang ha pawk dongah ni,' ti nah.

Te vaengah lungbuei boeih paci vetih kut khaw boeih tahah ni. Mueihla boeih ueih vetih khuklu boeih tui la poeh ni. Ka Boeipa Yahovah kah olphong tah ha pawk tih om coeng ke," a ti.

⁸ BOEIPA ol tah kai taengah koep ha pawk tih, ⁹ "Hlang Capa aw tonghma lamtah thui laeh.

'Boeipa loh he ni a thui, cunghang te cunghang haat la huen laeh,' ti nah.

¹⁰ Rhaek la a om due a haat la a huen daengah ni maeh khaw a ngawn eh. Thing cunghang aka sit ka capa kah mancai te ngaingaih puei sih. ¹¹ Huen ham neh a kut dongah pom ham a paek dongah cunghang haat coeng. Te dongah aka ngawn kut dongah paek ham a huen coeng.

¹² Hlang capa aw pang lamtah rhung laeh. Ka pilnam neh Israel khoboei boeih te a om thil coeng. Ka pilnam neh aka om khaw cunghang dongla a voeih coeng. Te dongah na hlit te tum laeh. ¹³ Loepdak ngawn cakhaw mancai te sawsit koinih ta? om khueng mahpawh. He tah ka Boeipa Yahovah kah olphong ni.

¹⁴ Te dongah hlang capa nang tonghma lamtah kut neh kut ngawn laeh. Cunghang khaw a pathum la rhaep laeh. Amih te aka ngawn kah cunghang soah aka ngawn cunghang loh vael khungdaeng saeh.

¹⁵ Te daengah ni lungbuei paci vetih a vongka tom ah hmuioel khaw a suplup eh. Anunae

Maeh sah ham khopha bangla a saii tih a hnut cunghang hmui kang khueh coeng.

¹⁶ Saih lamtah bantang phai, melam khaw na maelhmai te banvoei la khueh lamtah tuentah uh.

¹⁷ Kai khaw ka kut neh ka kut te ka ngawn daengah ni ka kosi ka hlam eh. He tah BOEIPA kamah long ni ka thui," a ti.

¹⁸ Te phoeiah BOEIPA ol te kai taengla ha pawk tih, ¹⁹ "Nang hlang capa aw Babylon manghai kah cunghang ha pawk ham longpuei rhoi te namah loh khueh laeh. Khohmuen pakhat lamloh ha thoeng rhoi saeh lamtah khopuei longpuei longcui ah kutngo suen la suen saeh.

²⁰ cunghang ha pawk ham longpuei te Ammon koca Rabbah taengah khaw, Judah taeng neh Jerusalem vong cak taengah khaw khueh pah.

²¹ Babylon manghai te longpuei caehtung kah longpuei lu rhoi ah bihma bi sak ham om ni. Te vaengah thaltang dongah a tap phoeiah sithui te a dawt vetih a thin duela a hmuh ni. ²² Tedae bihma tah Jerusalem te maehdoelh la khueh ham, ngawnkung taengah a ka ang sak ham, tamlung ol huel ham, vongka ah maehdoelh khueh ham, tanglung lun ham neh buep khoeng ham a bantang la a om pah ni. ²³ Tedae amih taengah a bi khaw, amih mikhmuh ah a poeyoek la a bi bangla om ni. Amih taengah ohlo neh aka toemngam khaw thaesainah tuuk pah ham aka poek ni te.

²⁴ Te dongah ka Boeipa Yahovah loh he ni a thui. Nangmih te namamih kah thaesainah poek sak ham, na boekoeknah hliphen ham,

na tholhnah phoe ham, nangmih kah khoboe rhamlang boeih dongah nangmih thoelh ham a kut neh n'tuuk uh ni.

²⁵ Nang Israel khoboei hlang rhong neh halang aw, thaesainah a bawtnah tue kah a khohnin ha pawk coeng. ²⁶ Ka Boeipa Yahovah loh he ni a thui. Lupong te pit lamtah rhuisam khaw dul laeh. Te tlam moenih. Aka toem he sang tih aka sang te a kunyun sak. ²⁷ Paletnah, paletnah, paletnah te ka khueh ni. Laitloeknah te anih taengla a pawk due he khaw om pawt vetih anih te ka paek ni.

²⁸ Nang hlang capa tonghma lamtah thui pah. Ka Boeipa Yahovah loh a thui he Ammon koca neh amih kokhahnah kawng ni. Te dongah, "cunghang, cunghang te phong lamtah rhaek bangla maeh hlap ham huen laeh.

²⁹ Nang ham te a poeyoek la a hmuh tih nang te laithae neh halang rhok kah a rhawn ah voeih ham ni nang te m'bi. Thaesainah a bawtnah tue kah a khohnin ha pawk coeng.

³⁰ A capang khui la sang laeh. Na suen nah hmuen kah namah tuikong khohmuen ah nang te lai kan tloek ni.

³¹ Nang soah ka kosi ka hawk vetih ka thinpom hmai neh nang kan sat thil ni. Nang te kutthai kut al hlang rhoek kut ah kutcaihnah la kan tloeng ni.

³² Hmai ham te toihthing la na poeh vetih na thii te khohmuen khui ah om ni. BOEIPA kamah loh ka thui coeng dongah nang m'poek uh mahpawh," a ti.

22

Jerusalem kah Tholhnah Dumlai

¹ BOEIPA ol te kai taengla ha pawk tih, ² “Nang hlang capa aw, lai na tloek aya? Thii aka long khopuei te lai na tloek aya? Anih te a tueilaehkoi boeih ming sak. ³ Ka Boeipa Yahovah loh a thui he thui pah. Khopuei loh amah tue pai sak ham a laklung ah thii a long sak tih amah aka poeih ham mueirhol a sai. ⁴ Na thii na hawk te na boe tih na mueirhol na sai long te m'poeih. Na khohnin ha tawn uh tih na kum te ha pawk coeng. Te dongah nang te namtom kah kokhahnah neh diklai pum kah soehsalkoi la kang khueh coeng. ⁵ Nang lamkah a yoei neh a hla loh nang te n'soehsal uh vetih, rhalawt ming dongah soekloeknah bae ni.

⁶ Israel khoboei rhoek aih ke, a bantha neh na khuiah thii hawk ham hlang om coeng. ⁷ Manu napa te a vapsa tak uh tih na khuikah yinlai te hnaemtaeknah neh a sai uh. Na khui kah cadah neh nuhmai te namah khui ah na vuelvaek uh. ⁸ Kai kah a cim te na hnaep uh tih ka Sabbath te na poeih uh. ⁹ Thii hawk sak ham te na khuiah caemtuh hlang rhoek om uh. Na khuikah loh tlang ah a caak tih na khui ah khonuen rhamtat a sai uh. ¹⁰ Pa kah a yah te na khuiah a poelyoe tih pumom kah a rhalawt neh na khuiah phaep uh. ¹¹ Hlang he a hui yuu taengah tueilaehkoi a sai tih hlang he amah langa khaw khonuen rhamtat la a poeih. Hlang he a napa canu, amah

22:7 Sng 20.12; Olr 5.16; Sng 22.21,22; Olr 24.17 **22:8** Tho 19.30; 26.2 **22:10** Tho 18.7-20

ngannu khaw na khuiah a phaep. ¹² A casai thii long sak ham na khuiah kapbaih a loh uh. A puehkan la na loh tih hnaemtaeknah neh na hui te na mueluem dongah kai he nan hnilh. He tah Ka Boeipa Yahovah kah olphong ni.

¹³ Te dongah na mueluemnah la na saii tih na khui ah na thii a om te ka kut ka paeng pawn ni he. ¹⁴ Na lungbuei om cakhaw na kut a moem uh venim? Te khohnin ah kai loh nang te kan saii ni. Kai BOEIPA loh ka thui he ka saii ni. ¹⁵ Nang te namtom taengah kan taek kan yak vetih diklai ah nang kan haeh ni. Te vaengah nang kah a tihnai te nang lamloh ka boeih sak ni. ¹⁶ Nang te namtom mikhmuh ah m'poeih uh vaengah BOEIPA kamah te nan ming bitni," a ti.

Jerusalem kah BOEIPA Kosi

¹⁷ BOEIPA ol te kai taengla koep ha pawk ol tih, ¹⁸ "Hlang capa aw, Israel imkhui he a pum la kai taengah aek khuikah aek la poeh uh coeng. Rhohum neh samphae khaw, thicung neh kawnlawk khaw hmai-ulh khui ah cak aek la poeh coeng. ¹⁹ Te dongah ka Boeipa Yahovah loh he ni a thui. Nangmih te aek la boeih poeh sak ham ni kai loh nangmih te Jerusalem khui la kan coi tangloeng ne. ²⁰ Cak neh rhohum, thi neh kawnlawk neh samphae te hmai-ulh khui la hmuh tih hmai dongah tlae hamla coinah om. Ka thintoek ah kan coi tih ka kosi neh kan tloeng vaengah na tlae uh bitni. ²¹ Nangmih te kan calui tih ka thinpom hmai neh nang kang ueng thil vaengah a khui ah na tlae bitni. ²² Hmai-ulh

khui kah cak tlae bangla a khui ah na tlae van ni. Te vaengah BOEIPA kamah loh nangmih soah ka kosi ka hawc te na ming ni," a ti.

Khohmuen kah Dumlai

²³ BOEIPA ol kai taengah ha pawk tih, ²⁴ "Hlang capa aw, a taengah thui pah. Khohmuen nang te n'caihcil pawt pai tih kosi khohnin ah khotlan tal. ²⁵ A khui ah a tonghma rhoek kah lairhui khaw maeh aka baeh sathueng kah a kawc bangla om. Hinglu neh khohrhing a yoop tih nuhmai kah umponah aka rheth khaw a khui ah a ping sak uh. ²⁶ A khosoih rhoek loh ka olkhueng a poe tih ka hmuencim a poeih uh. Cimcaihnah neh rhongingnah te paekboe uh pawh. Rhalawt khaw, a cuemcaih khaw ming sak uh pawh. Ka Sabbath te a mik a him thil uh tih amih khui ah kai m'poeih.

²⁷ A khui kah a mangpa rhoek khaw maeh aka nget uithang bangla thii aka hawc ham neh hinglu aka ngawn ham mueluemnah dongah mueluem uh. ²⁸ A tonghma rhoek loh amamih ham a rhorhap te a bol uh. Amamih ham a poeyoek la a hmuh uh. Hlang aka bi loh BOEIPA loh a thui pawt khaw ka Boeipa Yahovah kah a thui he laithae ni a ti uh. ²⁹ Khohmuen kah pilnam te hnaemtaeknah neh a hnaemtaek uh tih huencannah neh a reth uh. Mangdaeng neh khodaeng a vuelvaek uh tih yinlai a hnaemtaek uh dongah tiktamnah om pawh. ³⁰ Vongtung biing tih khohmuen phae pawt ham a yueng la ka mikhmuh kah a puut ah aka pai hlang khaw

amih lakli ah ka tlap dae ka hmu pawh. ³¹ Te dongah ka kosi he amih soah ka hawk vetih ka thinpom hmai neh amih ka khah ni. Amih kah longpuei te amamih lu dongah ka thoeng sak ni. He tah ka Boeipa Yahovah kah olphong ni," a ti.

23

Hlangrhong Nu Boeina

¹ BOEIPA ol te kai taengla ha pawk tih, ² "Hlang capa aw, manu pakhat kah a canu huta panit om. ³ Tedae a camoe lamloh pahoi cukhalh rhoi tih Egypt ah cukhalh rhoi. A rhangsuk te a duep rhoi tih a cuemnah sukbam te hnap a saii. ⁴ A ming ah a ham te Oholah tih a mana te Oholibah ni. Ka taengah a om rhoi hatah canu capa a sak rhoi tih a ming ah Samaria Oholah neh Jerusalem Oholibah la om.

⁵ Oholah he kai hmanah cukhalh tih a lungnah khoyoei Assyria taengah pumben coeng. ⁶ Rhalboei rhoek kah pueinak thim neh, ukkung tongpang naidoeh rhoek, amih marhang dongah aka ngol khaw marhang caem boeih ni. ⁷ Amih taengkah a cukhalhnah te amih Assyria koca kah hlangrhoeh boeih taengah a paek uh tih amih kah mueirhol cungkuem neh aka pumben boeih taengah poeih uh. ⁸ Egypt lamkah a cukhalhnah te toeng pawt tih a camoe pueng ah anih te a ih puei uh. Amih taengah a cuemnah sukbam te a saii tih a cukhalhnah te amah soah a hawk uh. ⁹ Te dongah anih te a lungnah kut a pumben Assyria ca rhoek kut ah ka paek. ¹⁰ Amih loh a capa rhoek neh a canu kah a yah te a poelyoe uh. A khuen uh tih anih te cunghang neh a

ngawn uh. Te dongah huta khuiah a ming om tih tholhphu te anih soah a suk uh.

¹¹ A mana Oholibah loh a hmuh vaengah a cuknah dongah poci ngai tih a cukhalh-nah neh a maya kah pumyoihnah lakah nah.

¹² Assyria hlang rhoek neh pueinak aka soep ukkung hmaiben, amih boeih tongpang naidoeh, marhang dongah aka ngol marhang caem kah rhalboei te a pumben. ¹³ Te dongah longpuei pakhat ah a boktlap la a poeih uh te ka hmuh.

¹⁴ Tedae a cukhalhnah te a koei tih hlang a hmuh te pangbueng dongah a vuel. Khalden, Khalden kah mueihlip tah pangcik neh a tarhit pah. ¹⁵ A cinghen ah hailaem phaivaep neh a lu kah lupong khaw cawklawih. Amih boeilu boeih kah a mueimae he a pacaboaina khohmuen kah

Khalden Babylon ca phek ni. ¹⁶ A mik dongah a mueimae dongah amih te a pumben a pumben tih Khalden kah amih taengah puencawn te a tueih. ¹⁷ Te vaengah Babylon ca rhoek tah a taengkah a hlo thingkong dongla ha pawk tih anih te amih cukhalhnah neh a poeih uh. Amih loh a poeih daengah a hinglu te amih taeng lamloh a hoeng. ¹⁸ A cukhalhnah a poelyoe tih a yah a hliphen. Ka hinglu loh a maya a moeng bangla anih taeng lamloh ka hinglu a hoeng.

¹⁹ A camoe tue vaengah Egypt khohmuen ah a cukhalh thoelh ham nim te a cukhalhnah loh ping. ²⁰ A taengcaeh rhoek hnukah pumben. Amih saa tah laak saa tih amih yangtui tah marhang yangtui pawn ni. ²¹ Na camoe kah khonuen rhamtat te na hue vaengah na camoe kah rhangsuk neh na sukbam Egypt ah na duep.

²² Te dongah Oholibah aw, ka Boeipa Yahovah loh he ni a thui. Kai loh nang taengkah na lungnah te ka haeng coeng ne. Na hinglu loh amih te a moeng dae amih te a kaepvai lamloh nang taengla kang khuen ni. ²³ Babylon ca rhoek neh Pekod Khalden boeih khaw, Shoa neh Koa, amih taengkah Assyria koca boeih, rhalboei naidoeh tongpang neh amih boeilu ukkung boeih khaw marhang dongah aka ngol la boeih a khue uh. ²⁴ Nang taengah leng neh humhae cungpoel khaw, pilnam hlangping te photlinglen neh photlingca neh lumuek neh ha pawk uh vetih na kaepvai ah a khueh uh ni. Amih mikhmuh ah laitloeknah kang khueh vetih amih kah laitloeknah neh nang lai kan tloek ni. ²⁵ Ka thatlainah he nang taengah kam paek vetih nang te kosi neh n'saii uh ni. Na hnarhong neh na hna te han hlap uh vetih na hmailong ah cunghang loh a cungku sak ni. Na capa neh na canu a khuen uh vetih na hmailong ah hmai loh a hlawp uh ni. ²⁶ Nang te na himbai ham pit uh vetih na boeimang hnopai khaw han loh uh ni. ²⁷ Te vaengah nang lamkah na khonuen rhamtat neh Egypt khohmuen lamkah na thurha te ka kangkuen sak ni. Te daengah ni amih soah mik na huel pawt vetih Egypt khaw koep na poek pawt eh.

²⁸ Te dongah ka Boeipa Yahovah loh he ni a thui. Kai loh nang te rhoek kut ah kan tloeng coeng ne. Te rhoek kut te na hmuhuet tih na hinglu loh amih te a moeng dae ta. ²⁹ Hmuhuetnah neh nang te n'saii uh vetih na thaphu boeih han loh uh ni. Nang te pumtling neh yangyal

la n'hnoo uh vetih na yah neh pumyoihnah, na khonuen rhamtat neh na cukhalhnah a hliphen ni. ³⁰ Namtom hnukah na cukhalh tih amih kah mueirhol neh na poeih uh dongah ni te rhoek te nang soah a saii. ³¹ Na maya kah longpuei ah na pongpa dongah a boengloeng te nang kut ah kam paek ni.

³² Ka Boeipa Yahovah loh he ni a thui. Na maya boengloeng te ki na ok vaengah nueihcil la om mungkung vetih tamdaengnah te muep eal ni.

³³ Rhuihahnah neh kothae, na maya Samaria kah imsuep boengloeng neh khopong boengloeng na hah bitni.

³⁴ Te te na ok tih na caep phoeiah a paikaek te na cilh vetih na rhangsuk na phuet ni.

Ka Boeipa Yahovah kamah loh olphong ka thui coeng.

³⁵ Te dongah ka Boeipa Yahovah loh he ni a thui. Kai nan hnilh tih na nam la kai nan rhoe dongah namah loh namah kah khonuen rhamtat neh na cukhalhnah te khaw phuei laeh," a ti.

³⁶ Te phoeiah BOEIPA loh kai taengah, "Hlang capa aw, Oholah neh Oholibah te lai na tloek tih amih rhoi kah tueilaehkoi te amih rhoi taengah na thui aya? ³⁷ Samphaih uh tih a kut ah thii kap. A mueirhol neh samphaih uh tih kai ham a sak a ca rhoek pataeng amih taengah toihthing bangla a cum uh. ³⁸ Kai taengah a saii rhoi he khaw te khohnin ah ka rhokso ni a poeih rhoi tih ka Sabbath ni a poeih rhoi. ³⁹ Te vaengah a

ca rhoek te a mueirhol ham a ngawn uh tih te khohnin ah ka rhokso te poeih ham a kun thil uh. Te dongah ka im khui ah a saii uh tangkhuet he.

⁴⁰ Amih taengah puencawn la a tueih tih khohla bangsang lamloh aka pawk hlang ham pataeng khaw a tueih thil uh. Ha pawk uh vaengah tuihlu lamtah na mik duum ne. Te phoeiah cangen te oi ne. ⁴¹ Khuehtawn thingkong dongah na ngol tih a mikhmuh ah caboei a phaih. Kai kah bo-ul neh ka situi tah amah dongah na khueh van. ⁴² A kaepvai hlangping kah thayoeituipan ol neh bitun tongpa khuikah hlang khaw, khosoek lamkah yumii, yumii khaw hang khuen. Te vaengah a kut dongkah khungpak neh a lu dongah boeimang rhuisam a khuem uh. ⁴³ Te vaengah, 'Samphaihneh neh rhuem coeng tih anih ham tah a cukhalhnah dongah cukhalh la cukhalh laeh saeh,' ka ti. ⁴⁴ Pumyoi nu taengah aka kun bangla anih te a paan uh. Te dongah khonuen rhamtat nu Oholah taeng neh Oholibah taengla pawk uh tangkhuet. ⁴⁵ Tedae amih hlang dueng loh amih te samphaih laitloeknah neh thii hawk kah laitloeknah dongah lai a tloek uh ni. Amih te samphaih uh tih a kut ah thii kap.

⁴⁶ Ka Boeipa Yahovah loh he ni a thui. Amih te hlangping paan sak lamtah amih te ngaihuetnah neh maeh la pae. ⁴⁷ Amih te hlangping loh lungto neh dae saeh lamtah amih te a cunghang neh hum saeh. A ca tongpa rhoek neh a ca huta rhoek te a ngawn pah vetih a im te hmai neh a hoeh uh ni. ⁴⁸ Tedae khohmuen kah na khonuen rhamtat te ka paa sak daengah ni huta boeih te thuituen

uh vetih nangmih kah khonuen rhamtat bangla a saii uh pawt eh. ⁴⁹ Nangmih kah khonuen rhamtat te namamih soah han tloeng vetih na mueirhol tholhnah khaw na phueih ni. Te vaengah ka Boeipa Yahovah kamah he nan ming uh bitni.

24

Am Tlawk Thuidoeknah

¹ A kum ko neh hla rha kah hlasae hnin rha dongah kai taengla BOEIPA ol ha pawk tih,
² “Hlang loh capa aw, tahae khohnin kuelhuelh kah khohnin ming he namah ham daek rhoe daek laeh. Tahae khohnin kuelhuelh ah Babylon manghai loh Jerusalem a dum coeng. ³ Boekoek imkhui te thuidoeknah neh thuidoek lamtah amih te thui pah. Ka Boeipa Yahovah loh he ni a thui.

Am te khueng, khueng lamtah
 a khuiah tui sak bal.

⁴ Amah maehpoel neh a phai dongkah
 maehpoel then boeih te
 a khuiah sang lamtah a laeng rhuh
 dongkah a sathen neh baetawt sak.

⁵ Boiva sakthen te khuen lamtah
 a rhuh te a dangah hmoek bal.

A tlawknah dongah tlawk saeh lamtah
 a rhuh te a khui duela hmin saeh.

⁶ Te dongah ka Boeipa Yahovah loh he ni a thui. Anunae thii aka kap khopuei aih, am khaw a khuikah a khawt phoeikah a khawt hoeng mai la. Te te a koeih pawh a maehpoel a maehpoel

mah tloeh lamtah hmulung khaw naan thil rhae boeh. ⁷ A thii khaw laipi te vuei thil ham diklai ah hawk pawt tih a laklung kah thaelpang aka tlaai soah a hawk . ⁸ Kosi sah ham, phulohnah neh phuloh ham te thaelpang a tlaai dongkah a thii ka khueh te dah uh kangna pawh. ⁹ Te dongah Boeipa Yahovah loh he ni a thui. Anunae thii aka kap khopuei te kai loh hlanhmai ka hueng thil van bitni. ¹⁰ Thing hawn lamtah hmai toih laeh. Maeh te na khok neh anhoi thungnom thil lamtah a rhuhrhong te tlum saeh. ¹¹ A hoeng te hmai-alh soah tloeng lamtah ling saeh. Rhohum te a tlum daengah ni a khui kah a tihnai te tlae vetih a khawt khaw a cing eh. ¹² A khawt mah thah coeng tih a kawt te hmai loh a noeng pawt dongah thinngan la a ngak coeng. ¹³ Na tihnai khonuen rhamtat lamloh nang kan caihcil dae na tihnai lamloh na caihcil moenih. Nang sokah ka kosi koep ka hlam due na caihcil moenih. ¹⁴ BOEIPA kamah loh ka thui te thoeng tih ka saii vaengah ka hlahpham pawt vetih ka rhen mahpawh. Na longpuei bangla ko ka hlawt pawt vetih na khoboe rhamlang bangla nang lai n'tloek uh ni. He tah ka Boeipa Yahovah kah olphong ni," a ti.

Ezekiel Yuu kah Dueknah

¹⁵ Te phoeiah BOEIPA ol te kai taengla ha pawk tih, ¹⁶ "Hlang capa aw, na mik kah a ngailaemnah te nang lamloh lucik neh ka loh coeng ne. Tedae rhaengsae boeh, rhap boeh, na mikphi long sak boeh. ¹⁷ Na kii khaw kuemsuem lamtah aka duek ham nguekcoinah saii boeh. Na lukhuem

te namah ah hlin lamtah na khokhom khaw na kho dongah buen laeh. Na hmui khaw dah boel lamtah hlang kah buh khaw ca boeh,” a ti.

¹⁸ Te dongah pilnam te te mincang ah ka voek. Hlaem vaengah ka yuu duek tih kai uen bangla mincang ah ka saii. ¹⁹ Te vaengah kai taengah pilnam loh, “Mamih ham na thui mahpawt nim? Balae tih kaimih ham he he na saii,” a ti uh.

²⁰ Amih te ka voek vaengah kai taengah BOEIPA ol ha pawk tih, ²¹ “Ka Boeipa Yahovah loh a thui he Israel imkhui taengah thui pah. Ka rhokso te ka poeih coeng ne. Hoemdannah na sarhi khaw, na mik kah ngailaemnah neh na hinglu kah huengaihnae dongah na capa neh na canu na hlun te cunghang dongah cungku uh ni. ²² Te vaengah ka saii bangla saii uh. Na hmui te dah uh boel lamtah hlang kah buh khaw ca uh boeh. ²³ Na lukhuem te na lu dongah, na khokhom te na kho dongah khueh uh. Rhaengsae uh boel lamtah rhap uh boeh. Namamih kah thaesainah neh na muei uh vaengah hlang he a manuca ham na nguek uh bitni. ²⁴ Te dongah Ezekiel nang ham kopoekrhai la om bitni. A cungkuem a saii bangla na saii tih a thoeng vaengah kai he ka Boeipa Yahovah ni tila na ming uh bitni.

²⁵ Nang hlang capa aw amih lamkah a lunghim, a boeimang omthennah, a mikhmuh kah ngailaemnah neh a hinglu kah olrhuh, a capa neh a canu ka loh te khohnin pakhat dongah moenih a? ²⁶ Te khohnin kah hlangyong te na hna dongah olthang la ha pawk ni. ²⁷ Te khohnin ah na ka hang ong vetih hlangyong te

na voek vetih pah voel mahpawh. Amih ham kopoekrhai la na om tangloeng vaengah BOEIPA kamah he a ming uh bitni,” a ti.

25

Ammon soah Laitloeknah

¹ BOEIPA ol kai taengla ha pawk tih, ² “Hlang capa aw, Ammon koca rhoek te na maelh-mai khueh thil lamtah amih te tonghma thil. ³ Ammon ca rhoek te thui pah lamtah ka Boeipa Yahovah ol te ya uh saeh. Ka Boeipa Yahovah loh he ni a thui. Ahuei, ka rhokso a poeih coeng tih Israel khohmuen te pong coeng, Judah imkhui te vangsawn la cet coeng,” na ti. ⁴ Te dongah nang te khotioeng koca taengah khoh la kam paek coeng ne. Nangmih lakli ah a lumim a ngol sak uh vetih a tolhmuen na taengah a khueh uh ni. Amih loh na thaih a caak vetih amih loh na suktui a ok uh ni. ⁵ Rabbah te kalauk tolkhoeng la, Ammon koca rhoek te boiva kah a kolhmuen la ka khueh vaengah BOEIPA kamah he nan ming uh bitni.

⁶ Te dongah ka Boeipa Yahovah loh he ni a thui. Kut na paeng tih kho neh na daep. Hinglu dongkah na uetnah cungkum neh Israel khohmuen na kokhahnah thil. ⁷ Te dongah ka kut he nang kan thueng thil vetih nang te namtom taengah maeh la kam mop ni ne. Nang pilnam lamloh kan saii vetih diklai lamloh nang kam milh sak ni. Nang kam mitmoeng sak vaengah BOEIPA kamah he nan ming bitni.

Moab sokah Laitloeknah

⁸ Ka Boeipa Yahovah loh he ni a thui. “Moab neh Seir khaw Judah im kah namtom cungkuem banghui ni ke,” na ti nama. ⁹ Te dongah Bethjeshimoth khohmuen kah kirhang, Moab tlanghlaep Baalmeon Kiriathaim neh Kiriathaim khaw khopuei lamloh a khopuei patoeng a khobawt duela ka lim coeng he. ¹⁰ Ammon koca te Khothoeng koca taengah khoh la ka paek van coeng. Te daengah ni Ammon koca rhoek te namtom lakli ah a poek pawt eh. ¹¹ Moab te tholphpu ka suk vaengah BOEIPA kamah he m'ming uh bitni.

Edom kah Laitloeknah

¹² Ka Boeipa Yahovah loh he ni a thui. Edom loh Judah imkhui ah phulohnah neh phu a loh. Tedae amih soah phu a loh khaw a boe lamni a boe coeng. ¹³ Te dongah ka Boeipa loh Yahovah loh he ni a thui. Edom taengah ka kut ka thueng vetih a khui lamkah hlang neh rhamsa te ka saii ni. Te te imrhong la ka khueh vetih Teman lamloh Dedan due khaw cunghang dongah cungku uh ni. ¹⁴ Edom sokah ka tawnlohnah te ka pilnam Israel kut ah ka paek vetih ka thintoek tarhing neh ka kosi tarhing ah Edom te a saii uh ni. Te vaengah ka tawnlohnah te a ming uh bitni. He tah ka Boeipa Yahovah kah olphong ni.

Philisti sokah Laitloeknah

25:8 Isa 15.1—16.14; 25.10-12; Jer 48.1-47; Amo 2.1-3; Zep 2.8-11
 25:12 Isa 34.5-17; 63.1-6; Jer 49.7-22; Ezk 35.1-15; Amo 1.11,12;
 Oba 1.1-14; Mal 1.2-5

¹⁵ Ka Boeipa Yahovah loh he ni a thui. Philisti te tawnlohnah neh saii ham coeng dongah a hinglu kah uetnah neh, khosuen kah thunkha thunhling kutcaihnah neh phulohnah te phu a loh uh. ¹⁶ Te dongah ka Boeipa Yahovah loh he ni a thui. Kai loh Philisti soah ka kut ka thueng thil coeng. Kerethi te ka saii vetih tuipuei langkaeng kah a meet khaw ka milh sak ni. ¹⁷ Tawnlohnah tanglue te amih soah kosi kah toelthamnah neh ka saii vaengah BOEIPA kamah he m'ming uh bitni. Kai kah tawnlohnah he amih soah ka khueh ham om coeng," a ti.

26

Tyre kah Cungkunah

¹ Kum hlai at dongkah hla khat dongla a om vaengah kai taengla BOEIPA ol ha pawk tih, ² Hlang capa aw, Tyre loh Jerusalem te, 'Ahuei, pilnam kah thokkhaih po coeng tih kai taengla ha mael coeng. Te dongah la anih a khah vaengah kai ka hah bitni,' a ti.

³ Te dongah ka Boeipa Yahovah loh he ni a thui. Kai loh Tyre nang kam pai thil coeng tih namtom te nang taengah tuipuei tuiphu aka cet bangla muep kang khuen ni he.

⁴ Te vaengah Tyre vongtung te a phae uh vetih a rhaltoengim khaw a koengloeng uh ni. A pum dongkah laipi te ka kuet pah vetih anih te thaelpang aka tlaai la ka khueh ni.

25:15 Isa 14.29-31; Jer 47.1-7; Joe 3.4-8; Amo 1.6-8; Zep 2.4-7; Zek 9.5-7 **26:1** Isa 23.1-18; Joe 3.4-8; Amo 1.9,10; Zek 9.1-4; Mat 11.21,22; Luk 10.13,14

⁵ Te vaengah tuipuei lalung kah yahtaboeh a yaalnah la poeh ni. Ka Boeipa Yahovah kah olphong he ka thui coeng dongah namtom ham maeh la poeh ni.

⁶ A canu rhoek te khohmuen kah cunghang loh a ngawn vaengah BOEIPA kamah te m'ming uh bitni.

⁷ Te dongah ka Boeipa Yahovah loh he ni a thui. Manghai rhoek manghai tlangpuei lamkah Babylon manghai Nebukhanazar te marhang neh, leng neh, marhang caem neh, hlangping neh pilnam boeiping neh Tyre taengla ka thoeng sak coeng he.

⁸ Na canu rhoek te khohmuen ah cunghang neh a ngawn ni. Nang te buep n'to thil vetih nang te tanglung n'lun thil uh phoeiah nang te photlinglen m'bai thil ni.

⁹ Na vongtung te a khongmawt neh pet a tung thil vetih na rhaltoengim te a cunghang neh a phil ni.

¹⁰ A marhang cako lamkah laipi loh nang m'vuei ni. Marhang caem neh humhae neh leng ol ah na vongtung khaw tuen ni. Na vongka lamloh a moe ham vaengah khopuei khuirhai bangla ueth coeng.

¹¹ A marhang khomae loh na tol boeih a taelh ni. Na pilnam te cunghang neh a ngawn vetih na sarhi kaam khaw diklai la bung ni.

¹² Na thadueng a buem uh vetih na hnothung-nah te a poelyoe uh ni. Na vongtung te a koengloeng uh vetih na sahnaih im khaw a phil

uh ni. Na lungto neh na thing neh na laipi pataeng tui lung la a voeih uh ni.

¹³ Na laa a lilup te ka paa sak vetih na rhotoeng ol khaw ya voel mahpawh.

¹⁴ Nang te thaelpang aka tlaai la kang khueh vetih yaehtaboeih yaalnah la na poeh ni. BOEIPA kamah loh ka thui coeng dongah na thoh thai voel mahpawh. He tah ka Boeipa Yahovah kah olphong ni.

¹⁵ Ka Boeipa Yahovah loh Tyre ham he ni a thui. Na cungkunah ol dongah pawt nim rhok a kii ham neh na laklung kah ngawnnah dongah ngawn ham vaengah sanglak rhoek a hinghuen?

¹⁶ Te vaengah tuipuei khoboei boeih khaw a ngolkhoel dong lamloh suntla uh ni. A hnikul te a rhoe uh vetih a rhaekva himbai te khaw a pit uh ni. Thuennah te a bai uh vetih diklai ah ngol uh ni. Mikhaptok ah lakueng uh vetih na taengah pong uh ni.

¹⁷ Te vaengah nang ham
rhahlung ham phueih vetih nang te,
'Balae tih tuipuei khosa lamloh na milh,
tuitunli neh a khuikah khosa rhoek soah
khopuei thangthen neh tlungluen la na om
ta.

Amih a khuikah khosa boeih soah
rhihnah a khueh uh ta.

¹⁸ Na cungkunah khohnin ah sanglak te
lakueng tih na khum lamloh tuipuei kah
sanglak rhoek khaw let uh.

¹⁹ Ka Boeipa Yahovah loh he ni a thui. Khopuei nang te kang khueh vaengah khosa aka om pawh

khopuei bangla n'khah ni. Te vaengah nang soah tuidung hang khuen vetih tui len loh nang n'khuk ni. ²⁰ Te vaengah nang te tangrhom khuila aka suntla khosuen pilnam taengla kan suntlak sak ni. Nang te tangrhom khuila aka suntla khosuen imrhong bangla diklai laedil ah kang om sak ni. Na om pawt daengah ni mulhing khohmuen ah kirhang khaw kam paek eh. ²¹ Nang te mueirhih kam paek vaengah na om voel mahpawh. N'toem cakhaw kumhal duela koep m'hmu mahpawh. He tah ka Boeipa Yahovah kah olphong ni," a ti.

27

Tyre Buek Coeng

¹ BOEIPA ol te kai taengla ha pawk tih, ² Nang hlang capa Tyre ham rhahlung phueih pah laeh. ³ Tyre te thui pah. Tuipuei khotlak kah khosa, khosa neh sanglak tom kah pilnam thenpom rhoek aw, ka Boeipa Yahovah loh he ni a thui. Tyre nang loh,

“Kai tah sakthen boeih ni,” na ti.

⁴ Tuipuei tuilung kah na thoh
na khorhi loh na sakthen a soep sak.

⁵ Namah ham te Senir lamkah
hmaical neh na sak tih,
na cungkui la saii ham te Lebanon lamkah
lamphai thingphael ni boeih a loh uh.

⁶ Bashan lamkah thingnu na lawngkaih la a saii
uh tih,
na longlaeng khaw Kittim sanglak lamkah
ta-aw vueino ni a saii uh.

- ⁷ Egypt lamkah rhaekva neh
 hnitang na hniyan la om.
 Hni thim te nang ham rholik la om tih
 Elishah sanglak lamkah daidi te na dakda la
 om.
- ⁸ Sidon neh Arvad khosa rhoek te
 nang aka tinghil puei la om uh.
 Tyre nang kah hlangcueih rhoek te
 nang soah na sangphoboei la om uh.
- ⁹ Gebal patong neh a hlangcueih khaw
 nang sokah na puut aka bing la om uh.
 Tuipuei sangpho boeih neh
 a sangphobibi rhoek khaw
 na thenpomhno dongah
 rhikhang ham nang taengah om uh.
- ¹⁰ Persia, Lud neh Put na caem la om uh. Na
 caemtloek hlang rhoek loh nang dongah photling
 neh lumuek a bang uh tih na rhuepomnah te
 a paek uh. ¹¹ Arvad neh Helekh hlang rhoek
 loh na kaepvai kah na vongtung dongah, na
 rhaltoengim khuiah aka om Gammadim loh a
 photling te na vongtung dongah a bang uh tih
 a kaepvai ah na sakthen neh a soep sak.
- ¹² Boeirhaeng boeih neh cak khaw, thi khaw
 samphae neh kawnlawk khaw na kum dongah
 Tarshish loh nang taengah thenpom tih na kawn
 te a thung uh. ¹³ Javan, Tubal neh Meshek loh
 nang taengah hlang kah hinglu neh thenpom
 uh tih na thenpomhno te rhohum hnopai neh a
 thung uh. ¹⁴ Togarmah imkhui lamkah marhang
 neh marhang caem khaw, muli-marhang khaw
 na kawn neh a thung uh. ¹⁵ Dedan hlang
 rhoek khaw nang taengah thenpom uh. Na kut

dongkah hnoyoih neh sanglak tom loh maeh ki vueino khaw, rhining thing khaw na kutdoe la ham mael uh. ¹⁶ Na bibi khaw a cung dongah Aram khaw nang taengah thenpom tih khocil-lung neh daidi khaw, rhaekva neh baibok khaw, maerhuhlung neh aithilung khaw na kawn neh a thung uh. ¹⁷ Judah neh Israel khohmuen khaw nang taengah thenpom uh tih, Minnith cang neh cangtha khaw, khoitui neh situi, thingpi khaw na thenpomhno neh a thung uh. ¹⁸ Na kutngo khaw cung tih Helbon misurtui neh tumul a bok dongkah boeirhaeng boeih khaw a khawk dongah Damasku khaw nang taengah thenpom coeng. ¹⁹ Vedan neh Uzal lamkah Javan loh thi met te na kawn la han khuen uh tih valaeng neh singkaek khaw na thenpomhno la a om sak. ²⁰ Dedan loh leng dongkah baidok himbai neh nang taengah thenpom coeng. ²¹ Arabia neh amih Kedar khoboeh boeih loh na kut dongah thenpom uh. A khuiah tuca neh tatal neh kikong neh nang taengah thenpom uh. ²² Aka thenpom Sheba neh Raamah khaw nang taengah thenpom uh. Thenkoek botui boeih neh lung vang boeih khaw sui khaw na kawn la m'paek uh. ²³ Haran neh Kanneh neh Eden kah aka thenpom Sheba, Assyria neh Kilmad khaw na thenpom. ²⁴ Amih loh nang himbai then neh, hni-awn a thim, rhaekva neh, pangcik hniphaih rhuihet a hlin neh na hnoyoihhmuen ah a kuehluek la n'thenpom uh. ²⁵ Tarshish sangpho nang na thenpomhno yiin vaengah, na khawk coeng tih tuipuei tuilung ah muep n'thangpom.

- 26 Nang aka kaih loh nang te
tui len khuila m'pawk puei dae
kothoeng yilh loh tuipuei tuilung ah nang
n'rhek sak.
- 27 Na boeirhaeng neh na kawn khaw,
na thenpomhno, na sangphobibi neh
na sangphoboei khaw,
na puut aka bing neh
na thenpomhno rhi aka khang khaw,
namah khuikah na caemtloek hlang boeih
khaw,
na laktung kah na hlangping boeih khaw
na cungkumah khohnin ah tah
tuipuei tuilung ah cungku uh ni.
- 28 Na sangphoboei kah pang ol ah
na khoacak rhoek khaw hinghuen uh ni.
- 29 Lawngkaih aka pom sangphobibi boeih khaw
a sangpho lamloh suntla uh vetih
tuipuei sangphoboei boeih khaw lan ah pai
uh ni.
- 30 Nang te a ol neh n'yaak sak uh vetih
bungbung pang ni.
Laipi a lu soah a phul vetih
hmaiphu dongah bol uh ni.
- 31 Nang kongah lungawng la
kuet uh vetih tlamhni a yil uh ni.
Hinglu kah khahing loh khahing
rhaengsaelung neh nang soah rhap uh ni.
- 32 Nang soah amih kah
rhahlung rhaengsaenah
a phueih uh vetih nang te,
'Tyre bang neh tuipuei tuilung ah
aka rhawp bang he unim?'

- tila rhaengsae uh ni.
- ³³ Na kawm te tuipuei lamloh na khuen tih
pilnam khaw muep na cung sak.
Na boeirhaeng kah cangpai,
na thenpomhno neh diklai manghai na boei
sak.
- ³⁴ Tuipuei loh na thenpomhno neh
tui dung ah n'khah coeng tih
na khui kah na hlangping khaw boeih
cungku uh.
- ³⁵ Sanglak kah khosa boeih nang soah hal uh tih
a manghai rhoek khaw hlithae kah
a yawn bangla maelhmai tal uh.
- ³⁶ Mueirhih la na om dongah
pilnam taengkah aka thenpom
nang te n'hlip thil tih kumhal duela
na phoe voel mahpawh," a ti.

28

Tyre Khoboei kah Cungkunah

- ¹ BOEIPA ol te kai taengah ha pawk tih,
² "Hlang capa aw, Ka Boeipa Yahovah loh a thui
he Tyre rhaengsang taengah thui pah.
Na lungbuei sang tih, 'Kai la pathen,
tuipuei tuilung kah pathen
tolrhum ah ka ngol,' na ti.
Tedaе nang hlang tangkik loh na lungbuei tah
pathen lungbuei la na poek cakhaw na
pathen moenih.
- ³ Daniel lakah Daniel la na cueih ta te.
A kael boeih khaw nang ham a hmuep
moenih ko te.
- ⁴ Na cueihnah neh na lungcuei lamloh

- na thadueng la na saii.
 Na thakvoh khuiah sui neh cak na hen.
- 5 Na hnothungnah dongah
 na cueihnah khaw puh tih na thadueng sai
 van.
 Tedae na thadueng dongah na thinko sang.
- 6 Na thinko te pathen kah lungbuei bangla
 na ngai dongah ni ka Boeipa Yahovah loh he
 he a thui.
- 7 Te dongah ni hlanghaeng neh
 namtom kholong te nang taengla kang
 khuen he.
 A cunghang neh na cueihnah sakthen te
 a khoh uh vetih na omyalnah khaw a poeih
 ni.
- 8 Vaam khuila nang n'suntlak sak uh vetih
 tuipuei tuilung ah rhok dongkah dueknah
 neh na duek ni.
- 9 Nang aka ngawn kah mikhmuh ah,
 'Kai la pathen,' na ti khaw na ti aya?
 Nang adam ngawn tah
 namah aka poeih kut ah na pathen moenih.
- 10 Kamah loh ka thui coeng dongah
 kholong kut ah ni pumdul kah
 dueknah neh na duek eh.
 He tah ka Boeipa Yahovah kah olphong ni,"
 a ti.

Tyre Manghai Ham Rhahlung

- 11 BOEIPA ol te kai taengla ha pawk bal tih,
 12 Hlang capa aw Tyre manghai ham rhahlung
 phueih pah lamtah amah te thui pah. Ka Boeipa
 Yahovah loh he ni a thui.
 Cueihnah khuengrhueng neh
 sakthen boeih kah cungkuemnah

- kutha aka daeng khaw nang ni.
- 13 Pathen kah dum Eden ah tah
 lung vang cungkuem te
 na thoeicamnah tih lungling vaya,
 lungmik, timsuih, oitha, maihae,
 minhum khocillung neh tamkuei,
 na kamrhing neh na rhotak toembael
 sui hnopai neh nang n'suen
 khohnin ah ni na khuiah a tawn uh.
- 14 Nang tah koelhnah aka thingthung cherubim
 ni.
 Te dongah ni Pathen kah cimcaihnah tlang
 ah
 nang kang khueh.
 Hmai lungto lakli ah khaw
 na om tih na pongpa coeng.
- 15 Nang kan suen khohnin lamloh
 na khuikah dumlai a phoe hil pataeng
 na longpuei ah na cuemthuek.
- 16 Na hnothungnah kah a puhnah lamloh
 na kotak te kuthlahnah hah tih na tholh.
 Te dongah ni Pathen kah tlang lamloh
 nang kam poeih tih hmai lungto lakli lamkah
 aka thingthung cherubim
 taeng lamloh nang kam milh sak.
- 17 Na sakthen dongah na lungbuei khaw sang tih
 na cueihnah neh na poci.
 Na omyalnah dongah ni
 diklai la manghai rhoek kah
 mikhmuh ah nang kam voeih tih
 nang te sawt sak ham nang kang khueh.
- 18 Na hnothungnah dumlai dongah
 namah kah thaesainah tah khawk tih
 na rhokso ni na poeih coeng.

Te dongah ni na khui lamloh
 hmai ka puek sak tih nang n'hlawp.
 Te vaengah nang aka so boeih kah
 mikhmuh ah nang te diklai hmaiphu la kang
 khueh.

¹⁹ Pilnam khuikah nang aka ming boeih loh
 nang soah hal uh coeng.
 Mueirhih la na poeh tanglang tih
 kumhal duela na phoe pawh," a ti.

Sidon a Tonghma Thil

²⁰ BOEIPA ol te kai taengla ha pawk bal tih,
²¹ "Hlang capa aw Sidon te na maelhmai khueh
 thil lamtah tonghma thil laeh. ²² Te vaengah ka
 Boeipa Yahovah loh a thui he thui pah.
 Kai loh Sidon nang kam pai thil coeng ne.
 Na kotak khuiah ka thangpom uh vetih
 BOEIPA kamah tila m'ming uh bitni.
 Tholhphu te anih soah ka saii vetih
 a khuiah ka ciim uh bitni.

²³ A khuikah duektahaw neh a kawtpoeng ah thii
 ka tueih
 vaengah a kaepvai kah cunghang neh
 a kholung ah a rhok la cungku ni.
 Te vaengah BOEIPA kamah te m'ming uh
 bitni.

²⁴ Te vaengah Israel imkhui ham tangti kah a
 huet neh hling kah a do khaw om voel mahpawh.
 A kaepvai boeih lamkah amih aka hnaep long
 khaw kai he ka Boeipa Yahovah ni tila a ming
 uh bitni.

Bidip La Israel Coinah

²⁵ Ka Boeipa Yahovah loh he ni a thui. Israel imkhui te pilnam lamloh ka coi. Amih taengla taekyak uh cakhaw namtom mikhmuh kah amih taengah ka ciim coeng. Te dongah a khohmuen ah kho a sak uh ni. Te te ka sal Jakob taengah ka paek coeng. ²⁶ A khuiah ngaikhuek la hing uh vetih im a sak uh ni. Misur a phung uh vetih ngaikhuek la hing uh ni. A kaepvai lamkah amih aka hnaep boeih soah tholhphu ka suk vaengah kai he BOEIPA a Pathen la a ming uh bitni.

29

Egypt a Tonghma Thil

¹ Kum rha dongkah hla rha hnin hlai nit vaengah BOEIPA ol te kai taengla ha pawk tih,
² “Hlang capa aw, Egypt manghai Pharaoh te na maelhmai khueh thil lamtah amah neh Egypt boeih te tonghma thil. ³ Voek lamtah ka Boeipa Yahovah loh a thui he thui pah.

A sokko tui lung ah aka kol tui hnam puei,
 Egypt manghai Pharaoh nang kam pai thil coeng ne.

Amah long tah kai taengah,
 ‘Ka sokko he kai loh kamah kah la ka khueh,’
 a ti.

⁴ Thisum, thisum neh na kam ah kan dueh vetih na sokko kah nga te na lip dongah ka ben ni. Na sokko khui lamloh nang kan doek vetih na sokko kah nga boeih khaw na lip dongah kap ni.

⁵ Namah neh na sokko nga boeih khaw na khuikah khosoek ah kam phap vetih,

lohma tlai ah na cungkuni.

Nang n'khoem pawt vetih n'coi mahpawh.

Diklai mulhing ham neh vaan kah
vaa ham nang te cakok la kam paek ni.

⁶ Te vaengah Egypt khosa boeih loh BOEIPA kamah ni tila a ming uh ni. Amih te Israel imkhui kah capu congol la om coeng.

⁷ Amih loh nang te na kut, kut ah n'tuuk vaengah na paep tih amih kah laengpang boeih na phen pah. Nang dongah a hangdang vaengah nim te na khaem sumsoek tih amih kah cinghen boeih na phit sak.

⁸ Te dongah ka Boeipa Yahovah loh he ni a thui. Kai loh nang taengah cunghang kang khuen vetih nang lamkah hlang neh rhamsa khaw ka thup ni. ⁹ Teda, 'Sokko te kamah ham tih kamah loh ka saii,' a ti dongah Egypt khohmuen te khopong neh imrhong la a poeh vaengah BOEIPA kamah he a ming uh bitni.

¹⁰ Te dongah namah neh na sokko khaw ka pai thil coeng ne. Egypt kho te Syene Migdol lamloh Kusah khorhi due kholing khopong kah imrhong la ka khueh ni. ¹¹ Te longah hlang kho loh paan pawt vetih rhamsa kho long khaw, te longah paan mahpawh. Kum sawmli khuih khosa om mahpawh. ¹² Egypt khohmuen te khopong la ka khueh vaengah diklai hman ah pong ni. A khopuei rhoek khaw khopuei rhoek lakli ah a khah vetih kum sawmli khopong la om ni. Egypt te namtom taengla ka taek ka yak vetih amih te diklai ah ka haeh ni.

¹³ Tedae ka Boeipa Yahovah loh he ni a thui. Kum sawmli a thok vaengah Egypt te ka taek ka yak nah pilnam taeng lamloh pahoi ka coi ni. ¹⁴ Egypt thongtla te ka mael puei vetih amih te amah tuikong khohmuen kah Parthros khohmuen la ka bal sak ni. Te vaengah tlarhoel ram la pahoi om uh ni. ¹⁵ Ram tom lakah tlarhoel la om vetih namtom soah koep cungphoek mahpawh. Amih te ka mui sak daengah ni namtom soah a taemrhai pawt eh. ¹⁶ Te vaengah a taengla amamih hooi uh tih thaesainah aka poek rhoek kah pangtungnah la Israel imkhui he om voel mahpawh. Te phoeiah Kai he, ka Boeipa Yahovah ni tila a ming uh bitni," a ti.

Babylon loh Egypt a Doe

¹⁷ Kum kul kum rhih, hla lamhma hnin at dongla a om vaengah BOEIPA ol kai taengla ha pawk tih, ¹⁸ "Hlang capa aw, Babylon manghai Nebukhanazar loh Tyre te a caem kah thohtatnah a len neh a thohtat sak coeng. A lu khaw boeih tlong tih laengpang boeih thool coeng. Tedae amah ham neh a caem ham thapang om hae pawh. Tyre lamkah thohtatnah lamloh a taengah a thohtat sak. ¹⁹ Te dongah ka Boeipa Yahovah loh he ni a thui. Kai loh Babylon manghai Nebukhanazar taengah Egypt khohmuen ka paek coeng he. Te vaengah a hlangping te a khuen pah vetih a kutbuem khaw a buem pah ni. A maeh te a poelyoe pah vetih a caem ham thapang la om ni. ²⁰ A taengah a thohtat te khaw kai ham a saii uh dongah, a

thaphu la anih te Egypt khohmuen ka paek. He tah ka Boeipa Yahovah kah olphong ni.

²¹ Te khohnin ah Israel imkhui ham ki cawn ni. Te vaengah nang te amih lakli ah ka ongnah ka paek vetih BOEIPA kamah he m'ming uh ni," a ti.

30

Egypt kah Pocinah

¹ BOEIPA ol te kai taengah ha pawk tih,
² "Hlang capa aw, tonghma lamtah ka Boeipa Yahovah kah a thui he thui pah.

Ya-oe hnin at ham khaw rhung mai saw.

³ Khohnin tah yoei ngawn coeng,
BOEIPA kah khohnin tah yoei ngawn.
Namtom kah a tue tah cingmai khohnin la om.

⁴ Te vaengah Egypt te cunghang loh a thoeng thil tih
a thueknah loh Kusah soah tla ni.
Egypt ah rhok a cungku vaengah
a pilnu te a loh pah vetih
a khoengim a koengloeng pah ni.

⁵ Kusah neh Put khaw, Lud neh namcom boeih, Khub neh a taengkah paipi khohmuen koca rhoek khaw cunghang dongah cungku uh ni.

⁶ BOEIPA loh he ni a thui.
Egypt aka talong rhoek khaw
cungku uh vetih a sarhi kah
hoemdamnah khaw tla ni.
Syene Migdol lamkah khaw
cunghang dongah amah la cungku uh ni.

He tah ka Boeipa Yahovah kah olphong ni.
 7 Aka pong khohmuen lakli ah pong uh vetih
 a khopuei rhoek khaw a khah tangtae
 khopuei rhoek lakli ah om uh ni.
 8 Kai he BOEIPA la a ming uh bitni.
 Egypt te hmai ka hlae thil vetih
 anih aka bom rhoek khaw boeih bawt uh ni.
 9 Te khohnin ah ngaikhuek Kusah lakueng
 hamla puencawn rhoek te ka mikhmuh lamloh
 timbaw neh cet uh ni. A thoeng kuekluek ham
 dongah Egypt kah khohnin ah amih te thueknah
 loh a thoeng thil ni.

10 Ka Boeipa Yahovah loh he ni a thui.

Egypt hlangping te Babylon manghai
 Nebukhanazar kut neh ka kangkuen sak ni.
 11 Amah neh a taengkah a pilnam loh
 khohmuen phae ham
 namtom hlanghaeng te hang khuen.
 Te dongah Egypt te a cunghang neh
 a thun uh vetih khohmuen te rhok a bae sak
 ni.
 12 Sokko te lanhak la ka poeh sak vetih
 khohmuen te boethae kut ah ka yoih pah ni.
 Khohmuen neh a khuikah boeih te
 kholong kut neh ka pong sak ni.
 Kai BOEIPA loh ka thui coeng.

13 Ka Boeipa Yahovah loh he ni a thui.
 Mueirhol ka milh sak vetih
 Noph kah mui te ka kangkuen sak ni.
 Egypt khohmuen kah khoboei khaw
 om voel pawt vetih

- Egypt khohmuen ah rihnah ka paek ni.
- 14 Parthros te ka pong sak vetih
 Zoan te hmai neh ka hoeh ni.
 No te khaw tholphpu ka suk thil ni.
- 15 Ka kosi he Egypt lungnim
 Sin soah ka hawk vetih
 No hlangping te ka thup ni.
- 16 Egypt te hmai neh ka hlae vaengah
 kilkul la kilkul vetih kilkul voek bitni.
 Sin neh No neh Noph he
 kothaih rhal ah a ueth la om bitni.
- 17 Aven neh Pibeseth tongpang rhoek te
 cunghang dongah cungku uh vetih
 amih te tamna la cet uh ni.
- 18 Egypt hnokohcung te pahoi ka khaem vaengah
 Tahpanhes ah kothaih khaw hmuep ni.
 Te vaengah a khuikah hoemdamnah a sarhi
 khaw
 kangkuen vetih amah te cingmai loh a thing
 ni.
 A tanu rhoek khaw tamna la cet uh ni.
- 19 Egypt soah tholphpu ka suk tangloeng daeng-
 gah ni
 BOEIPA kamah he m'ming uh eh," a ti.

Pharaoh kah Thadueng Bawt

- 20 Kum hlai khat hla lamhma hnin rih dongla
 a om vaengah BOEIPA ol te kai taengla ha pawk
 tih, 21 "Hlang capa aw, Egypt manghai Pharaoh
 a bantha ka khaem pah coeng. Si paek ham
 khaw poi pah pawh ne. A khopnah a khueh
 tih a poi pah daengah man cunghang a tuuk
 vaengah a na suidae. 22 Te dongah Ka Boeipa
 Yahovah he ni a thui. Egypt manghai Pharaoh

ka pai thil coeng he. A ban aka tlungluen te aka khaem bangla ka khaem pah vetih a kut lamkah cunghang ka hlong sak ni. ²³ Egypt te namtom taengah ka taek ka yak vetih amih te diklai ah ka haeh ni. ²⁴ Babylon manghai kah a ban te ka moem pah vetih ka cunghang he a kut ah ka paek ni. Pharaoh ban te ka khaem vetih a mikhmuh ah rhok kah nguekcoinah bangla nguekcoi ni. ²⁵ Babylon manghai te bantha ka caang sak tih Pharaoh bantha a tlak vaengah BOEIPA kamah he m'ming uh bitni. Ka cunghang he Babylon manghai kut ah ka paek vetih Egypt khohmuen te a luklek thil ni. ²⁶ Egypt te namtom taengah ka taek ka yak tih amih te diklai la ka haeh vaengah BOEIPA kamah he m'ming uh bitni," a ti.

31

Egypt neh Assyria Cungkumah

¹ Kum hlai khat hla thum dongkah a hnin at dongla a om vaengah BOEIPA ol te kai taengla ha pawk tih, ² "Hlang capa aw, Egypt manghai Pharaoh neh a hlangping te thui pah.

Na boeilennah dongah aka lutlat te unim?

³ Assyria khaw Lebanon kah lamphai la ke.

A hlaeng sakthen tih thingkho khaw a khuk.

A songsang neh oek uh tih a thingsoi khaw a bu sola om.

⁴ Tui loh anih a pantai sak tih

a laedil lamloh anih a pomsang.

A thingling kaepvai ah a tuiva te long tih

a tuilong te khohmuen thingkung boeih taengah a thak.

⁵ Te dongah a sang khaw

- khohmuen thingkung boeih lakah
 sang tih a pae khaw yet.
 Tui yet te a pha vaengah tah
 a thingvak khaw thingvak lakah sen.
- ⁶ A baek dongah vaan kah vaa boeih loh bu a tuk
 tih
 a thingvak dangah khohmuen mulhing
 boeih thaang.
- A hlipkhub ah namtom boeiping boeih kho a sak.
- ⁷ A yung loh tui yet te a paan coeng dongah
 a boeilenah neh sawtthen tih
 a hlaeng a vak nen khaw sawtthen coeng.
- ⁸ Lamphai te Pathen kah dum ah hup uh thai
 pawh.
 Hmaical loh a baek te puet bal pawh.
 Hlimbok khaw anih kah thingsam bangla a
 om moenih.
 Pathen dum kah thing boeih loh
 a sakthen dongah anih te a puet moenih.
- ⁹ Te te a hlaeng boeih neh sakthen la ka saii
 dongah
 Pathen dum kah Eden thingkung boeih loh
 a taengah thatlai uh.
- ¹⁰ Te dongah ka Boeipa Yahovah loh he ni a
 thui. Thingvak khaw na sang tih a bu so duela
 a thingsoi a khueh. Te dongah a oeknah la a
 thinko a pomsang. ¹¹ Te dongah anih te namtom
 tatal kut ah ka paek. A halangnah bangla anih
 te saii rhoe saii ham ham ka haek. ¹² Te kholong
 kah namtom hlanghaeng loh a hum. Tlang ah
 a yaal tih a hlaeng loh kolrhawk tom ah yalh.
 Khohmuen sokca boeih ah a thingsam tlawt. Te

dongah diklai pilnam boeih khaw a hlipkhup lamloh suntla uh tih a toeng uh. ¹³ A cungkunah soah vaan kah vaa boeih loh kho a sak uh tih a thingsam dongah khohmuen mulhing boeih om uh. ¹⁴ Te daengah ni tui dongkah thing boeih loh a thingvak nen khaw a sang pawt vetih a bu so la a thingsoi a khueh uh pawt eh. Te phoeiah tui aka o boeih loh amih kah oeknah dongah amih te a pha pawt eh. Amih boeih dueknah dongah tah tangrhom khuiah aka suntla hlang ca lakli ah khaw diklai laedil la a khueh uh coeng.

¹⁵ Ka Boeipa Yahovah loh he ni a thui. Saelkhui la a suntlak khohnin ah anih te tuidung neh ka thing tih ka nguekcoi sak. A tuiva te ka kueng pah tih tui yet khaw a sihtaeh uh. Anih kongah Lebanon khaw kopang tih anih kongah khohmuen thingkung boeih huum coeng. ¹⁶ Anih te tangrhom kah aka suntla rhoek neh saelkhui la ka suntlak vaengah a cungkunah ol neh namtom ka hinghuen sak. Te daengah ni Eden thing then boeih neh Lebanon hnothen tui aka o boeih diklai laedil ah dam a ti eh. ¹⁷ Amih khaw anih neh namtom lakli kah a hlipkhup ah aka om a bantha neh cunghang dongkah rhok taengah saelkhui la suntla uh.

¹⁸ Thangpomnah neh Eden thingkung kah boeilennah dongah unim na puet van te. Eden thingkung neh pumdul lakli ah diklai laedil la na suntla vetih cunghang dongkah rhok neh na yalh ni. He tah Pharaoh neh a hlangping boeih kah a kawng ni. He he ka Boeipa Yahovah olphong ni," a ti.

32

Pharaoh ham Rhahlung

¹ Kum hlai nit, hla hlai nit, hlasae hnin at a pha vaengah BOEIPA ol te kai taengla ha pawk tih, ² “Hlang capa aw, Egypt manghai Pharaoh ham rhahlung phueih pah lamtah amah te thui pah.

Namtom kah sathuengca na puet dae
tuipei kah tuihnang bangla na om.

Na tuiva ah m'poh tih na kho neh
tui na nok dongah a tuiva na nu sak.

³ Ka Boeipa Yahovah loh he ni a thui ni.
Nang soah ka lawk he pilnam hlangping neh
kan thing khungdaeng vetih nang te
kai kah yaehtaboeih neh n'doek uh ni.

⁴ Nang te diklai ah kam phap vetih
khohmuen hoeng ah nang kang hut ni.
Vaan kah vaa cungkuem loh nang soah
cu vetih nang te diklai mulhing tom ka cung
sak ni.

⁵ Na saa te tlang ah ka khueh vetih
na rhok te kolrhawk ah ka bae sak ni.

⁶ Na thii la tlang due na ka long neh
diklai ka suep vetih nang nen te
sokca rhoek khaw bae uh ni.

⁷ Nang kan thih vaengah vaan te ka thing vetih
a aisi te ka kopang sak ni.
Khomik te cingmai neh ka thing vetih
hla kah a vangnah khaw sae mahpawh.

⁸ Vaan kah a aa vangnah cungkuem te
nang soah ka hmuep sak vetih

32:7 Isa 13.10; Mat 24.29; Mrk 13.24,25; Luk 21.25; Olp 6.12,13;
8.12

na khohmuen soah hmaisuep ka tlak sak ni.
He tah ka Boeipa ka Yahovah kah olphong
ni.

⁹ Amih te na ming pawt dae diklai kah namtom
taengah na pocinah te ka khuen vaengah pilnam
kah lungbuei muep ka veet ni. ¹⁰ Nang soah
pilnam boeiping te ka pong sak vetih a manghai
rhoek khaw nang kong ah hlithae loh a yawn ni.
Amih mikhmuh ah ka cunghang ka hlaek vetih
na cungkunah hnin ah tah hlang he a hinglu ham
mikhaptok ah lakueng uh ni.

¹¹ Ka Boeipa Yahovah he ni a thui. Babylon
manghai kah cunghang he nang taengla ha pawk
ni. ¹² Amih namtom hlanghaeng neh hlangrhalh
boeih kah cunghang dongah na hlangping te ka
cungku sak ni.

Egypt kah hoemdannah te a rhoelrhak uh vetih
a hlangping khaw boeih a mitmoeng sak ni.

¹³ Tui yet taeng lamkah
a rhamsa boeih te ka milh sak ni.

Te te hlang kho loh koep nok pawt vetih
rhamsa khomae loh te te nok mahpawh.

¹⁴ Te vaengah a tui ka cil sak vetih
a tuiva te situi bangla ka long sak ni.
He tah ka Boeipa Yahovah olphong ni.

¹⁵ Egypt khohmuen te khopong la ka khueh
coeng.

Te dongah a khuikah khosa boeih te
ka ngawn tih khohmuen te
a pum la a pong vaengah
BOEIPA kamah he m'ming uh bitni.

¹⁶ He rahlung neh anih te a rhaengsae uh ni. Namtom canu rhoek loh Egypt ham rhaengsae uh vetih a hlangping boeih ham rhaengsae uh ni. He tah ka Boeipa Yahovah kah olphong ni," a ti.

Egypt Saelkhui la Pawk

¹⁷ Kum hlai nit hla khat hnin hlai nga vaengah BOEIPA ol te kai taengla ha pawk tih, ¹⁸ Hlang capa aw, Egypt hlangping ham rhathi laeh. Anih khaw diklai laedil duela tangrhom ah aka suntla taengah namtom tanu aka khuet neh suntla uh saeh.

¹⁹ Unim na hmae thil ngai?

Suntla lamtah pumdul rhoek taengah yalh laeh.

²⁰ cunghang dongkah a mop te cunghang dongkah rhok lakli ah ni a yalh eh. Anih neh a hlangping boeih te sol laeh. ²¹ Anih te Saelkhui lamkah neh pathen hlangrhalh rhoek neh anih aka bom rhoek loh thui uh saeh. cunghang dongkah pumdul rhok dongla suntla uh tih yalh uh lah ko. ²² Te ah te Assyria neh a hlangping boeih he a phuel kaepvai kah cunghang dongah aka cungku kah rhok boeih ni. ²³ Tangrhom hlaep ah a phuel a khueh pa uh tih a phuel kaepvai ah a hlangping om. Amih boeih tah cunghang dongah cungku tih mulhing khohmuen ah rhihnah aka pae kah a rhok ni.

²⁴ Te ah te Elam neh a hlangping boeih a phuel kaepvai ah om. Amih boeih tah cunghang dongah aka cungku kah a rhok ni. Te rhoek te diklai laedil ah pumdul la suntla uh. Te long neh mulhing khohmuen ah amih kah rhihnah a

paek tih a mingthae te tangrhom kah aka suntla neh a phueih uh. ²⁵ Anih ham tah rhok lakli ah ni thingkong a khueh pa uh. A hlangping boeih loh a phuel kah a kaepvai ah om uh. Amih te cunghang dongah a rhok pumdul boeih ni. Mulhing khohmuen ah amamih kah rihnah a paek tih a mingthae a phueih uh phoeiah tangrhom kah aka suntla neh rhok lakli ah ni a yalh.

²⁶ Te ah te Tubal Meshek neh a hlangping boeih loh a phuel kah a kaepvai ah om. Amih boeih tah amamih kah rihnah te mulhing khohmuen ah a paek uh dongah pumdul la cunghang neh a poeih rhoek ni. ²⁷ Pumdul lamloh aka cungku hlangrhalh taengah khaw yalh uh hae pawh. A caemtloek hnopai neh saelkhui la suntla uh tih a cunghang te a lu hmuiah a doelh uh. A hlangrhalh rhoek loh mulhing khohmuen ah rihnah pae cakhaw amamih kah thaesainah te amamih rhuh dongah ni a tlak. ²⁸ Nang khaw pumdul lakli ah na bawt vetih cunghang dongkah rhok neh na yalh ni.

²⁹ Te ah te Edom kah a manghai rhoek neh a khoboei rhoek boeih om. Te rhoek tah a thayung thamal a paek. Tedae amih te cunghang dongkah rhok taeng neh tangrhom la aka suntla pumdul rhoek taengah ni a yalh uh.

³⁰ Te ah te amih tlangpuei boeimang boeih neh Sidoni boeih khaw om uh. Te rhoek tah amamih kah rihnah hmanah a rhok rhoek neh suntla uh. A thayung thamal dongah yak uh tih te cunghang dongkah rhok neh pumdul la yalh uh.

Te dongah tangrhom kah aka suntla rhoek neh a mingthae a phueih uh.

³¹ Amih te Pharaoh loh a hmuh vaengah a hlangping boeih ham khaw, cunghang dongkah a ngawn a hlangping ham khaw, Pharaoh neh a caem boeih ham khaw damti bitni. He tah ka Boeipa Yahovah kah olphong ni. ³² Mulhing khohmuen ah kai rihnah te anih kah rihnah la ka paek. Te dongah Pharaoh neh a hlangping boeih loh cunghang dongkah rhok neh pumdul lakli ah yalh. He tah ka Boeipa Yahovah kah olphong ni," a ti.

33

Israel aka Dawn Ezekiel

¹ BOEIPA ol te kai taengla ha pawk tih, ² "Hlang capa aw, na pilnam paca te voek lamtah amih te thui pah. Khohmuen te cunghang ka muk thil vaengah khohmuen pilnam loh a khobawt lamkah hlang pakhat te a tuek uh tih anih te amamih kah rhaltawt la a khueh uh. ³ cunghang loh khohmuen soah a tlak te a hmuh vaengah tuki a ueng tih pilnam te a thuituen. ⁴ Tuki ol te a yaak khaw a yaak dae a ngaihuet pawt dongah cunghang loh a tlak thil. Te vaengah anih a loh te a thii khaw amah lu dongah tla saeh. ⁵ Tuki ol a yaak lalah a ngaihuet pawt atah amah thii ni amah soah a tlak eh. Amah a ngaihuet atah a hinglu a hlawt ni. ⁶ Tedae rhaltawt loh cunghang ha pawk te a hmuh lalah tuki te ueng pawt tih pilnam huek pawh. Te vaengah cunghang ha pawk tih amih lamkah a hinglu te a loh pa atah

amah kah thaesainah kongah yook mai cakhaw a thii te rhaltawt kut ah ni ka toem eh.

⁷ Nang hlang capa namah ni Israel imkhui kah rhaltawt la kang khueh coeng. Te dongah ka ka lamkah ol na yaak neh kai lamloh amih te huek laeh. ⁸ Halang, halang te, 'Na duek rhoe na duek ni,' ka ti nah lalah halang te a longpuei lamloh ngaihuet sak ham na thui pawt atah, halang te amah kah thaesainah dongah duek cakhaw a thii te tah nang kut ah ni ka toem eh. ⁹ Tedae nang loh halang te a longpuei lamloh mael sak ham na huek lalah a longpuei lamloh a mael pawt atah amah thaesainah ah duek vetih nang tah na hinglu na huul ni.

¹⁰ Te dongah nang hlang capa, Israel imkhui te voek laeh. He he thui lamtah, 'Mamih kah boekoek neh mamih kah tholhnah ngawn tah mamih soah tla coeng. Amih kongah mamih m'muei uh tih metlae n'hing eh?' ti saeh. ¹¹ Amih te thui pah. Kai tah hingnah ni. He he Ka Boeipa Yahovah kah olphong ni. Halang kah dueknah dongah khaw ka naep pawt dongah halang khaw a longpuei lamloh lat mael saeh lamtah hing saeh. Na boethae longpuei lamloh mael rhoe mael laeh. Balae tih Israel imkhui loh tarha na duek eh?

¹² Te dongah nang hlang capa loh na pilnam paca te thui pah. A boekoek hnin ah tah aka dueng kah duengnah loh anih te huul mahpawh. A halangnah lamloh a mael khohnin ah halang kah halangnah dongah khaw tongtah mahpawh. Aka dueng khaw a tholh khohnin ah tah tholh neh a hing ham coeng pawh. ¹³ Aka dueng te

hing rhoe hing ni ka ti sitoe cakhaw anih te amah kah duengnah dongah pangtung tih dumlai saii koinih anih kah duengnah boeih te a duengnah la poek uh mahpawh. A dumlai a saii dongah te amah ni a duek eh.

¹⁴ Halang te duek rhoe duek ni ka ti bal sitoe cakhaw a tholhnah lamloh mael tih tiktamnah neh duengnah a saii. ¹⁵ A halang akhaw hnohol te a mael tih a huenkoe te koep a thuung, hing-nah khosing dongah pongpa tih dumlai a saii pawt atah hing roe hing vetih duek mahpawh. ¹⁶ A tholhnah cungkuem neh a tholh te a taengah tholhnah poek uh pawt vetih tiktamnah neh duengnah a saii dongah hing rhoe hing ni.

¹⁷ Te vaengah na pilnam paca loh, “Boeipa kah longpuei tiktam pawh,” ti uh cakhaw amih kah a longpuei ni a tiktam pawh. ¹⁸ Aka dueng khaw a duengnah lamloh mael tih dumlai a saii atah te dongah te duek van ni. ¹⁹ Halang khaw a halangnah lamloh mael tih tiktamnah neh duengnah a saii atah te nen te anih hing ni. ²⁰ ‘Ka Boeipa kah longpuei tiktam pawh,’ na ti uh dae hlang he a longpuei tarhing ah ni nang Israel imkhui te lai kan tloek eh,” a ti.

Jerusalem kah Cungkunuh Olthang

²¹ Kaimih hlansol kah kum hlai nit hla rha hnin nga a lo vaengah Jerusalem lamkah hlangyong te kai taengla ha pawk tih, “Khopuei a tloek coeng,” a ti. ²² Hlangyong ha pawk hmai kah kholaeh ah BOEIPA kut te kai soah om coeng. Te dongah kai taengla aka pawk taengah mincang

due ka ka a ong. Ka ka a ong tangloeng vaengah tah ka khuep voel pawh.

Israel kah Boekoek Hmatoeng

²³ Te vaengah BOEIPA ol te kai taengah ha pawk tih, ²⁴ “Hlang capa aw, Israel khohmuen imrhong kah khosa rhoek loh, ‘Abraham pakhat bueng ni om tih khohmuen a pang mai. Tedae kaimih he yet ham he kamamih taengah khohmuen ni khoh la m'paek,” a ti uh. ²⁵ Te dongah amih taengah ka Boeipa Yahovah kah a thui he thui pah. Thii te na caak uh tih na mik te na mueirhol taengla na huel. Thii na kingling cingah nim khohmuen na pang eh? ²⁶ Na cunghang dongah na pangnal uh tih tueilaehkoi na saii uh. Hlang long he a hui kah yuu te na poeih uh cingah nim khohmuen na pang eh?

²⁷ Ka Boeipa Yahovah loh a thui he amih taengah thui pah. Hingnah khaw kamah coeng dongah imrhong khuikah rhoek te cunghang dongah cungku uh het mahpawt nim? Te phoeiah khohmuen hoeng kah te mulhing taengla ka paek vetih anih te a ngaeh ni. Rhalmahim khui neh lungko khuikah te khaw duektahaw nen ni a duek uh eh. ²⁸ Khohmuen te khopong neh a rhaerhap la ka khueh vetih a hoemdannah a sarhi a kangkuen sak ni. Te vaengah Israel tlang te pong vetih aka paan om mahpawh. ²⁹ Tedae BOEIPA kamah loh khohmuen te khopong neh rhaerhap la ka khueh khaw amamih kah tueilaehkoi cungkuem a saii uh dongah ni tila a ming uh bitni.

³⁰ “Nang hlang capa aw na pilnam paca loh nang te pangbueng kaep neh im thohka taengah n'thui uh. Hlang pakhat loh a manuca te kang a voek tih, ‘Lo laeh lamtah BOEIPA taeng lamkah hang khuen ol he hnatun uh,’ a ti. ³¹ Nang taengah khotlak pilnam bangla ha pawk uh van tih ka pilnam bangla na mikhmuh ah kho a sak uh. Na ol te a yaak uh van akhaw te te a vai uh moenih. A ka dongah hlampan uh ngawn cakhaw a lungbuei ah amamih kah mueluemnah dongah a pongpa te a phoe uh. ³² Nang te amih taengah sakthen ol neh hlampan laa banghui ni ne. Na ol yaak sak ham balh na tum akhaw te te aka vai a om uh hae moenih. ³³ Tedae te te ha pawk vaengah tah rheap ha pawk vetih amih lakli ah tonghma a om te a ming uh bitni,” a ti.

34

BOEIPA kah Boiva Aka Dawn

¹ BOEIPA ol kai taengla koep ha pawk tih,
² “Hlang capa Israel aka dawn taengah tonghma pah. Tonghma lamtah amih aka dawn taengah thui pah. Ka Boeipa Yahovah loh he ni a thui. Anunae Israel aka dawn rhoek khaw amamih aka luem la om uh tih boiva aka luem te dawn uh pawt mico? ³ A tha te na caak uh tih tumul te na bai uh. Na luem puei uh van pawt ah, boiva a toitup te na ngawn uh. ⁴ Aka nue te na moem uh pawt tih aka tlo te na toi uh pawh. Aka khaem te na khop uh pawt tih a heh uh te khaw na mael uh puei pawh. Aka milh te khaw na toem uh pawh. Tedae amih te mangkhak la, thama la na

buem uh. ⁵ Aka dawn a tal dongah taekyak uh tangloeng. A taek a yak vaengah tah khohmuen mulhing boeih kah cakok la poeh. ⁶ Ka boiva loh tlang tom neh som a sang tom ah palang uh. Diklai hman tom ah ka boiva loh a taekyak vaengah toem voel pawt tih tlap voel pawh.

⁷ Te dongah aka dawn rhoek loh BOEIPA ol te hnaton uh. ⁸ Kai tah hingnah ni tite Boeipa Yahovah kah olphong ni. Ka boiva te maeh la om mailai pawt nim? Ka boiva loh khohmuen mulhing boeih kah cakok la a poeh he khaw dawn voel pawt tih a toem pawt dongah ni. Ka boiva te ka dawn sak dae amamih aka dawn la luem tih ka boiva te dawn uh pawh. ⁹ Te dongah tu dawn rhoek loh BOEIPA ol hnaton uh.

¹⁰ Ka Boeipa Yahovah loh he ni a thui. Tu aka dawn rhoek te ka pai thil coeng tih amih kut lamkah ka boiva te ka toem ni. Amih te boiva aka luem puei lamloh ka paa sak daengah ni amamih ah aka dawn long khaw koep a luem thil uh pawt eh. Ka boiva te amih ka lamloh ka huul daengah ni amih kah cakok la a poeh pawt eh.

¹¹ Ka Boeipa Yahovah loh he ni a thui. Kai kamah loh ka boiva te ka toem ngawn vetih amih ka hnukdawn ni he. ¹² Te khohnin ah anih te a tuping aka dawn hnukdawnkung bangla taekyak tangtae a boiva lakli ah om ni. Ka boiva te ka hnukdawn vetih cingmai neh yinnah hnin ah a taek a yak nah hmuen boeih lamloh amih te ka huul ni. ¹³ Amih te pilnam lamloh ka khuen vetih amih te paeng tom lamloh ka coi ni. Amih te amamih khohmuen la ka thak vetih amih

Israel tlang kah sokca neh khohmuen tolrum cungkuem ah ka luem puei ni. ¹⁴ Amih te luemnah then neh ka luem puei vetih Israel tlang sang ah amih kah tolkhoeng om ni. Tolkhoeng then ah kol uh vetih Israel tlang kah luemnah dongah pulpulh luem uh ni. ¹⁵ Ka boiva te kamah loh ka luem puei vetih amih te kamah loh ka kol sak ni. He tah ka Boeipa Yahovah olphong ni. ¹⁶ Aka milh te ka toem vetih a heh tangtae te khaw ka mael puei ni. Aka khaem te ka poi pah vetih aka nue te tha ka caang sak ni. Tedae pulpulh aka tlungluen khaw ka mitmoeng sak vetih tiktamnah neh ka luem sak ni.

¹⁷ Nangmih ka boiva rhoek aw, ka Boeipa Yahovah loh he ni a thui. Kai loh tu neh tu laklo, tatal laklo neh kikong laklo ah lai ka tloek coeng he. ¹⁸ Luemnah then ah na luem uh te na yakvawt nim? Na luemnah coih te na kho neh na taelh. Tui cil na ok dae a coih te na kho neh na nu sak. ¹⁹ Nangmih kho loh a cawtkoi te ka boiva loh luem thil saeh lamtah nangmih kho loh a nookkoi te o saeh a?

²⁰ Te dongah ka boeipa Yahovah loh amih taengah he ni a thui. Kai kamah loh tu tha laklo neh tu pim laklo ah lai ka tloek ngawn ni. ²¹ Na vae neh, laengpang neh na nen uh tih na ki neh na thoeuh uh. Amih te boeih a muei hil vongvoel la na taek na yak uh. ²² Te dongah ka boiva te ka khang vetih maeh la om voel mahpawh. Tu neh tu laklo ah lai ka tloek. ²³ Amih aka dawn te pakhat ka thoh pah vetih amih te a luem puei ni. Ka sal David loh amih te a luem puei vetih amah

te amih aka dawn la om ni. ²⁴ BOEIPA kamah he amih taengah Pathen la ka om vetih ka sal David tah amih lakli ah khoboei la om ni. He he BOEIPA kamah long ni ka thui.

²⁵ Amih taengah rhoepnah paipi ka saii vetih boethae mulhing te diklai lamloh ka kangkuen sak ni. Te daengah ni khosoek ah ngaikhuek la kho a sak uh vetih duup ah a ih uh eh. ²⁶ Amih te ka som kaepvai kah yoethennah te ka paek ni. A tue vaengah khonal ka tueih vetih yoethennah khonal la om ni. ²⁷ Khohmuen thingkung loh a thaih te a paek vetih diklai loh a cangpai a paek ni. A khohmuen ah ngaikhuek la om uh vetih BOEIPA kamah he m'ming uh ni. Te vaengah amih kah hnamkun hnokohcung te ka haih pah vetih amih aka thotat sak kut lamloh amih ka huul ni. ²⁸ Namtom kah maeh la om uh voel pawt vetih amih te diklai mulhing loh dolh mahpawh. Ngaikhuek la kho a sak uh vetih lakueng uh mahpawh. ²⁹ A thingling ming te amih ham ka thoh ni. Te daengah ni khokha aka tlung khaw khohmuen ah om voel pawt vetih namtom taengah mingthae a phueih uh voel pawt eh. ³⁰ Te vaengah kai heamih taengkah a Pathen BOEIPA neh amih Israel imkhui khaw ka pilnam la a ming uh bitni. He tah ka Boeipa Yahovah kah olphong ni. ³¹ Nangmih tah kai kah boiva ni. Nangmih kah hlang te khaw ka rhamtlim khuikah boiva ni. Kai tah nangmih kah Pathen ni. He tah ka Boeipa Yahovah kah olphong ni," a ti.

35

Edom ham Olphong

¹ BOEIPA ol he kai taengla ha pawk bal tih,
² “Hlang capa aw, Seir tlang te na maelhmai khueh thil lamtah tonghma thil lah. ³ Ka Boeipa Yahovah loh a thui he a taengah thui pah. Kai loh Seir tlang nang te kam pai thil. Nang taengla ka kut kan thueng vetih nang te khopong neh rhaerhap la kang khueh ni.

⁴ Na khopuei te imrhong ka khueh vetih namah te khopong la na om vaengah kai he BOEIPA la nan ming bitni.

⁵ Nang ham kumhal kah thunkha thunhling la om ham neh thaesainah a tloihsoi tue kah a rhainah tue ah tah Israel ca rhoek te cunghang kut ah na lun. ⁶ Te dongah kai tah hingnah ni tite ka Boeipa Yahovah kah olphong ni. Na thii ham ka saii vetih thii loh namah n'hloem ni. A thii pawt te na hmuhuet dongah thii loh namah n'hloem ni. ⁷ Seir tlang te khopong phoeikah khopong la ka khueh vetih te lamkah aka voei aka bal khaw ka saii pueng ni. ⁸ A tlang te a rhok ka hah sak ni. Na som neh na kolrhawk khaw, na sokca boeih te cunghang dongah a rhok la cungk u h ni. ⁹ Nang te kumhal kah khopong la kang khueh tih na khopuei kah khosa loh kho a sak pawt vaengah kai he BOEIPA la nan ming uh bitni.

¹⁰ ‘Namtom rhoi neh khohmuen rhoi khaw ka taengah om vetih m'pang uh bitni,’ na ti sitoe cakhaw BOEIPA om lah lahko te. ¹¹ Te dongah

kai tah hingnah ni tite ka Boeipa Yahovah kah olphong ni. Na thintoek tarhing neh na that-lainah tarhing ah kan saii ni. Na hmuhuetnah neh amih na saii dongah nang lai kan tloek vaengkah bangla amih taengah ka phoe ni. ¹² Te vaengah kai he BOEIPA la nan ming bitni. Nang kah kokhannah cungkuem te ka yaak coeng. Israel tlang rhoek te na voek vaengah tah, "Pong tah pong uh tih kaimih taengah cakkoi la tloeng uh coeng,' na ti. ¹³ Na ka nen tah kai taengah na khuet van tih na ol neh kai taengah na rhoekoe aih khaw kamah loh ka yaak ta. ¹⁴ Ka Boeipa Yahovah loh he ni a thui. Diklai pum ko a hoe vaengah nang te khopong kang khueh ni. ¹⁵ Israel imkhui kah rho a pong vaengkah te na kohoenah van dongah nang te kan saii ni. Seir tlang neh Edom pum te khopong la boeih na om vaengah kai he BOEIPA la a ming uh bitni," a ti.

36

Israel Tlang Thohkoepnah

¹ Nang hlang capa loh Israel tlang te tonghma thil laeh lamtah Israel tlang te, 'BOEIPA ol hnatun,' ti nah.

² Ka Boeipa Yahovah loh he ni a thui. Na thunkha loh, 'Khuih ka khosuen hmuensang rhoek khaw kaimih ham khoh la om coeng,' a ti lah ko. ³ Te dongah tonghma lamtah ka Boeipa Yahovah loh a thui he thui laeh. Na pong ham neh kaepvai lamloh nangmih te hloem ham om coeng. Namtom kah a meet ham khoh na om ni. Pilnam kah ol neh theetnah kamhloei ah ni

na pongpa coeng. ⁴ Te dongah Israel tlang rhoek ka Boeipa Yahovah ol he hnatun uh. Ka Boeipa Yahovah loh tlang taeng neh som taengah, sokca taeng neh kolrhawk taengah, imrhong aka pong ham neh khopuei a hnoo taengah he ni a thui. A kaepvai kah namtom a meet kah maeh neh tандаengnah ham ni a om uh. ⁵ Te dongah ka Boeipa Yahovah loh he ni a thui. Namtom a meet te ka thatlainah hmai neh ka voek het mahpawt nim? Edom long khaw ka khohmuen te a pum la kohoenah neh amamih ham khoh la a khueh uh. Thinko boeih lamloh hinglu kah uetnah neh maeh la a haek uh. ⁶ Te dongah Israel khohmuen te tonghma thil lamtah tlang taeng neh som taengah khaw, sokca taeng neh kolrhawk taengah thui pah. Ka Boeipa Yahovah loh he ni a thui. Namtom taengkah mingthae na phueih dongah ni kai loh ka thatlainah neh, ka kosi neh ka thui. ⁷ Te dongah ka Boeipa Yahovah loh he ni a thui. Kai loh ka kut te namtom ka thueng thil pawt koinih nangmih te a kaepvai ah amih kah mingthae ni a phueih uh eh.

⁸ Tedae nang Israel tlang tah na pae na voeih vetih ka pilnam Israel ham ha pawk tom coeng dongah na thaih khaw thai ni. ⁹ Kai he nangmih taengkah coeng dongah, nang taengla ka hooi vaengah n'thohtat thil uh vetih n'tawn uh ni.

¹⁰ Israel imkhui tom kah hlang te a pum la nangmih soah ka pung sak vetih khosa rhoek loh khopuei neh imrhong te a thoh uh. ¹¹ Nangmih soah hlang neh rhamsa khaw ka ping sak vetih a ping uh neh pungtai uh ni. Nangmih te namah hmuen la kho kan sak sak vetih nangmih te a

tongnah lakah kan hoeikhang sak ni. Te vaengah kai he BOEIPA la nan ming uh bitni. ¹² Nangmih soah ka pilnam Israel hlang te ka pongpa sak vetih nang m'pang uh ni. Amih taengah rho la na om vetih amih cakol te koep na koei mahpawh.

¹³ Ka Boeipa Yahovah loh he ni a thui. Nangmih te hlang aka yoop na ti uh dongah na namtu khuiah namtu cakol la na om uh. ¹⁴ Te dongah hlang loh n'yoop voel mahpawh. Namtom neh na namtu taengah na cakol rhoe na cakol voel mahpawh. He tah ka Boeipa Yahovah kah olphong ni. ¹⁵ Namtom taengkah na mingthae te kan yaak sak voel pawt vetih pilnam kah kokhahnah na phuei voel mahpawh. Namtom neh na namtu m'paloe sak voel mahpawh. He tah Boeipa Yahovah kah olphong ni," a ti.

Israel Pilnam Thohnah

¹⁶ BOEIPA ol te kai taengla ha pawk bal tih, ¹⁷ "Hlang capa aw, amih khohmuen kah khosa Israel imkhui neh amih khosing, amih kah khoboe rhamlang nen ni khohmuen a poeih uh. Amih kah longpuei te ka mikhmuh ah pumom kah a tihnai bangla om. ¹⁸ Khohmuen ah thii a long sak uh tih a mueirhol neh a poeih uh dongah ni amih soah ka kosi ka hawk van. ¹⁹ Amih te namtom taengah ka taek ka yak tih diklai ah haeh uh. A longpuei tarhing neh a khoboe rhamlang bangla amih te lai ka tloek. ²⁰ Tedae namtom te a paan tih pahoi ha pawk uh te khaw ka ming cim ni a poeih. Amih te BOEIPA kah pilnam a ti ngawn dae a khohmuen lamloh coe uh. ²¹ Te dongah ka cimcainah ming dongah ka lungma coeng.

Te te a poeih uh dongah ni Israel imkhui khaw namtom taengla pahoi a pawk uh te.

²² Te dongah ka Boeipa Yahovah loh a thui he Israel imkhui taengah thui pah. Israel imkhui ka saii te nangmih ham moenih. Tedae pahoi na caeh nah ah ka cimcaihnah ming te namtom taengah na poeih dongah ni. ²³ Namtom taengkah a poeih ka ming tanglue te ka ciim ni. Te te amih lakli ah na poeih cakhaw namtom loh kai he YAHWEH ni tila a ming uh bitni. He tah ka Boeipa Yahovah kah olphong ni. Nangmih rhangneh amih mikhmuh ah ka ciim uh ni.

²⁴ Nangmih te namtom lamloh kan loh vetih nangmih te diklai pum lamloh kan coi ni. Te vaengah nangmih te namah khohmuen la kan thak ni. ²⁵ Nangmih soah tui cil kang haeh vetih na tihnai cungkuem lamloh caihcil uh ni. Nangmih te na mueirhol cungkuem lamloh kan caihcil sak ni. ²⁶ nangmih te lungbuei thai kan paek vetih na khui ah mueihla thai ka khueh phoeiah nangmih pumsa kah lungto lungbuei te ka khoe vetih ngansen lungbuei te nangmih kan paek ni. ²⁷ Ka mueihla te na kotak ah kam paek ni. Te te ka saii vaengah ka oltlueh neh na pongpa uh vetih ka laitloeknah te ngaituyen neh na vai uh bitni. ²⁸ Na pa rhoek taengah ka paek khohmuen ah kho na sak uh ni. Kamah taengah pilnam la na om uh vetih kai khaw nangmih taengah Pathen la ka om ni. ²⁹ Nangmih te na tihnai cungkuem lamloh kang khang vetih cangpai la kang khue ni. Te te kang kum sak

bal vetih nangmih soah khokha kang khueh mahpawh. ³⁰ Thing thaih neh khohmuen thaih te ka thawt sak ni. Te daengah ni khokha kah kokhahnah loh namtom taengah koep n'loh uh pawt eh.

³¹ Te vaengah na boethae longpuei neh na khoboe aka then pawt te na poek ni. Nangmih kah thaesainah neh nangmih tueilaehkoi dongah namamih mikhmuh ah te na ko-oek uh ni. ³² Nangmih ham ka saii hlan. He tah ka Boeipa Yahovah kah olphong ni. Nangmih te m'ming kuekluek saeh. Israel imkhui aw na longpuei ah yahpok neh hmaithae sak laeh. ³³ Ka Boeipa Yahovah loh he ni a thui. Nangmih te na thaesainah cungkuem lamloh kan caihcil khohnin ah tah khopuei te kho kan sak sak vetih imrhong te a thoh uh ni. ³⁴ Khohmuen aka pong tih aka pah tom kah mikhmuh ah khopong la aka om te lat a tawn ni. ³⁵ Te vaengah, "Khohmuen aka pong he Eden dum bangla om. Khopuei rhoek tah kaksap coeng tih pong coeng. A koengloeng rhoek loh cakrhuet la kho a sak uh," a ti uh ni.

³⁶ Te vaengah kai BOEIPA loh a koengloeng tangtae khaw ka thoh tih aka pong khaw ka tawn te na kaepvai kah aka sueng namtom loh a ming ni. Kai BOEIPA loh ka thui bangla ka saii ni. ³⁷ Ka Boeipa Yahovah loh he ni a thui. Amih kah saii pah ham te Israel imkhui he koep ka toem vetih amih te hlang tuping bangla ka ping sak ni.

³⁸ A khoning vaengah hmuencim kah boiva tah Jerusalem boiva bangla om ni. Hlang kah boiva

aka bae khopuei rhoek he a kaksap la om vetih kai he BOEIPA tila a ming uh ni.

37

Kolrhawk kah Maeh Hlang Rhuh

¹ BOEIPA kut te kai soah om. Te vaengah BOEIPA Mueihla loh kai n'khuen tih kolbawn khui la kai n'khueh hatah a rhuhrhong bae muep. ² Kai te te lakli lamloh a kaep a kaep ah n'thak. Te vaengah kolbawn hman kah te bahoeng yet tih koh aih coeng he. ³ Te vaengah kai te, 'Hlang capa he kah a rhuh he hing aya?' a ti. Tedae, "Ka Boeipa Yahovah, namah loh na ming," ka ti nah.

⁴ Te phoeiah kai te he rhuhrhong taengah tonghma lamtah a rhuh koh rhoek te, 'BOEIPA ol hnatan lah,' ti nah.

⁵ He kah rhuhrhong taengah ka Boeipa Yahovah loh he ni a thui. Kai loh nangmih khuila mueihla kan khuen dongah na hing ni.

⁶ Nangmih soah tharhui kang khueh vetih nangmih soah pumsa ka soe sak ni. Nangmih soah na vin ka saibawn sak vetih na khuiah mueihla kam paek ni. Te daengah ni na hing uh vetih kai he BOEIPA la nan ming uh eh," a ti.

⁷ Te dongah n'uen bangla ka tonghma tih ka tonghma vanbangla ol om. Te vaengah hinghuennah tarha om. Te vaengah rhuh rhoek khaw, a rhuh te a rhuh taengla cet uh. ⁸ Te vaengah ka sawt hatah a soah tharhui neh a saa tarha soe. Te so ah te a vin loh a saibawn thil dae a khuiah mueihla om pawh. ⁹ Te vaengah kai taengah, "Mueihla te tonghma thil, hlang

capa aw tonghma lamtah, yilh te thui pah. Ka Boeipa Yahovah loh he ni a thui. Hmuen pali lamkah yilh aw ha pawk laeh. Mueihla te he a khuila a ueng daengah ni a ngawn rhoek he a hing eh,” a ti. ¹⁰ Kai n'uen bangla ka tonghma tangloeng vaengah amih khuila mueihla kun. Te vaengah hing uh tih amamih kho dongah bahoeng, bahoeng tatthai tanglue la pai uh.

¹¹ Te phoeiah kai taengah, “Hlang capa aw, hekah rhuh he Israel imkhui pum coeng ni. Amih loh, ‘Kaimih rhuh he rhae tih kaimih kah ngaiuepnah paltham coeng, mamih he n'tuiphih coeng,’ a ti uh lah ko te. ¹² Te dongah tonghma lamtah amih te thui pah. Ka Boeipa Yahovah loh he ni a thui. Kai loh na phuel te ka ong tih ka pilnam namah kah phuel lamloh nangmih kan doek ni. Te vaengah nangmih te Israel khohmuen la kam pawk puei ni. ¹³ Te vaengah kai he BOEIPA la nan ming uh bitni. Na phuel te ka ong tih ka pilnam nangmih te na phuel lamloh nangmih kan doek ni. ¹⁴ Nangmih ah ka Mueihla kam paek vetih na hing uh ni. Nangmih te na khohmuen ah kang khueh vaengah BOEIPA kamah loh ka thui tih BOEIPA kah olphong ka vai te na ming uh bitni,” a ti.

Israel kah Cingcuinah

¹⁵ BOEIPA ol te kai taengah ha pawk bal tih, ¹⁶ “Nang hlang capa aw namah ham thing pakhat lo lamtah a soah Judah ham neh Israel ca rhoek kah a hui, a hui ham daek pah. Thing pakhat te lo bal lamtah a soah Ephraim thing Joseph ham neh

Israel imkhui boeih kah a hui a hui ham daek pah. ¹⁷ Te rhoi te khat neh khat namah ham thing pakhat la cong lah. Na kut dongah pakhat la om bitni. ¹⁸ Te van bangla nang taengah na pilnam paca loh m'voek tih, 'Kaimih taengah na thui mahpawt nim? Na taengkah rhoek te balae? a ti uh ni. ¹⁹ Amih te thui pah. Ka Boeipa Yahovah loh he ni a thui. Kai loh Ephraim kut kah Joseph thing neh Israel koca a hui a hui te ka loh coeng ne. Te rhoi te Judah thing neh ka khueh vetih thing pakhat la ka saii ni. Ka kut dongah pakhat la om ni.

²⁰ A soah na kut neh na daek thing rhoek te amih mikhmuh ah om saeh. ²¹ Te dongah amih te thui pah. Ka Boeipa Yahovah loh he ni a thui. Israel ca rhoek te a pongpa nah namtom lakli lamloh ka loh coeng ne. Amih te a kaepvai lamloh ka coi vetih amih te amamih khohmuen la ka pawk puei ni. ²² Amih te Israel tlang kah khohmuen ah namtu pakhat la ka khueh ni. Manghai pakhat te amih boeih soah manghai la om ni. Namtu te panit la koep om rhoe om mahpawh. Ram te panit la koep koep boel uh mahpawh. ²³ A mueirhol neh, a sarhingkoi neh, a boekoek boeih neh koep poeih uh mahpawh. Amih te a tolrum cungkuem lamloh ka khang ni. Te nen te tholh uh cakhaw amih te ka caihcil ni. Kamah taengah pilnam la om uh vetih kai khaw amih taengah Pathen la ka om ni. ²⁴ Ka sal David tah amih soah manghai tih amih boeih aka dawn te pakhat ni a om eh. Te vaengah ka laitloeknah dongah pongpa uh vetih ka khosing

te ngaithuen neh a saii uh ni.

²⁵ Ka sal Jakob taengah ka paek khohmuen ah kho a sak uh ni. Te ah te ni na pa rhoek loh kho a sak uh. A khuiah amih neh a ca rhoek khaw, a ca rhoek kah ca rhoek khaw kumhal duela kho a sak ni. Ka sal David amih kah kumhal khoboei la om ni. ²⁶ Amih neh rhoepnah paipi ka saii vetih amih taengah kumhal kah paipi la om ni. Amih te ka khueh tih ka ping sak phoeiah ka rhokso te kumhal due amih lakli ah ka khueh ni. ²⁷ Ka dungtlungim tah amih neh om ni. Amih taengah Pathen la ka om vetih amih khaw kamah taengah pilnam la om uh ni. ²⁸ Te vaengah namtom loh kai he BOEIPA la a ming uh ni. Israel te ka ciim phoeiah tah ka rhokso he amih lakli ah ni kumhal due a om eh," a ti.

38

Gog Tah Yawk coeng

¹ BOEIPA ol kai taengah ha pawk tih, ² "Hlang capa aw Meshek neh Tubal lu kah khoboei, Magog khohmuen kah Gog te na maelhmai khueh thil lamtah anih te tonghma thil lah. ³ Te vaengah ka Boeipa Yahovah loh a thui he thui pah. Meshek neh Tubal lu kah khoboei Gog nang te kam pai thil coeng he. ⁴ Nang te kam mael sak vetih na kam ah thisum kan dueh ni. Namah neh na caem boeih, marhang neh amih pueinak aka soep marhang caem boeih, photlinglen neh photlingca aka hlangping a yet khaw, amih cunghang aka muk boeih khaw ka khuen ni. ⁵ Persia, Kusah neh, Put loh amih taengah a pum

la photling neh lumuek a muk uh. ⁶ Gomer neh a caembong boeih, tlangpuei tlanghlaep kah Togarmah imkhui neh a caembong boeih neh na taengah pilnam khaw muep om uh.

⁷ Namah ham te cikngae rhoe cikngae saeh. Namah neh na hlangping boeih loh nang taengah aka tingtun. Tedae amamih te thongim la poeh bitni. ⁸ A tue a sen phoeiah na cawh ngawn ni. Hmailong kum ah tah cunghang lamkah aka mael loh khohmuen la na pawk ni. Pilnam lamloh Israel tlang la pawk tingtun uh ni. Te ah te imrhong bangla puet om uh cakhaw pilnam lamloh a khuen tih ngaikhuek la boeih kho a sak uh. ⁹ Khohli rhamrhael bangla na cet vetih khohmuen te thing ham cingmai bangla na pawk ni. Te vaengah namah khaw na caembong boeih neh na taengkah pilnam hlangping neh na om ni.

¹⁰ Ka Boeipa Yahovah loh he ni a thui. Te khohnin ah tah na thinko ah ol ha cuen vetih kopoe k thae te na moeh ni. ¹¹ Te vaengah, 'Khohmuen vongah te ka paan vetih amih ngaikhuek la kho aka sa boeih te a mong la ka pawk bitni. Vongtung om mueh la kho a sak uh tih thohkalth neh thohkhaih khaw amih taengah om pawh,' na ti bitni. ¹² Kutbuem la buem ham neh maeh la poelyoe ham, imrhong kah khosa taengah neh pilnam taengah na kut thuung ham, boiva aka khueh namtom neh diklai laktung ah khosa rhoek kah hnopai te coi ham om. ¹³ Sheba neh Dedan khaw, Tarshish kah aka thenpom neh a sathuengca boeih loh nang taengah, 'Nang tah kutbuem buem ham maco na pawk? Maeh la

poelyoe ham bal maco? Cak neh sui phuei ham, boiva loh ham neh hnopai te kutbuem muep buem ham ni na hlangping na tingtun sak,' a ti uh ni.

¹⁴ Te dongah hlang capa aw tonghma lamtah Gog te thui pah. Ka Boeipa Yahovah loh he ni a thui. Te khohnin ah ka pilnam Israel loh ngaikhuek la kho a sak vaengkah te na ming mahpawt nim. ¹⁵ Na tlangpuei tlanghlaep lamkah namah hmuen lamloh na pawk vetih na taengah pilnam khaw yet ni. Amih boeih tah marhang dongah hlangping tanglue neh tatthai boeiping la ngol uh. ¹⁶ Cingmai loh diklai a thing bangla ka pilnam Israel te na paan ni. Hmailong khohnin ah ha thoeng bitni. Nang te ka khohmuen la kam pawk sak daengah ni namtom loh kai he m'ming eh. Gog nang lamloh amih mikhmuh ah ka ciim uh pueng ni.

¹⁷ Ka Boeipa Yahovah loh he ni a thui. Yan khohnin ah ka sal Israel kah tonghma rhoek kut ah ka voek te nang pai a? Nang te amih taengla khuen ham a kum khohnin neh ana tonghma uh.

¹⁸ Te khohnin ah tah Gog loh Israel khohmuen a paan khohnin te om ni. He tah Boeipa Yahovah kah olphong ni. Ka kosi he ka thintoek ah ni a phoe eh. ¹⁹ Ka thatlainah neh, ka thinpom hmai neh ka thui coeng. Te khohnin ah Israel khohmuen he lingluei muep om het mahpawt nim?

²⁰ Tuipuei nga rhoek neh vaan kah vaa khaw, khohmuen mulhing neh diklai ah aka colh rhulcai boeih, diklai maelhmai kah hlang boeih khaw ka mikhmuh ah hinghuen uh ni. Tlang rhoek te koengloeng uh vetih longpoeng rhoek

khaw cungk u h ni. Vongtung boeih khaw diklai la cungk ni. ²¹ Anih te ka tlang tom ah cunghang ka khue thil ni. He tah ka Boeipa Yahovah kah olphong ni. Hlang kah cunghang loh a manuca a cuk thil ni. ²² Anih soah duektahaw neh, thii neh, khonal aka long neh, rhael lung hmai neh lai ka tloek ni. Amah so neh a caembong soah khaw a taengkah pilnam boeiping soah kat ka tlan sak ni. ²³ Ka pantai tih ka ciim uh phoeiah namtom boeiping mikhmuh ah ka phoe vaengah kai he BOEIPA la a ming uh ni.

39

Gog kah Rhaenghmuen

¹ Nang hlang capa, Gog te tonghma thil lamtah ka Boeipa Yahovah loh a thui he thui pah. Kai loh Meshek neh Tubal lu kah khoboei Gog nang kam pai thil coeng ne. ² Nang te kam mael sak vetih nang te kang khool ni. Nang te tlangpuei tlanghlaep lamloh kan caeh puei vetih nang te Israel tlang la kam pawk sak ni. ³ Na banvoei kut lamkah na lii te ka tloek vetih na bantang kut lamkah na thaltang ka rhul sak ni. ⁴ Namah neh na caembong boeih te Israel tlang ah na cungk vetih na taengkah pilnam te phae cungkum aka khueh vatlung vaa taeng neh nang te khohmuem mulhing taengah cakkoi la kam voeih ni. ⁵ Ka Boeipa Yahovah kah olphong he ka thui coeng dongah khohmuem maelhmai ah ni na cungk eh.

⁶ Magog so neh sanglak rhoek kah ngaikhuek la khosa rhoek soah hmai ka tueih vaengah kai he

BOEIPA la a ming uh bitni. ⁷ Ka cimcaihnah ming he ka pilnam Israel lakli ah ka ming sak vetih ka cimcaihnah ming te koep ka poeih mahpawh. Te vaengah namtom loh BOEIPA kamah he Israel khuikah aka cim la a ming uh ni. ⁸ Ha pawk coeng tih ka Boeipa Yahovah kah olphong tah thoeng coeng he. He khohnin ni ka thui.

⁹ Te dongah Israel khopuei kah khosa rhoek tah cet uh vetih a toih uh ni. Lungpok haica neh photlingca, photlinglen khaw, lii neh thaltang khaw, kut dongkah cungkui neh cai a cum thil ni. Te rhoek te hmai dongah kum rhih a toih ni. ¹⁰ Khohmuen lamkah thing te phuei uh pawt vetih duup lamkah khaw top uh mahpawh. Lungpok haica te hmai la a toih uh vetih a buem tueng te a buem uh ni, a poelyoe tueng te a poelyoe uh ni. He tah ka Boeipa Yahovah kah olphong ni.

¹¹ Te kah khohnin a pha vaengah Israel kah tuihuei kothoeng aka paan kolrhawk te Gog kah phuel hmuen la ka khueh ni. Gog neh a hlangping boeih te pahoi a up ham dongah aka cet rhoek te a tlaeng vetih Hamongog a sui uh ni. ¹² Khohmuen caihcil sak ham amih te Israel imkhui loh hla rhih khuiah a up uh ni. ¹³ Khohmuen pilnam boeih loh a up uh vetih ka thangpom khohnin ah tah amih ming te om ni. He tah ka Boeipa Yahovah kah olphong ni.

¹⁴ Hlang rhoek te khohmuen kah aka pah up ham neh diklai hman kah aka sueng te hildong ham a hoep taitu vetih hla rhih a bawtnah hil te caihcil ham a khe ni. ¹⁵ Khohmuen ah aka pah loh a pah uh vaengah hlang rhuh a hmuh

vetih te aka up loh Hamongog ah a up hlan due a kaepah pangkae a ling uh ni. ¹⁶ Khopuei ming khaw Hamonah la a khue daengah ni khohmuen a caihcil uh pueng eh.

¹⁷ Nang hlang capa aw, ka Boeipa Yahovah loh he ni a thui. Vaa neh phae aka khueh boeih taengah khaw, khohmuen mulhing cungkuem taengah khaw thui laeh. Coi uh thae lamtah ham paan uh laeh. A kaepvai lamloh ka hmueih taengla coi uh thae laeh. Israel tlang soah nangmih ham hmueih tanglue ka ngawn coeng. Te dongah a saa na caak uh vetih a thii na ok uh ni. ¹⁸ Hlangrhalh saa na caak uh vetih diklai khoboei rhoek kah thii te na ok uh ni. Te boeih te tuca total neh Bashan kah vaito kikong a puetsuet banghui coeng ni. ¹⁹ A cungnah hil a tha na caak uh vetih a rhuihahnah hil a thii na ok uh ni. Ka hmueih he nangmih ham ni ka ngawn. ²⁰ Ka caboei dongah marhang neh hlangrhalh kah leng khaw, caemtloek hlang boeih khaw na cung uh ni. He tah ka Boeipa Yahovah kah olphong ni.

Pathen Taengla Israel Maelnah

²¹ Ka thangpomnah te namtom taengah ka khueh vetih ka laitloeknah ka saii vaengah amih soah ka kut ka tloeng te namtom rhoek loh boeih a hmuh ni. ²² Te vaengah Israel imkhui loh a ming bitni. Kai BOEIPA Pathen he te khohnin lamloh a voel hil khaw amih kah Pathen ni. ²³ Te vaengah Israel imkhui loh kai taengah vikvawk uh tih amamih kah thaesainah dongah a poelyoe

uh te namtom rhoek loh a ming uh ni. Te dongah ni ka maelhmai he amih taeng lamloh ka thuh. Te vaengah amih te a rhal kut ah ka tloeng tih a pum la cunghang dongah cungku uh. ²⁴ Amih kah a tihnai tarhing neh a boekoek tarhing ah amih te ka saii tih amih taeng lamloh ka maelhmai ka thuh.

²⁵ Te dongah ka Boeipa Yahovah loh he ni a thui. Jakob kah thongtla, thongtla te ka mael puei pawn vetih Israel imkhui boeih ka haidam ni. Te dongah ka ming cim ham ni ka thatlai.

²⁶ Te vaengah amamih kah mingthae neh a boekoeknah la kai taengah boe a koek uh te boeih a hnilh uh ni. Amih te amamih khohmuen ah ngaikhuek la kho a sak vetih lakueng uh mahpawh. ²⁷ Amih te pilnam lamloh ka mael puei tih amih te a thunkha khohmuen lamkah ka coi. Amih lamlong ni namtom boeiping kah mikhmuh ah khaw ka ciim uh eh. ²⁸ Te vaengah ni kai BOEIPA he amamih kah Pathen la a ming uh eh. Amih te namtom taengah ka poelyoe sitioe cakhaw a khohmuen la amih te ka calui vetih amih te koep ka hmaai mahpawh.

²⁹ Israel imkhui te ka Mueihla ka lun thil coeng dongah ka maelhmai he amih lamloh ka thuh voel mahpawh. He tah Boeipa Yahovah kah olphong ni," a ti.

40

Im Thai

¹ Kaimih hlangsol kah kum kul neh nga, khopuei a tloek hnuk kah kum hlai li nah, kum a tongnah kah hla rha lo coeng. Te khohnin ah

kuelhuelh ah BOEIPA kut te kai soah om tih kai te pahoi ng'khuen te. ² Pathen kah mangthuinah neh Israel khohmuen la kai n'khuen. Te vaengah kai te tlang sang tangkik ah n'duem sak tih a sokah tuithim ah khopuei mueimae bang om. ³ Kai te pahoi m'pawk puei vaengah tah hlang kah a mueimae mah rhohum kah mueimae bangla tarha om. Te vaengah amah te a kut dongkah hlamik hamnak, capu cungnueh neh vongka ah pai. ⁴ Te vaengah kai te, "Hlang capa kah a hlang aw, na mik neh hmu lamtah na hna neh ya lah. Kai loh nang kan tueng boeih te na lungbuei ah khueh lah. Israel imkhui ah na hmuh boeih puen pah. Te te nang tueng ham ni hela n'khuen.

Vongtung neh Vongka

⁵ Im vongvoel vongtung aih he a kaep a kaep ah hlang kut kah capu cungnueh neh a dong la dong rhuk kutsom pakhat lo. Buengngol kah a daang te capu pakhat phoeiah capu pakhat a sang la a nueh. ⁶ Te phoeiah kothoeng longpuei la maelhmai aka mang vongka te a paan tih a tangtlaeng so, a tangtlaeng soah luei. Te vaengah vongka kah cingkhah te a daang capu pakhat neh a nueh tih cingkhah pakhat te a daang capu pakhat om. ⁷ Tanhnaem te a yun capu khat neh a daang khaw capu khat sen. Tanhnaem laklo te dong nga ka tih vongka cingkhah taengkah, im vongka kah ngalha khaw capu pakhat sen bal. ⁸ Im lamloh vongka kah ngalha te capu pakhat la a nueh bal. ⁹ Vongka kah ngalha te a dong ah

dong rhet la a nueh. Im hmai ah vongka ngalha dongkah ngalhatung te dong nit lo.

¹⁰ Vongka tanhnaem te kothoeng longpuei heben ah pathum, keben ah pathum om tih a pathum la a pum vai uh. Ngalhatung ham heben kah neh keben kah te a sang pakhat la om. ¹¹ Te phoeiah vongka thohka te a daang dong rha neh vongka kah a yun te dong hlai thum la a nueh. ¹² Tanhnaem hmai kah longkhawn te dong khat lo tih voeviang kah longkhawn khaw dong khat lo. Te dongah tanhnaem te khatben ah dong rhuk, khatben ah dong rhuk lo. ¹³ Te phoeiah a vongka tanhnaem impu lamloh impu duela a daang a dong pakul panga la a nueh. thohka neh thohka te tah hmaitoh uh rhoi. ¹⁴ Ngalhatung te vongup vongka kaep, kaep kah ngalhatung hil dong sawmrhuk a khueh. ¹⁵ Vongka hmai lamloh vongka ngalha hmai duela a khuirhai neh a khuirhai a dong sawmnga khui. ¹⁶ Tanhnaem neh a ngalhatung dongkah bangbuet caek tih vongka khuiben kah a kaep kaep ah om. Te dongah ngalha ham neh bangbuet khui kah a kaep kaep tah, ngalhatung dongah rhophoe a khueh uh.

Vongup

¹⁷ Te phoeiah kai te vongup khuila voelh n'khuen hatah imkhan khaw lungphaih tarha ana khueh. Vongup kaep kaep ah lungphaih hoengla imkhan sawmthum om. ¹⁸ Vongka hlaep lungphaih neh vongka dang kah lungphaih tah voeviang ah a yun thikat. ¹⁹ Te phoeiah a dang vongka hmai lamloh a khui vongup hmai duela

poenghman ah kothoeng tlangpuei a daang te dong yakhat la a nueh.

Tlangpuei Vongka

²⁰ Te phoeiah a vongka hmai te tlangpuei longpuei vongup voel duela a yun neh a daang a nueh. ²¹ A tanhnaem khaw khatben ah tanhnaem pathum, khatben ah ngalhatung pathum om. Ngalhatung soah ngalha a tloeng. A ngalha te a yun te lamhma kah vongka bangla om. A yun dong sawmnga neh a daang te dong pakul panga lo. ²² A bangbuet, bangbuet neh a ngalha, a ngalha te rhophoe tlip a khueh. Te te kothoeng longpuei la a maelhmai aka hooi vongka neh a sang vai uh. Te lam te tangtlaeng parhih neh cet uh. Te vaengah a ngalha neh a ngalha te hmaitoh uh rhoi. ²³ A khui vongup kah vongka loh tlangpuei neh kothoeng kah vongka te a hmaitoh. Te dongah vongka pakhat lamloh vongka pakhat hil te dong yakhat la a nueh.

Tuithim Vongka

²⁴ Te phoeiah kai te tuithim longpuei la m'mawt hatah tuithim longpuei kah vongka te kak ka hmuh. Te vaengah a ngalhatung neh a ngalhatung khaw a ngalha neh a ngalha khaw cungnueh pakhat la om. ²⁵ A bangbuet khaw a ngalha, a ngalha kaep kaep kah bangbuet bangla om. Te rhoek te a yun dong sawmnga neh a daang dong pakul panga lo. ²⁶ A tangkham, a tangkham te tangtlaeng parhih tlip om. A ngalha neh a ngalha te hmaitoh uh bal. A ngalhatung, a ngalhatung soah rhophoe te khatben ah pakhat, khatben ah khaw pakhat om bal. ²⁷ Tuithim

longpuei kah vongup khui ah khaw vongka om bal. Tuithim longpuei kah vongka khat lamloh vongka khat hil te dong yakhat la a nueh.

Khuiben Thohka

²⁸ Te phoeiah kai te tuithim vongka longah vongup khui la n'khuen. Te vaengah tuithim vongka te te rhoek kah cungnueh tarhing la a nueh. ²⁹ A tanhnaem neh a tanhnaem khaw, a ngalhatung neh a ngalhatung khaw, a ngalha neh a ngalha khaw cungnueh pakhat la om uh. A bangbuet bal khaw a ngalha, a ngalha kaep kaep ah om tih a yun dong sawmnga neh a daang dong kul dong nga lo. ³⁰ Ngalha kaep kaep ah a yun dong pakul panga neh a daang dong nga om. ³¹ A ngalha vong voel la a hmaitoh tih a ngalhatung, a ngalhatung dongah rhophoe om. A taengkah tangkham, tangkham ah tangtlaeng parhet om.

³² Te phoeiah kai te kthoeng longpuei kah vongup khui la n'khuen tih vongka te a cungnueh tarhing la a nueh. ³³ A tanhnaem neh a tanhnaem khaw, a taengkah a ngalhatung khaw, a ngalha neh a ngalha khaw cungnueh pakhat la a khueh. A bangbuet khaw a ngalha, a ngalha kaep kaep ah a yun dong sawmnga neh a daang dong kul dong nga om. ³⁴ A ngalha neh a ngalha te vongup voel ah hmaitoh uh rhoi. A ngalhatung, a ngalha so tah khatben ah khaw khatben ah khaw rhophoe tlip om. Te vaengah a tangkham, a tangkham tah tangtlaeng parhet a boh.

³⁵ Te phoeiah kai te tlangpuei vongka la n'khuen tih te rhoek cungnueh tarhing ah a

nueh. ³⁶ A tanhnaem neh a tanhnaem khaw, a ngalhatung neh a ngalhatung khaw, a ngalha neh a ngalha khaw vai uh. A bangbuet te a kaep kaep ah a yun dong sawmnga neh a daang dong kul dong nga lo. ³⁷ A ngalhatung neh a ngalhatung te vongtung voel ah hmaitoh uh. A ngalhatung, a ngalhatung so te khatben ah khaw khatben ah khaw rhophoe tlip a khueh tih a tangkham a tangkham ah tangtlaeng parhet a boh.

Hmueih Tawnnah Imkhan

³⁸ Vongka ngalha taengkah imkhan thohka ah hmueihhlutnah te pahoi a hoek uh. ³⁹ Vongka ngalha khuikah khatben ah caboei panit, khatben ah caboei panit om bal. Te rhoek soah ni hmueihhlutnah neh boirhaem khaw hmaithenah khaw a ngawn. ⁴⁰ Tlangpuei vongka kah thohka la aka cet ham vongvoel hlaep ah khaw caboei panit om tih vongka kah ngalha hlaep ah caboei a tloe panit om bal. ⁴¹ Tekah khatben ah caboei pali neh khatben ah caboei pali om. Te dongah vongka hael kah caboei parhet soah maeh a ngawn uh. ⁴² Hmueihhlutnah ham caboei pali te lungrhah lung neh a saii tih pakhat te a yun dong khat phoeiah tintan, a daang dong khat phoeiah tintan, a sang dong khat lo. A soah ah hmueihhlutnah neh hmueih a ngawn vaengkah hnopai te a tloeng uh. ⁴³ Imkhui te a kaep kaep ah lingvawt kutsom pakhat tlip a ten tih caboei soah nawnnah maeh te a tloeng.

Khosoih Rhoek Kah Imkhan

⁴⁴ Vongka a voel kah imkhan khui ah vongup khui kah aka hlai rhoek te tlangpuei vongka hael ah om. Te vaengah a maelhmai te tuithim longpuei la a hooi. Khothoeng vongka hael kah pakhat long tah a maelhmai te tlangpuei longpuei la a hooi. ⁴⁵ Te vaengah kai taengah, "Tuithim longpuei aka hmaitoh imkhan he imkhui kah a kuek aka ngaithuen khosoih rhoek ham saeh. ⁴⁶ Tlangpuei longpuei la aka hmaitoh imkhan te hmueihtuk kah a kuek aka ngaithuen khosoih rhoek ham saeh. Levi koca lamloh a yoei la Zadok koca rhoek ni BOEIPA amah taengah a pongthoh," a ti. ⁴⁷ Te vaengah vongup te a yun dong yakhat, a daang dong yakhat tih hniboeng bangla a nueh. Tedae hmueihtuk tah im hmai ah om.

⁴⁸ Kai te im ngalha taengla n'khuen tih ngalha kah ngalhatung te khatben ah dong nga, khatben ah dong nga la, vongka kah a daang te khatben ah dong thum, khatben ah dong thum la a nueh. ⁴⁹ Ngalha te a yun dong kul neh a daang dong hlai khat lo. Te te tangtlaeng neh luei tih tung taengkah ngalhatung te khatben ah pakhat, khatben ah pakhat pai.

41

Bawkim Khuiben

¹ Te phoeiah kai te bawkim la n'khuen tih ngalhatung a daang te khatben lamloh dong rhuk la, dap kah a daang khaw khatben lamloh a daang dong rhuk la a nueh. ² Thohka te a daang dong rha lo tih thohka kah a hael te khatben ah dong nga, khatben ah dong nga om. Te vaengah a

yun dong sawmli neh a daang dong kul la a nueh.
³ Te phoeiah a khuiben la kun tih thohka kah ngalhatung te dong kul la, thohka te dong rhuk la, thohka kah a daang te dong rhih la a nueh.
⁴ Te phoeiah bawkim hmai te a yun dong kul neh a daang dong kul la a nueh. Te vaengah kai taengah, "He tah Hmuencim khuikah Hmuencim ni," a ti.

Bawkim Poengben

⁵ Te phoeiah im pangbueng te dong rhuk la, im kaepvai kah impalai te a kaep kaep ah a daang dong li la a nueh. ⁶ Impalai khaw impalai pakhat soah impalai pathum om tih a than sawmthum om. Im pangbueng dongah aka cet impalai ham khaw a kaep kaep ah aka tu om. Te dongah im pangbueng khuila aka poe om pawh. ⁷ Impalai te a so a so la a hil tih ka hang. Im a hiilnah te im taengkah a hael a hael ah a so a so la om. Te dongah im daang te a so la a aeh hang. Te dongah a dang lamloh a soi due a bangli longah luei tangoeng.

⁸ Im te a kaep kaep ah a sang la ka hmuh. Impalai te dong rhuk aka locapu pakhat tluk te tungthi hil a niing malh a khueh. ⁹ Poengben impalai pangbueng te a daang dong nga lo tih te te im neh impalai laklo ah a hoeng la a khueh. ¹⁰ Im kaep, kaep kah imkhan laklo te a daang dong kul boeih lo. ¹¹ Impalai thohka te tlangpuei longpuei thohka neh tuithim kah thohka duela hoeng. Te vaengah a hmuen hoeng te a kaep kaep a daang dong nga lo.

¹² Buengngol te khotlak longpuei kil kah imtol hmai duela a daang dong sawmrhah lo. Buengngol pangbueng te a kaep kaep ah a daang dong nga neh a yun dong sawmko lo.

¹³ Te phoeiah im te a yun te dong yakhat, imtol neh impum kah pangbueng te a yun dong yakhat la a nueh. ¹⁴ Im hmai neh khotthoeng kah imtol te a daang dong yakhat lo. ¹⁵ Buengngol kah a yun te imtol hmai duela a nueh.

Im kah A Longlaeng

A hnuk kah a thaelkawt a thaelkawt te khatben ah khaw khatben ah dong yakhat lo. Bawkim khuiah neh vongup kah ngalha khaw, ¹⁶ cingkhah neh bangbuet caek khaw om. Cingkhah aka hmaitoh thaelkawt kaepvai te a kaep kaep ah thing bangkhoh a rhaep thum la a khoh. Diklai lamloh bangbuet duela bangbuet khaw a dah. ¹⁷ thohka so neh im khui, kawtpoeng ah khaw pangbueng kaep kaep boeih so neh a khui ah khaw a voel ah khaw cungnueh pakhat la cet. ¹⁸ Cherubim neh rhophoe khaw a khueh. Rhophoe te cherubim neh cherubim laklo ah pai tih cherubim te maelhmai panit om. ¹⁹ Te vaengah hlang maelhmai te khatben kah rhophoe taengla mael tih sathuengca maelhmai te khatben kah rhophoe taengla mael. Te te im pum kah a kaep kaep ah a khueh. ²⁰ Bawkim pangbueng tah diklai lamloh thohka so duela aka vai uh cherubim neh rhophoe a saii thil.

²¹ Bawkim rhungsut he hniboeng bangla om tih a hmuethma te hmuencim hmai kah a hmuethma bangla om. ²² Thing hmueihtuk te a

sang dong thum neh a yun dong nit lo. A imki neh a yun khaw a pangbueng khaw thing ni. Te vaengah kai taengah, "He tah BOEIPA mikhmuh kah caboei ni," a ti.

²³ Bawkim neh hmuencim te thohkhaih rhirha om. ²⁴ thohkhaih ham te thohkhaih rhoi rhirha a buen. thohkhaih pakhat ham thohkhaih panit coeng tih pakhat ham te khaw thohkhaih panit om. ²⁵ Bawkim thohkhaih soah cherubim neh rhophoe te pangbueng dongkah a saii bangla a saii. Poengben kah ngalha hmai ah thing te a khuep la a saii. ²⁶ Ngalha kah a hael te khatben ah khaw khatben ah bangbuet a caek neh rhophoe khaw om. Im kah impalai khaw a khuep om.

42

Khosoih Imkhan

¹ Kai te tlangpuei longpuei, longpuei kah vong voel la n'khuen. Te phoeiah kai te imtol hmai neh tlangpuei buengngol hmai kah imkhan la m'pawk puei. ² Te tlangpuei thohka te a hmai hil a yun dong yakhat neh a daang dong sawmnga lo. ³ A khui kah vongtung, dong kul hmai neh poengben vongtung lungphaih hmai kah thaelkawt te a hmai hil thaelkawt pathum la om. ⁴ Imkhan hmai kah caehlong te a daang dong rha lo tih longpuei te a khui la dong khat phueih om. A thohka tah tlangpuei ah om. ⁵ Imkhan khaw thaelkawt loh a kang tih buengngol yung lakah khaw, a bangli lakah khaw caek hang. ⁶ Te rhoek te pathum lo dae a tung tah vongtung tung bangla om pawh. Te dongah diklai lamlong

tah a dang lakah khaw a bangli lakah khaw toek. ⁷ Imkhan dan kah poengben vongtung neh poengben vongtung longpuei kah imkhan hmai duela a sen dong sawmnga lo. ⁸ Poengben vongtung taengkah imkhan te a yun dong sawmnga lo tih bawkim hmai ah tah dong yakhat lo coeng ne. ⁹ Imkhan hmui, imkhan hmui ah a khuirhai te puk. Vongtung poengben lamkah te khaw khotthoeng la pawk bal.

¹⁰ Khothoeng longpuei vongup vongtung a daang neh imtol khaw hmaitoh uh tih imkhan buengngol nen khaw hmaitoh uh. ¹¹ Te rhoek hmai kah longpuei te tlangpuei longpuei kah imkhan hmuethma bangla om. A yun neh a daang khaw, a thoengnah boeih khaw thikat. A laitloeknah te vantlip tih a thohka khaw vantlip. ¹² Tuithim longpuei kah imkhan thohka bangla longpuei a tongnah kah thohka khaw vantlip. Tanglung hmai kah longpuei tah khotthoeng longpuei kah pawnhlainah la pawk.

¹³ Te vaengah kai taengah ah, “Tlangpuei imkhan rhoek neh tuithim imkhan te imtol a hmaitoh lah ko. Te imkhan rhoek tah cim tih, te a cim kah aka cim BOEIPA taengah aka yoei khosoih rhoek loh buh a caak uh. Hmuen cim la a om dongah khocang khaw, boirhaem neh hmaitennah khaw, a cim a cim ni a tloeng uh eh. ¹⁴ Khosoih rhoek a kun vaengah hmuencim lamloh poengben vongtung la moe boel saeh. He tah a cim dongah a bibi vaengkah a himbai te a pum dong lamloh pit uh kuekluek dae saeh. A bai khaw himbai tloe a bai uh daengah pilnam taengah te mop saeh,” a ti.

Hmuencim neh Hmuenrhong

¹⁵ Im khui a cungnueh te a khah neh kai vongka longpuei la n'khuen. Te long te kothoeng longpuei a hmaitoh tih a kaep kaep ah a nueh. ¹⁶ Te phoeiah kothoeng yilh te capu cungnueh dong nga neh a nueh vaengah a pum la capu cungnueh te capu pum yakhat lo. ¹⁷ Tlangpuei yilh te a nueh vaengah capu cungnueh ah capu pum ya nga lo. ¹⁸ Tuithim yilh te capu cungnueh neh capu pum ya nga la a nueh. ¹⁹ Khotlak yilh te a mael thil tih capu cungnueh neh capu pum ya nga la a nueh. ²⁰ A vongtung te a kaep kaep ah pali la yilh a nueh vaengah ah a yun ya nga neh a daang ya nga lo. Te long te hmuencim te hmuenrhong lamloh a laklo ah a boe.

43*BOEIPA Thangpomnah Ha Pai Coeng*

¹ Te phoeiah kai te vongka taengla n'caeh puei. Vongka te kothoeng longpuei la mael. ² Te vaengah Israel Pathen kah thangpomnah tah kothoeng longpuei lamloh tarha ha thoeng. A ol te tui yet ol bangla lo tih diklai te a thangpomnah neh a tue. ³ Mueimae pakhat te a mueimae phek ka hmuh. Khopuei phae ham kai taengla ha pawk vaengkah ka hmuh mueimae phek la om. Mangthui khaw Kebar tuiva kah ka hmuh mueimae bangla om tih ka maelhmai te ka buenglueng. ⁴ Te vaengah BOEIPA kah thangpomnah tah kothoeng longpuei lamloh a

hmai vongka longah imkhui la kun. ⁵ Te phoeiah Mueihla loh kai te m'pom tih vongtung khui la kai te n'khuen. Te vaengah im te BOEIPA kah thangpomnah neh tarha bae.

⁶ Te vaengah im lamloh kai m'voek te ka yaak tih kai taengah aka pai hlang pakhat om. ⁷ Te phoeiah kai taengah, "Hlang capa aw, he he ka ngolkhoel hmuen neh ka kho kah khopha hmuen ni. Israel ca rhoek lakli ah kumhal duela kho ka sak pahoi vetih ka ming cim te amih Israel imkhui neh a manghai rhoek loh a pumyoihnah nen khaw a hmuensang kah a manghai rhok nen khaw poeih uh voel mahpawh. ⁸ A cingkhaa te ka cingkhaa taengah, a rhungsut te ka rhungsut taengah a khueh uh tih kai laklo neh amih laklo ah pangbueng ni a om coeng. Ka ming cim he amamih kah tueilaehkoi a saii uh neh a poeih uh. Te dongah ni ka thintoek ah amih te ka thup. ⁹ Amih kah pumyoihnah neh a manghai rhok te kai lamloh lakhla laeh saeh. Te daengah ni amih lakli ah kumhal duela kho ka sak eh.

¹⁰ Nang hlang capa aw, Israel imkhui taengah im kawng te puen pah. Te daengah ni amamih kah thaesainah dongah a hmaithae uh vetih a cungkuemnah nen khaw a nueh u eh. ¹¹ Im kah a khui a lam a saii uh boeih te a hmai a thae uh atah a hmuenmol khaw, a thoengnah neh a kunnah khaw, a khui a lam boeih neh a khosing boeih khaw, ka khui ka lam boeih neh a khui a lam khaw, a olkhueng cungkuem dongkah a olkhueng khaw amih te ming sak. Amih mikhmuh ah daek lamtah a khui a lam boeih ngaithuen uh saeh. Te daengah ni a khosing

boeih te a vai uh eh. ¹² He tah tlang som im kah olkhueng ni. A khorhi kaep, kaep boeih tah cim rhoela cim. He he im kah olkhueng ni ne.

Hmueihtuk

¹³ He rhoek he a dong la a dong vaengkah hmueihtuk cungnueh coeng ni. [Te te dong khat neh kutsom pakhat lo]. Tungngol dong khat lo tih a daang dong khat neh a rhi hmoi ah khap at phueih om. He tah hmueihtuk dongkah sawn bong ni. ¹⁴ Diklai tungngol lamloh tungkha hmui hil dong nit neh a daang dong khat lo. Tungkha ca lamloh tungkha puei duela dong li neh a daang dong khat lo. ¹⁵ Hmueihtuk tlang te hmueihtuk lamloh dong li hil a ki pali la cawn hang. ¹⁶ Hmueihtuk te a yun hlai nit, a daang hlai nit neh a vae pali la hniboeng bangla om. ¹⁷ Tungkha te a yun hlai li neh a daang hlai li lo saeh. A vae pali neh a rhi taengah dong kaek neh a tungngol te a kaepvai duela dong khat lo. A tangtlaeng te kothoeng la hooi saeh," a ti.

¹⁸ Te phoeiah kai taengah, "Hlang capa aw, ka Boeipa Yahovah loh he ni a thui. A soah hmueihhlutnah khuen ham neh a soah thii haeh ham hmueihtuk kah khosing he amah a saii khohnin ah coeng. ¹⁹ Te dongah Levi khosoih rhoek taengah pae kuekluek laeh. Amih Zadok tiingan lamloh ka taengah ha yoei uh. He tah ka Boeipa Yahovah kah olphong ni. Vaitotal te kai aka bong la, saelhung ca te boirhaem la om saeh. ²⁰ A thii te lo lamtah a ki pali dongah khaw, tungkha bangkil pali dongah khaw, a rhi

kaepvai ah hluk. Te dongah te te cim sak lamtah dawth kuekluek. ²¹ Vaitotal te boirhaem la khuen lamtah rhokso voel kah im hloeh ah hoeh.

²² A hnin bae ah maae ca hmabuet te boirhaem la khuen. Te vaengah hmueihtuk te vaitotal neh a ciim uh bangla ciim uh saeh. ²³ Na ciim bawt bawt ah saelhung ca khuikah vaitotal hmabuet neh boiva khui lamloh tatal hmabuet te na nawn ni. ²⁴ Te te BOEIPA mikhmuh la khuen lamtah khosoih rhoek loh lungkaeh phul thil saeh. Te phoeiah BOEIPA taengah hmueihhlutnah la khuen saeh. ²⁵ Hnin rih khuiah sai lamtah, hnin at dongkah boirhaem la maae khaw, saelhung ca khuikah tah vaitotal khaw, boiva khuikah tah tatal khaw a hmabuet te nawn uh saeh. ²⁶ Hnin rih khuiah hmueihtuk te dawth uh saeh lamtah caihcil uh saeh. Te daengah ni a kut, a kut ah a cung u eh. ²⁷ Khohnin te cup tih hnin rhet dongla ana om ni. Te phoeiah tah nangmih kah hmueihhlutnah neh rhoepnah te khosoih rhoek loh hmueihtuk dongla khueh uh saeh lamtah nangmih te kan moeithen bitni. He tah ka Boeipa Yahovah kah olphong ni," a ti.

44

Khoboei Hamsun

¹ Kai te khothoeng la aka mael poengben rhokso vongka longpuei la n'mael puei vaengah te te ana khai uh pueng. ² Te vaengah BOEIPA loh kai taengah, "Vongka a khaih he ana om saeh. Ong boel saeh lamtah he lamloh hlang kun boel saeh. Israel Pathen BOEIPA he te lamloh a kun lalah a khaih uh dongah ana om saeh. ³ BOEIPA

mikhmuh ah buh aka ca aka ca ham khoboei, khoboei mah a khuiah ngol saeh. Vongka kah ngalha long kun saeh lamtah amah long ah cet saeh," a ti.

⁴ Te phoeiah im hmai kah tlangpuei vongka longpuei la kai n'khuen. Ka sawt vaengah BOEIPA im te BOEIPA kah thangpomnah tarha bae tih ka maelhmai neh ka bakop. ⁵ Tedae BOEIPA loh kai taengah, "Hlang capa aw na lungbuei ah khueh lamtah na mik neh hmu laeh. Na hna neh ya laeh. A cungkuem dongah kai loh nang te BOEIPA im kah khosing boeih neh a olkhueng dongkah olkhueng cungkuem te kang uen coeng. Te dongah na lungbuei te a im vongrhai rhokso kah a thoengnah cungkuem taengah khueh laeh.

Levi rhoek kah Hamsum

⁶ Ka Boeipa Yahovah loh a thui he, Israel imkhui boekoek taengah thui pah. Israel imkhui nang kah tueilaehkoi cungkuem te nangmih taengah temah laeh saeh. ⁷ Lungbuei pumdul rhoek neh pumsa kah pumdul, kholong ca rhoek te ka rhokso ah om ham nang khuen uh. A tha neh a thii te ka buh la na nawn vaengah ka im te a poeih tih nangmih tueilaehkoi cungkuem loh ka paipi te a phae. ⁸ Ka cimcainah loh a kuek te na ngaithuen uh pawt dongah ka rhokso dongkah ka kuek te aka ngaithuen la nangmih na khueh uh thae.

⁹ Ka Boeipa Yahovah loh he ni a thui. Lungbuei pumdul neh pumsa pumdul, kholong ca boeih tah Israel ca lakli kah kholong ca boeih khaw ka rhokso la mop boel saeh. ¹⁰ Te dongah Levi

pataeng kai taeng lamloh a lakhla vaengah tah Israel loh kho a hmang. Kho a hmang vaengah kai taeng lamloh a mueirhol hnuk a vai uh dongah amamih kah thaesainah te phuei uh saeh. ¹¹ Te daengah ni ka rhokso ah om uh vetih im vongka kah cawhkung la aka thotat neh im ah aka thotat la a om uh eh. Te rhoek loh pilnam ham hmueihhlutnah neh hmueih te ngawn pah saeh. Te rhoek te amih bong ham amih mikhmuh ah pai saeh. ¹² Amih loh a mueirhol hmai ah a thohtat uh khaw Israel imkhui ham tah thaesainah hmuitoel la poeh uh. Te dongah ni ka kut he amih ka phuel thil. He tah ka Boeipa Yahovah kah olphong ni. Te dongah amamih kah thaesainah te phuei uh saeh. ¹³ Kai taengah khosoih bi ham ka taengla ha mop uh boel saeh. Cimcainnah khui lamkah cimcainnah ni kai kah cimcainnah cungkuem khuiah ha mop eh. Te dongah amamih kah mingthae neh amamih kah tueilaehkoi a saii uh te phuei uh saeh. ¹⁴ Tedae amih te a thohtatnah cungkuem dongah ka im kah a kuek aka ngaithuen tih a khuiah a cungkuem aka saii la ka khueh ni.

Khosoih Rhoek kah Hamsum

¹⁵ Tedae Zadok koca, Levi khosoih rhoek loh ka rhokso kah a kuek te ngaithuen uh saeh. Te daengah ni amih Israel ca loh kai taeng lamkah kho a hmang vaengah kai aka bong la kai taengah ha mop uh vetih kai taengah maetha neh thii nawn ham te ka mikhmuh ah a pai uh eh. He tah ka Boeipa Yahovah kah olphong ni. ¹⁶ Amih ni ka rhokso la a kun uh eh. Te phoeiah amih ni kai aka bong ham ka caboei

taengah ha mop uh vetih ka kuek te a ngaithuen uh eh. ¹⁷ Amih te a khui kah vongtung vongka khuila kun ham a om vaengah hlamik himbai mah bai uh saeh. Amih te khuiben vongup vongka neh ka im ah a thohtat uh vaengah tah a pum dongah tumul khuen boel saeh. ¹⁸ Hlamik lukhuem te a lu dongah khuem uh saeh lamtah hlamik hnii te a cinghen ah na uh saeh. Himbaibae la vah uh boel saeh. ¹⁹ Amih poengben vongtung taengla aka cet loh poengben vongtung kah pilnam taengla a caeh atah a bibi vaengkah a himbai te pit uh saeh. Te te cimcaihnah imkhan ah khueh uh saeh lamtah himbai tloe bai uh saeh. Amih kah himbai lamloh pilnam khaw vik ciim uh pawt ve.

²⁰ A lu khaw vo uh boel saeh lamtah sammuei khaw sen boel saeh. A lu te rhuep la rhuep uh saeh. ²¹ Khosoih boeih long tah khuiben vongtung la a kun vaengah misurtui o uh boel saeh. ²² Nuhmai neh vama khaw a yuu la lo uh boel saeh. Tedae Israel imkhui kah tiingan lamloh oila neh nuhmai khaw khosoih kah yurho la aka om tah lo uh saeh. ²³ Ka pilnam te a laklo ah rhongingnah lamloh cimcaihnah te thuinuet uh. A laklo ah cuemcaih khui lamkah rhalawt hno te tueng uh saeh.

²⁴ Tuituknah dongah khaw amih tah kai kah laitloeknah dongah pai uh saeh lamtah tiktamnah ham laitloek uh saeh. Laitloek long khaw ka olkhueng bangla laitloek uh saeh. Ka khoning cungkuem dongah khaw ka khosing te ngaithuen

44:17 Sng 28.39-43; Tho 16.4 **44:19** Tho 16.23 **44:20** Tho 21.5 **44:21** Tho 10.9 **44:22** Tho 21.7,13,14 **44:23** Tho 10.10

uh saeh lamtah ka Sabbath te ciim uh saeh.
²⁵ Hlang duek taengah mop boel saeh vik poeih uh ve. Te dongah, napa long khaw, manu long khaw, capa long khaw, canu long khaw, manuca neh tanu long khaw va aka om pawt te poeih koinih, ²⁶ Te dongah anih kah ciimnah te hnin rhih phoeiah ni anih ham a tae pah eh. ²⁷ Hmuencim ah thohtat ham khuiben vongup kah hmuencim la a mop hnin ah a boirhaem te nawn saeh. He tah ka Boeipa Yahovah kah olphong ni.

²⁸ Te te amih taengah rho la om saeh. Ka he amih kah rho coeng ni. Te dongah Israel kah khohut te amih taengah pae boeh. Kai he amih kah khohut coeng ni. ²⁹ Khocang, boirhaem neh hmaithennah te a caak uh vetih Israel khuiah yahtaboeh boeih te amih ham om bitni. ³⁰ A tanglue cungkuem neh a thaihcuek boeih, khocang boeih neh na khosaa cungkuem lamkah boeih te khosoih rhoek ham om saeh. Na buhuem tanglue te khosoih rhoek taengla na paek daengah ni yoethennah te na im ah a pai eh. ³¹ Maehrhok neh saha boeih tah vaa khaw rhamsa khaw khosoih loh ca boel saeh," a ti.

45

Khohmuen kah Hmuensueng

¹ Khohmuen te rho la na naan uh vaengah BOEIPA te khosaa neh na pomsang ni. Khohmuen te a yun thawng kul thawng nga sen tih a daang thawng rha te hmuencim la

44:25 Tho 21.1-4

44:28 Lmp 18.20

44:29 Lmp 18.8-19

44:31 Tho 22.8

hoep lamtah a kaepvai kah a rhi khaw boeih ah cimcaihnah om saeh. ² Hmuencim ham he ya nga, ya nga ah hniboeng bangla om saeh. A kaep, kaep ah dong sawmnga te khocaak la om saeh. ³ Te tlam cungnueh nen a yun thawng kul thawng nga, panga neh a daang thawng rha nueh lamtah a khui te hmuencim kah hmuencim rhokso la om saeh. ⁴ Khohmuen lamkah hmuencim te BOEIPA taengah thohtat ham aka paan tih rhokso kah aka thotat khosoih rhoek ham om saeh. Amih ham im neh rhokso kah rhokso hmuen la om saeh. ⁵ Te vaengah thawng kul thawng nga te a yun saeh lamtah thawng rha te a daang la om saeh. Te vaengah im kah aka thotat, amih Levi rhoek ham te khohut la imkhan pakul om pah saeh.

⁶ Khopuei kah khohut te a daang thawng nga neh a yun thawng kul nga te voevang ah hoep pah. Te te Israel imkhui pum ham khosaa hmuencim la om saeh.

Mangpa Ham Khoyo

⁷ Hmuencim khosaa kah a kaep, kaep ah, khopuei khohut kah hmuencim khosaa hmai duela, khotlak tuipuei ngong lamloh kothoeng kah kothoeng ngong khopuei khohut hmai duela, khotlak rhi lamloh kothoeng rhi duela voevang kah khoyun te khoboehi ham khoyo pakhat la om saeh. ⁸ Te khohmuen te Israel lakli ah anih kah khohut la om saeh. Te dongah ka khoboehi rhoek loh ka pilnam te vuelvaek voel boel saeh. Tedae khohmuen te Israel imkhui ham a koca tarhing a paek bitni.

⁹ Ka Boeipa Yahovah loh he ni a thui. Israel khoboei rhoek nangmih te tamah laeh saeh, kuthlahnah neh rhoelrhanah te toeng uh laeh. Tiktamnah neh duengnah mah saii uh. Nangmih hlanghmu pathai khaw ka pilnam taeng lamloh temah laeh saeh. He he ka Boeipa Yahovah kah olphong ni. ¹⁰ Duengnah cooi neh duengnah cangnoek, duengnah bath mah nangmih taengah om saeh. ¹¹ Cangnoek neh bath kah a rhimong te pakhat la om saeh. Bath pakhat dongah homer parha, homer pakhat dongah cangnoek parha kun saeh lamtah homer te a lan a tang la om saeh. ¹² Shekel khat gerah pakul lo. Shekel pakul panga phoeiah shekel pakul phoeiah shekel hlai nga te nangmih ham mina pakhat la om saeh.

Pilnam kah Khocang

¹³ Khocang he cang homer pakhat dongkah cangnoek parhuk ah tloeng lamtah cangtun homer khat te cangnoek parhuk la loeng pah. ¹⁴ Situi ham tah bath dongah otlueh khueh saeh. Situi he kore pakhat ah bath parha lo saeh. Homer pakhat te bath parha, bath parha te homer pakhat lo ni. ¹⁵ Israel kah buhtoi boiva yahnih dongah tu pakhat te khocang neh hmueihhlutnah la, rhoepnah ham amih kah tholh aka dawth la om saeh. He tah ka Boeipa Yahovah kah olphong ni. ¹⁶ Khohmuen pilnam boeih loh he khosaa neh Israel khoboei taengla mop uh saeh. ¹⁷ Khoboei soah he hmueihhlutnah neh khocang khaw, khotue kah tuisi neh hlasae Sabbath khaw, Israel imkhui kah tingtunnah

boeih khaw om ni. Israel imkhui yueng tholh dawth ham te boirhaem neh khocang khaw, hmueihhlutnah neh rhoepnah khaw a saii pah ni.

¹⁸ Ka Boeipa Yahovah loh he ni a thui. Lamhmacuek kah hlasae hnin at dongah saelhung ca khuikah vaito hmabut te lo lamtah rhokso te ciim kuekluek. ¹⁹ Boirhaem thii te khosoih loh lo saeh lamtah im kah rhungsut neh hmueihtuk tungkha a kil te pali dongah khaw, khuiben vongup vongka kah rhungsut dongah khaw hluk saeh. ²⁰ Te tlam te a hla rhih dongah khaw aka palang hlang ham neh hlangyoe ham saii pah. Te tlam ni im ham khaw na dawth eh.

²¹ Lamhma la hlasae hnin hlai li te nangmih ham Yoom la om vetih khotue yalh khohnin ah tah vaidamding mah ca saeh. ²² Te khohnin ah khoboei loh amah yueng neh khohmuen pilnam boeih yueng, boirhaem la vaitotal ngawn saeh. ²³ Khotue hnin rhih khuiah BOEIPA taengkah hmueihhlutnah te vaitotal parhih neh tatal parhih hmabut neh, khohnin hnin rhih kah boirhaem te hnin at ham mae tal ca pakhat ngawn saeh. ²⁴ Khocang te vaito pakhat dongah cangnoek pakhat, tatal pakhat dongah cangnoek neh cangnoek pakhat dongah situi bunang pakhat hmoel saeh. ²⁵ Hla rhih, hnin hlai nga dongkah khotue vaengah khaw hnin rhih khuiah boirhaem ham neh hmueihhlutnah ham khaw, khocang ham neh situi ham khaw te rhoek bangla saii saeh.

46

Khoning vaengkah Nawannah

¹ Ka Boeipa Yahovah loh he a thui. Khothoeng la aka mael khiiben vongup vongka bibi nah hnin rhuk khiuah khai saeh. Tedae Sabbath hnin ah ong saeh lamtah hlasae hnin ah khaw ong saeh. ² Khoboei te poengben lamloh vongka ngalha longpuei ah khun saeh lamtah vongka rhungsut ah pai saeh. A hmueihhlutnah neh anih kah rhoepnah hmueih te khosoih rhoek loh nawn uh saeh. Te phoeiah vongka thohkong ah thothueng saeh lamtah nong saeh. Tedae vongka te kholaeh duela khai boel saeh. ³ Te phoeiah vongka thohka kah khohmuen pilnam long khaw Sabbath neh hlasae ah tah BOEIPA mikhmuh ah thothueng saeh.

⁴ Sabbath hnin ah tah BOEIPA taengkah hmueihhlutnah ham khoboei loh tuca hmabut parhuk neh tatal hmabut te khuen saeh. ⁵ Tatal nen tah khocang cangnoek pakhat saeh lamtah tuca nen tah khocang amah kut kah kutdoe yet mai saeh, situi bunang khat neh cangnoek pakhat saeh. ⁶ Hlasae hnin kah ham te saelhung ca khuikah vaito khaw hmabut saeh lamtah tuca parhuk neh tatal khaw hmabut la om saeh. ⁷ Khocang te vaito nen tah cangnoek pakhat, tatal nen tah cangnoek pakhat khueh saeh. Tedae tuca nen tah a kut naep bangla om mai saeh lamtah cangnoek pakhat dongah situi bunang khat nawn saeh. ⁸ Khoboei a kun vaengah vongka kah ngalha long kun saeh lamtah amah long ah ha pawk saeh.

⁹ Khohmuen pilnam loh khoning vaengah BOEIPA mikhmuh ah a mop vaengah khaw thothueng ham te tlangpuei vongka long kun saeh lamtah tuithim vongka long la pawk saeh. Tuithim vongka long a kun te tlangpuei vongka long la pawk saeh. A kun nah vongka long ah mael boel saeh. Tedae a khatben lamloh cet rhoe cet saeh. ¹⁰ Amih khui kah khoboei khaw amih a kun vaengah kun saeh lamtah amih ha pawk vaengah ha pawk van saeh. ¹¹ Khotue vaengah khaw, tingtunnah dongah khaw khocang te vaito pumkhat ah cangnoek pakhat, tatal pakhat ah cangnoek pakhat nawn saeh. Tedae tuca nen tah a kut dongkah kutdoe rhoeh saeh lamtah cangnoek pakhat situi bunang khat saeh.

¹² Khoboei loh BOEIPA taengah hmueihhlutnah te kothoh neh, rhoepnah khaw kothoh saii saeh. Te vaengah anih ham kothoeng la aka mael vongka te ong pah saeh lamtah a hmueihhlutnah neh anih kah rhoepnah te Sabbath hnin kah a saii bangla saii saeh. Te phoeiah nong saeh lamtah anih ha pawk hnuk ah vongka te khai saeh.

¹³ Te vaengah tuca kumkhat ca a hmabut te hmueihhlutnah ham BOEIPA taengah hnin takuem saii saeh. Mincang, mincang ah te te saii pah. ¹⁴ Khocang khaw te nen te mincang, mincang ah na nawn ni. Khocang vaidam ham te cangnoek parhuk ah pakhat neh situi bunang pathum ah pakhat neh sul saeh lamtah BOEIPA taengkah kumhal khosing la phat om saeh. ¹⁵ Te dongah tuca neh khocang neh situi te tah mincang, mincang kah hmueihhlutnah la

hmoel rhoe hmoel uh taitu saeh.

Khoboei neh Khohmuen

¹⁶ Ka Boeipa Yahovah loh he ni a thui. Khoboei loh a rho te a ca rhoek khui kah hlang pakhat ham kutdoe la a paek coeng atah rho te a ca rhoek ham khohut la om ni. ¹⁷ Tedae a rho te a sal pakhat ham kutdoe la a paek atah sayalhnah kum hil mah anih taengah om saeh. Te phoeiah tah khoboei taengla mael saeh lamtah a rho te amah ca rhoek taengah om saeh. ¹⁸ Khoboei loh pilnam te amamih kah khohut lamloh vuelvaek tih rho te loh pah boel saeh. Amah khohut lamkah mah a ca rhoek te phaeng saeh. Te daengah ni ka pilnam he hlang khat khaw amah khohut dongah a taek a yak uh pawt eh.

Caak Thong Im

¹⁹ Te phoeiah kai te vongka hlaep kah khuirhai lamloh tlangpuei la aka mael, khosoih kah hmuencim imkhan la n'khuen. Te vaengah a hmuen te khotlak a bawt, a bawt ah pahoi om coeng ne. ²⁰ Te phoeiah kai taengah, "He hmuen ah khosoih rhoek loh hmaithennah neh boirhaem khaw pahoi thong uh saeh lamtah khocang khaw te ah te kaeng uh saeh. Pilnam ciim ham vaengah tah poengben kah vongup la hang khuen boel saeh," a ti. ²¹ Te phoeiah kai te poengben vongup la n'khuen tih vongup kah imki pali te kai m'paan puei. Vongup kah imki ah vongtung pakhat, vongup pakhat imki dongah vongtung pakhat lawt ana om. ²² Vongtung sokah vongtung imki te pali la sisuk uh. A

yun sawmli neh a daang sawmthum lo tih a hmuidong pali te cungnueh pakhat la cet. ²³ A kaep, kaep ah a tlaang pali la om tih lumim kaepvai kah a kungdak ah hmaikolhmuen a saii. ²⁴ Te vaengah kai taengah, “He rhoek buh thong im ni. Im kah aka thotat rhoek loh pilnam kah hmueih te thong nah saeh,” a ti.

47

Hingnah Tuiva

¹ Te phoeiah im thohka la kai m'mael puei. Te vaengah tui im thohkong hmui lamloh kthoeng la tarha ana long. Im hmai khaw kthoeng la mael tih tui te im hmui lamloh a hael kah bantang ah hmueihtuk kah tuithim duela suntla. ² Te phoeiah kai te tlangpuei vongka long la n'khuen tih poengben vongka duela poengben kah longpuei te kai n'hil puei. Longpuei te kthoeng la mael tih tui te bantang hael lamloh tarha ana phuet bal. ³ Te vaengah hlang pakhat te cet tih kthoeng te a kut dongkah rhui neh dong thawng khat la a nueh. Te phoeiah kai he tui dongah n'kat puei tih tui he khopha due lo. ⁴ Te phoeiah thawngkhat la a nueh tih kai te tui dongah n'kat puei hatah tui khuklu hil lo. Te phoeiah thawng khat la a nueh tih kai n'kat puei vaengah tui he cinghen hil lo. ⁵ Thawngkhat a nueh phoeiah tah soklong te kat ham ka coeng voel pawh. Tui te phul coeng tih tui ya long khaw soklong te kat thai pawh. ⁶ Te vaengah kai te, “Hlang capa na hmuh coeng nama?” n'ti nah.

Te phoeiah ah kai te n'caeh puei tih soklong kaeng la kai m'mael puei. ⁷ Ka mael vaengah ah thingkung te soklong taengkah a kaep, kaep ah tarha om muep khungdaeng. ⁸ Te phoeiah kai te, "Tui he kothoeng saa la long tih kolken la suntla. Te phoeiah tuipuei la pawk tih, tuipuei la a pawk daengah ni hoeih tih tui a tui pueng. ⁹ Te dongah mulhing hinglu aka om boeih khaw soklong a long nah boeih ah aka luem tah hing ni. Tui he a long coeng dongah nga khaw muep om khungdaeng ni. Tui te a hoeih coeng dongah soklong la aka pawk boeih tah hing ni. ¹⁰ A kaep ah tuihoi rhoek pai rhoe pai uh vetih Engedi lamloh Eneglaim duela amah hui ah soh a yaalnah la om ni. A nga te tuipuei tanglue kah nga bangla muep om khungdaeng ni. ¹¹ Nongtui, nongtui neh kangueng tah lungkaeh a phul dongah tui mahpawh. ¹² Soklong soktaeng kah a kaep, kaep ah caak thing cungkuem poe vetih a hnah hoo mahpawh, a thaih cing mahpawh ni. A rhokso lamkah a tui a thoeng pah coeng dongah a hla takuem thaihcuek bangla thai ni. Te dongah a thaih te caak la poeh vetih a hnah si la poeh ni.

Khohmuen kah Khorhi

¹³ Ka Boeipa Yahovah loh he a thui. He khorhi neh Israel koca hlai nit te khohmuen na phaeng bangla Joseph tah khoyo bongnit saeh. ¹⁴ Te vaengah hlang he a manuca kah van bangla phaeng. He he paek ham ni na pa rhoek taengla

la ka kut ka thueng. Te dongah khohmuen he nangmih kah rho lam ni a cul eh.

¹⁵ Khohmuen kah khorhi he

tlangpuei baengki ah tah tuipuei tanglue lamloh Hethlon longpuei kah Zedad la pawk lah ko.

¹⁶ Te phoeiah Khamath, Berothai neh Sibraim he Damasku khorhi laklo neh Hauran khorhi, Khamath Hazarhatticon khorhi laklo kah ni.

¹⁷ Te phoeiah khorhi tuipuei lamloh Damasku khorhi Hazarenan la yong vetih tlangpuei, tlangpuei ah tlangpuei baengki hil te Khamath khorhi neh doo uh saeh.

¹⁸ Khothoeng baengki tah Hauran laklo lamkah neh Damasku laklo lamloh, Gilead laklo lamkah neh Israel khohmuen Jordan laklo kah khorhi lamloh yan tuipuei duela khothoeng baengki te nueh pah.

¹⁹ Tuithim baengki khaw tuithim Tamar lamloh Kadesh Meribah soklong tui duela, tuipuei tanglue duela om. Te te tuithim kah tuithim khorhi la om.

²⁰ Khotlak saa la tuipuei tanglue neh Lebokhamath taeng hil he khotlak saa kah khorhi saeh.

²¹ Te dongah khohmuen he namamih Israel koca tarhing ah ni na tael eh. ²² Te te namamih ham neh nangmih lakli kah aka kuep yinlai ham khaw, nangmih khui kah ca sak khaw rho la naan pah. Te dongah nangmih taengah Israel ca kah mupoe bangla om uh saeh. Nangmih neh Israel koca khui kah rho la naan thil saeh. ²³ Te koca khuikah aka bakuep yinlai te amah rho neh na phaeng ni. He tah ka Boeipa Yahovah kah olphong ni," a ti.

48

Koca rhoek kah Khoyo

¹ Koca rhoek kah a ming he tlangpuei khobawt lamloh Lebokhamat kah Hethlon longpuei kah ngolbuel taeng duela, Damasku khorhi kah Hazarenan tlangpuei la, Khamath ngolbuel phai neh tuihuei kah kothoeng baengki hil te pakhat ah Dan rhoek om uh saeh.

² Dan khorhi dongah kothoeng saa lamloh khotlak baengki due pakhat ah Asher ham saeh.

³ Asher khorhi phoeiah kothoeng baengki lamloh khotlak baengki hil te pakhat ah Naphtali ham saeh.

⁴ Naphtali khorhi phoeiah kothoeng baengki lamloh khotlak baengki hil pakhat ah Manasseh ham saeh.

⁵ Manasseh khorhi phoeiah kothoeng baengki lamloh khotlak baengki hil te pakhat ah Ephraim ham saeh.

⁶ Ephraim khorhi phoeiah kothoeng baengki lamloh khotlak baengki hil te pakhat ah Reuben ham saeh.

⁷ Reuben khorhi phoeiah kothoeng baengki lamloh khotlak baengki hil te pakhat ah Judah ham saeh.

⁸ Judah khorhi phoeiah kothoeng baengki lamloh khotlak baengki hil khosaa om saeh. Te te a daang neh a yun thawng kul thawng nga tloeng uh. Kothoeng baengki lamloh khotlak baengki duela khoyo pakhat la om saeh lamtah a khui ah rhokso om saeh.

⁹ BOEIPA taengah khosaa te a yun thawng kul thawng nga neh a daang thawng rha na tloeng ni. ¹⁰ He rhoek he khosoih rhoek ham khosaa hmuencim la om ni. Tlangpuei ah thawng kul thawng nga, khotlak ah a daang te thawng rha saeh lamtah kothoeng ah a daang thawng rha saeh, tuithim ah a yun thawng kul thawng nga neh a khui ah BOEIPA kah rhokso om saeh. ¹¹ Zadok koca lamkah mah khosoih la hoep saeh. Te rhoek long tah ka kueknah a ngaithuen uh tih Levi kah khohmang bangla Israel ca loh kho a hmanh akhaw te rhoek loh kho a hmanh uh moenih. ¹² Te dongah Levi khorhi taengkah a cim la aka cim koek khohmuen kah khosaa te amih ham rhungkung buh la om saeh.

¹³ Levi kah khaw khosoih khorhi voeivang ah thawng kul thawng nga te a yun vetih a daang te thawng rha lo ni. A yun boeih te thawng kul thawng nga vetih a daang te thawng rha lo ni. ¹⁴ Te te yoi uh boel saeh lamtah tho boel saeh. Khohmuen tanglue he BOEIPA ham a cim dongah khum rhoe khum boel saeh.

¹⁵ A daang thawng kul thawng nga hmai la thawng nga aka hoei te khopuei ham neh tolrum ham khaw khocaak ham khaw hman-grhong la om saeh. Tedae a laklo a laklo ah kho om saeh. ¹⁶ A cunghueh te tlangpuei saa dongah thawng li ya nga neh tuithim saa thawng li ya nga panga, kothoeng saa dongah thawng li ya nga neh khotlak saa dongah ah thawng li ya nga lo saeh. ¹⁷ Khopuei kah khocaak ham te tlangpuei ah yahnih sawmnga, tuithim ah yahnih sawmnga, kothoeng ah yahnih sawmnga,

khotlak ah yahnih sawmnga lo saeh.

¹⁸ Hmuencim khosa rhi kah a yun te kothoeng ah thawng rha, khotlak ah thawng rha coih pueng tih hmuencim khosaa voevang ah om saeh. A vueithaih tah khopuei ah aka thotat kah a caak ham a vueithaih la om saeh. ¹⁹ Khopuei kah aka thotat Israel koca boeih loh te te tawn saeh. ²⁰ Khosaa boeih te thawng kul thawng nga, thawng kul thawng nga ah pali la hmoel lamtah khopuei kah khohut neh hmuencim khosaa la om saeh. ²¹ Hmuencim khosaa neh khopuei kah khohut te heben ah khaw keben ah khaw khoboei ham sueng pah saeh. Khosaa te a hmai thawng kul thawng nga lamloh kothoeng khorhi hil pha saeh. Te phoeiah tuipuei hmai lamloh khotlak rhi thawng kul thawng nga hil voevang phai te khoboei kah khoyo la om saeh. Te dongah khosaa hmuencim neh a im kah rhokso tah a laklung, a laklung ah om saeh. ²² Te dongah Levi khohut lamkah neh khopuei khohut lamkah a laklung te khoboei ham om pah saeh. Judah khorhi laklo neh Benjamin khorhi laklo te khoboei ham om pah saeh.

²³ Te vaengah kothoeng baengki lamloh khotlak baengki hil te

Benjamin koca kah hlangrhuel ham pakhat la om saeh.

²⁴ Benjamin khorhi phoeiah kothoeng baengki lamloh khotlak baengki hil te Simeon ham pakhat om saeh.

²⁵ Simeon khorhi phoeiah kothoeng baengki lamloh khotlak baengki hil te Issakhar ham pakhat om saeh.

26 Issakhar khorhi phoeikah kothoeng baengki lamloh khotlak baengki hil te Zebulun ham pakhat om saeh.

27 Zebulun khorhi phoeikah kothoeng baengki lamloh khotlak baengki hil te Gad ham pakhat om saeh.

28 Gad khorhi phoeikah tuithim khorhi te tah tuithim la yong. Te phoeiah khorhi te Kadesh soklong kah Meribah tui taeng Tamar lamloh tuipei tanglue la pawk. ²⁹ Khohmuen he he Israel koca ham neh amamih boelnah bangla rho la naan pah. He tah ka Boeipa Yahovah kah olphong ni.

Khopuei Thai

30 Khopuei a bawtnah rhoek he tlangpuei saa ah cungnueh thawng li ya nga lo saeh. ³¹ Khopuei vongka rhoek te Israel koca ming la om vetih tlangpuei kah vongka pathum dongah Reuben vongka pakhat, Judah vongka pakhat, Levi vongka pakhat saeh.

32 Kothoeng saa dongkah te thawng li ya nga lo tih, vongka pathum dongah Joseph vongka pakhat, Benjamin vongka pakhat, Dan vongka pakhat saeh.

33 Tuithim saa khaw cungnueh ah thawng li ya nga lo. Vongka pathum dongkah te Simeon vongka pakhat, Issakhar vongka pakhat, Zebulun vongka pakhat saeh.

34 Khotlak saa ah thawng li ya nga lo bal. A vongka pathum dongah Gad vongka pakhat,

Asher vongka pakhat, Naphtali vongka pakhat saeh.

³⁵ A kaepvai te thawng hlai rhet lo tih BOEIPA kah khohnin lamlong tah khopuei ming khaw pahoi om saeh.

Baibal Olcim
The Holy Bible in the Matupi Chin language of
Mynmar. Matupi Chin Standard Bible

Public Domain

Language: Matupi Chin (Chin, Matu)

Published in Mynmar, which is not a signatory to international copyright treaties. Copyright may apply locally in Mynmar, where this is released under a Creative Commons Attribution Share-Alike 4.0 license.

2022-12-07

PDF generated using Haiola and XeLaTeX on 4 Mar 2023 from source files dated 7 Dec 2022

41fab36-17f8-5f01-836a-236df4848b16